

LUKE

Di Longo Humalia Luke

Di haga modongoohia:

Di Longo Humalia Luke e haga modongoohia Jesus bolo Mee go Tangada Hagamouli ne hagababa ang gi digau Israel, ge Tangada Hagamouli ni digau huogodoo. Luke e hihi bolo Jesus ne gahi go di Hagataalunga o Dimaadua bolo Mee gi “*agoago ina di Longo Humalia gi digau hagaloale*”, gei di Longo Humalia deenei la guu honu te nnoomaalia gi nia daangada ala e logo nadau haingadaa. Di tenetene e damana i lodo *Di Longo Humalia Luke*, e helekai i nia mada i taamada di beebaa deenei e haga iloo di hanimoi o Jesus, mo nia mada hagaodi e haga iloo di hana o Jesus gi di langi. Di kai o digau hagadonu mo di hagadele di Longo Humalia i muli di hana Jesus gi di langi, la guu kai go Luke i lodo di beebaa *Nnegau o digau agoago hagau*.

Nia mee hagabalagau ala ilodo di Longo Humalia deenei, lago di kai o taahili o digau di langi, di haga heetugi o digau hagaloohi siibi gi Jesus, di noho o Jesus i lodo di Hale Daumaha, gei mee tama daane, mo di ala kai o tangada Samaria humalia, mo di ala kai o tama daane ne ngala. Lodo di Longo Humalia deenei nia helekai hagamaamaa e helekai hagamahi i di hai dalodalo, di Hagataalunga Dabu mo di waawa hegau o nia ahina i lodo nnegau a Jesus, mo di hai a God e dumaalia ang gi nia huaidu gi maahede.

Di hagahonu di beebaa deenei:

Di haga modongoohia (1.1-4)

Di haanau o John Babdais mo Jesus (1.5—2.52)

Nnegau a John Babdais (3.1-20)

Di babdais mo di hagamada Jesus (3.21–4.13)

Nnegau a Jesus i Galilee (4.14–9.50)

Di hana Jesus mai Galilee gi Jerusalem (9.51–23.56)

Di mouli aga, di haga gidagida, mo di lahi Jesus gi di langi (24.1-53)

¹ Dogu ihoo hagaaloho Theophilus. Digau dogologo ne hagamahi e hihi nnelekai o nia mee ala gukila aga i tatau baahi. ² Digaula ne hihi nia mee ala gu modongoohia gidaadou mai ibaahi ginaadou ala ne mmada ginia mee aanei itaamada, gei gu agoago nia maa ginia daangada. ³ Meenei Theophilus, dogu mmada gi humalia ginia mee haga lligi huogodoo mai taamada, gei au gu maanadu bolo ma koia e humalia, maa au gaa hihi nnelekai haga modongoohia adu gi di goe i nia mee ala ne hai. ⁴ Au e hai di mee deenei, gi modongoohia e goe di tonu dogomaalia o nia mee huogodoo ala guu lawa dau iloo.

Di haga iloo di haanau John Babdais

⁵ Di madagoaa Herod nogo king i Judea, tangada hai mee dabu i golo dono ingoo go Zechariah, tangada ni di hagabuulinga gau hai mee dabu a Abijah. Dono lodo go Elizabeth, tangada labelaa ni di madawaawa digau hai mee dabu.* ⁶ Meemaa e mouli humalia i mua o God, e haga kila aga nia helekai mo nia haganoho huogodoo Dimaadua. ⁷ Meemaa nau dama ai, idimaa, Elizabeth di ahina e dee huwa, meemaa gu mmaadua.

⁸ Dahi laangi hua, Zechariah nogo hai ana hegau dabu i lodo di Hale Daumaha. ⁹ I di hagatau dela nogo daudali go digau hai mee dabu, mee ne hilihili belee dudu ana 'incense' i hongo di gowaa dudu tigidaumaha lolo kala, mee ga ulu gi lodo di Hale Daumaha Dimaadua.

* 1.5: 1 Kronikel 24.10

¹⁰ Di hagabuulinga dangada i malaelae, e dalodalo i di madagoaa tigidaumaha ‘incense’ e dudu. ¹¹ Tangada di langi Dimaadua ga haga gida eia gi Zechariah, e duu i di baahi gau donu, di gowaa dudu tigidaumaha. ¹² Di madagoaa Zechariah ne gidee tangada di langi deela, geia gu homouli, gu madagu huoloo. ¹³ Gei tangada di langi ga helekai, “Zechariah, hudee madagu! Au dalodalo la guu kila i baahi o God. Doo lodo go Elizabeth ga haanau dana dama daane, gei goe wanga ina dono ingoo go John. ¹⁴ Goe ga tenetene ge noho i di aumaalia, gei digau dogologo ga tenetene gi di haanau o maa. ¹⁵ Mee ga aamua i mua o God. Mee hagalee hai gii tale gi nia waini be gi nia dagaao maaloo. Taamada mai di haanau o maa, mee gaa honu i di Hagataalunga Dabu.* ¹⁶ Mee ga laha mai labelaa digau Israel dogologo gi Dimaadua, go di nadau God. ¹⁷ Mee gaa hana i mua o Mee, e maaloo gei e mahi be soukohp Elijah. Mee ga hagahumalia mehanga nia damana mo nadau dama, gaa huli digau de hagalongo gi di tonu, mee gaa hai nia daangada o Dimaadua gi togomaalia gi Mee.”*

¹⁸ Zechariah ga helekai gi tangada di langi, “Dehee dagu hai e iloo bolo nia helekai aanei le e donu e kila aga i dogu baahi, gimaua mo dogu lodo la gu mmaadua?”

¹⁹ Tangada di langi ga helekai, “Au go Gabriel. Au e duu i mua nnadumada o God. Au ne hagau mai belee haga iloo adu di longo humalia deenei.* ²⁰ Gei goe dela hagalee hagadonu dagu haga iloo dela ga gila aga i di madagoaa hai donu. Idimaa goe digi hagadonu, gei goe ga deemee di leelee, gaa dae loo gi di laangi dela e gila aga dagu hagababa deenei adu gi di goe.”

* 1.15: Numbers 6.3 * 1.17: Malachi 4.5-6 * 1.19: Daniel 8.16; 9.21

²¹ Di madagoaa deela, gei digau dogologo e talitali Zechariah, e gologolo be mee e aha dela e duai mai i lodo.

²² Di madagoaa a mee ne ulu mai gidaha mo di Hale Daumaha, gei mee gu deemee di leelee. Digaula gu iloo hua bolo mee guummada gi di mee i lodo di Hale Daumaha. Gei mee e duu i mua digaula e aau ono lima bolo ia e helekai, gei mee gu deemee di helekai.

²³ Di madagoaa ne lawa ana hegau i lodo di Hale Daumaha, gei Zechariah gaa hana gi dono guongo.

²⁴ Muli mai hua, dono lodo go Elizabeth gu hai dama, gaa noho hua i lodo dono hale i nia malama e lima. ²⁵ Mee ga helekai, “Deenei di hai o Dimaadua ne hagamaamaa au dolomeenei, i dono daa gi daha dogu haga langaadia i baahi nia daangada!”

Di haga iloo di haanau o Jesus

²⁶ Di madagoaa Elizabeth ne hai dama nia malama e ono, gei God ga hagau mai tangada di langi Gabriel gi tama waahale Nazareth i Galilee, ²⁷ gi baahi tama ahina madammaa, dono ingoo go Mary, dela gu hagababa ang gi Joseph, tangada di madawaawa David.* ²⁸ Tangada di langi gaa hana gi baahi o mee, ga helekai, “Mary, di aumaalia gi madalia goe! Dimaadua e noho i do baahi gei e haga maluagina goe!”

²⁹ Mary gu homouli gi nia helekai a maa, gei gu gologolo be nnadinga ana helekai le e hai bolo aha. ³⁰ Tangada di langi ga helekai, “Mary, hudee madagu, idimaa, tu-maalia o God guu honu i do baahi. ³¹ Goe ga hai dama, ga haanau tama daane, gei goe wanga ina dono ingoo go Jesus.* ³² Mee ga aamua, ga haga ingoo bolo *Tama ni di God Aamua Huoloo*. Dimaadua go God ga haga menege aga

* ^{1.27:} Matthew 1.18

* ^{1.31:} Matthew 1.21

a Mee gii hai di king be dono damana go David.* ³³ Mee gaa hai di king ni di hagadili o Jacob, gaa hana hua beelaa, gei dono henua king la hagalee haga odi!”

³⁴ Mary ga helekai gi tangada di langi, “Nia mee aanei e mee di kila aga behe i dogu baahi, i di au di ahina hua e noho madammaa?”

³⁵ Tangada di langi ga helekai, “Di Hagataalunga Dabu ga hanadu gi di goe, gei nia mahi o God Aamua Huuloo ga haga holi goe, deenei tadinga Tama dabuaahia ga haga ingoo bolo *Tama a God*. ³⁶ Maanadu ina do dangada go Elizabeth, dela e dugu go nia daangada bolo di ahina e dee huwa, gei dolomeenei gei mee gu hai dama, guu ono (6) ono malama, gei mee di ahina gu madumadua. ³⁷ Idimaa, deai di mee e deemee di hai go God ai!”*

³⁸ Mary ga helekai, “Au di hege ni Dimaadua. Heia au gii hai be au helekai.” Tangada di langi ga hagatanga gaa hana.

Mary e haga hidihidi gi baahi o Elizabeth

³⁹ Muli hua nia mee aanei, gei Mary ga hagalimalima gaa hana gi tama waahale i tenuta gonduu o Judea.

⁴⁰ Mee ga ulu gi lodo di hale o Zechariah, ga hagaaloho gi Elizabeth. ⁴¹ Di madagoaa Elizabeth ne longono ia Mary ehai dana hagaaloho, gei di tama ilodo o mee gu ngalungalua. Gei Elizabeth guu honu i di Hagataalunga Dabu, ⁴² gaa wolo gi nua, “Mary, goe gu maluagina ibaahi nia ahina huogodoo, ge gu maluagina go di Tama dela ga haanau kooe! ⁴³ Di mee haga goboina deenei e aha dela e hai mai gi di au, tinana o dogu Dagi e hanimoi e haga hidihidi gi dogu baahi? ⁴⁴ Do madagoaa ne hagaaloho mai, gei di tama dela i ogu lodo gu ngalungalua i dono tenetene. ⁴⁵ E maluagina

* 1.32: 2 Samuel 7.12,13,16; Isaiah 9.7 * 1.37: Genesis 18.14

go di ahina dela e hagadonu bolo nia helekai Dimaadua
ga kila aga i dono baahi!”

Taahili hagaamu a Mary
(1 Samuel 2.1-10)

⁴⁶ Mary ga helekai,*

“Dogu manawa e hagaamu Dimaadua.

⁴⁷ Dogu mouli e tenetene gi God,

dogu Dangada Hagamouli,

⁴⁸ i Mee dela ne langahia dana hege dului loo deenei!

Dolomeenei gaa huli gi muli,

nia daangada huogodoo ga haga hagaamu au,*

⁴⁹ mai i nia hagadilinga mee haga goboina

ala ne hai go God Aamua mai gi di au.

Dono ingoo koia e dabuaahia.

⁵⁰ Mee e haga modongoohia dono dumaalia

ang gi digau ala e hagalaamua Ia,

di adu dangada nei mo di adu dangada nei.

⁵¹ Mee ne holo dono lima mogobuna gi daha,

ga hagahuaidu nia hiihai digau huogodoo

ala e hagamuamua.

⁵² Mee ne daa nia king ala e hagamuamua

gi daha mo nadau lohongo,

ga haga mmaanega aga digau lligi.*

⁵³ Mee ne haga maaluu digau ala e hiigai

gi nia meegai humalia,

ga hagau gi daha digau maluagina

gii hula nadau mee e kae ai.

⁵⁴ Mee e dadaahi dana hagababa

ang gi tadau maadua mmaadua,

ne hanimoi belee hagamaamaa dana hege go Israel.

* 1.46: 1 Samuel 2.1-10 * 1.48: 1 Samuel 1.11 * 1.52: Job 5.11; 12.19

⁵⁵ Mee e langahia dono dumaalia ne hai ang gi Abraham mo ono hagadili huogodoo gaa hana hua beelaa.”*

⁵⁶ Mary nogo noho i baahi Elizabeth nia malama e dolu. Nomuli, gei mee gaa hana gi dono hale.

Di haanau o John Babdais

⁵⁷ Guu dae mai di madagoaa Elizabeth e haanau ai, gei mee ga haanau dana dama daane. ⁵⁸ Digau ala i baahi o mee mo ono gau gu longono tumaalia o Dimaadua ang gi mee, gei digaula huogodoo gu tenetene huoloo madalia a mee.

⁵⁹ Nia laangi e walu i muli di haanau di tama, gei digaula ga lloomoi belee sirkumsais di tama, ge wanga di ingoo o maa bolo Zechariah, e haga ingoo gi dono damana.*

⁶⁰ Tinana o maa ga helekai gi digaula, “Deeai, di ingoo o maa go John.”

⁶¹ Digaula ga helekai gi mee, “E hai behe? John la hagalee di ingoo dahi dangada i lodo oo gau.” ⁶² Digaula ga aau nadau lima gi tamana o tama, dehee di ingoo dela e hiihai ginai eia e haga ingoo di tama.

⁶³ Zechariah ga aau ono lima gi gaamai di lau beebaa, gaa hihi, “Di ingoo o maa go John.” Gei digaula huogodoo gu goboina huoloo. ⁶⁴ Di madagoaa hua deela, gei Zechariah guu mee di leelee labelaa, geia ga daamada ga hagaamu a God. ⁶⁵ Digau o di gowaa deela huogodoo gu uli nadau gai huoloo, gei nia longo o nia mee aanei guu dele gi nia madagowaa huogodoo i hongo tenua gonduu o Judea. ⁶⁶ Digau huogodoo ala ne longono nia mee aanei gu hagabaubau mo di heheeu be di tama deenei la gaa hai dana aha? Idimaa, gu modongoohia bolo nia mogobuna o Dimaadua la gu i baahi di tama deenei.

* 1.55: Genesis 17.7 * 1.59: Leviticus 12.3

Nnelekai kokohp Zechariah

⁶⁷ Zechariah tamana o John guu honu i di Hagataalunga Dabu, ga hagi aga nnelekai a God:

⁶⁸ “Gidaadou e hagaamu Dimaadua, di God o Israel!

Mee gu hanimoi belee hagamaamaa ana dama, ge e haga dagaloaha digaula.

⁶⁹ Mee ne dugu mai gi gidaadou

Tangada Daa Hagamouli aamua o di hagdili David, go dana dangada hai hegau.

⁷⁰ Mee gu hagababa ang gi ana soukohp dabuaahia namua,

⁷¹ bolo Ia gaa daa gidaadou gi daha mo tadau hagadaumee, mo nia mahi o digau ala e de hiihai mai gi gidaadou.

⁷² Mee gu helekai bolo Ia ga dumaalia ang gi tadau maadua mmaadua, ge e langahia dana hagababa dabu.

⁷³⁻⁷⁴ Mee guu hai dana hagamodu gi tadau damana go Abraham,

gei gu hagababa bolo Ia e daa mai gidaadou

gi daha mo tadau hagadaumee,

ge e dumaalia mai gi gidaadou

gi hai hegau ang gi de Ia i tee madagu,

⁷⁵ bolo gi dabuaahia gidaadou,

gei gii donu i ono mua i nia laangi huogodoo

i di waalooloo o tadau mouli.

⁷⁶ Goe go dagu dama ga haga ingoo bolo

di soukohp ni God Aamua Huoloo,

idimaa, goe gaa hana i mua Dimaadua,

e hagatogomaalia dono ala,*

⁷⁷ bolo goe gi agoago gi ana daangada

di hai dela e mouli ai digaula,

mai tumaalia o nadau huaidu.

* 1.76: Malachi 3.1

⁷⁸ Tadau God le e manawa dumaalia ge e humalia.
Mee e haga maalama gidaadou gi di maalama haga mouli.

⁷⁹ E ina digau huogodoo
ala e noho i lodo di malu bouli o di made
gi di maalama mai di langi,
e dagi gidaadou i lodo di ala o di aumaalia.”*

⁸⁰ Di tama deela guu tomo aga dono mouli mo dono
hagataalunga. Geia e noho i lodo di anggowaa gaa dae loo
gi dono haga gida ia gi digau Israel.

2

Di haanau o Jesus (Matthew 1.18-25)

¹ Di madagoaa deela, gei di king Caesar Augustus ne dugu dana haganoho bolo nia daangada huogodoo dono henua le e hihi nadau ingoo. ² Deenei di hihi dangada matagidagi i di madagoaa Quirinius nogo hai di gobinaa o Syria. ³ Digau huogodoo gu haga mmaanega gi nadau gowaa donu, bolo gii hihi nadau ingoo.

⁴ Joseph, tangada di hagadili o David, gu hagatanga i di waahale Nazareth i Galilee, gaa hana gi Bethlehem, di waahale o David i lodo Judea, ⁵ bolo gii dau ia e hihi ngaadahi mo Mary dela belee lodo gineia. Mary gu hai dama i di madagoaa deela. ⁶ Di madagoaa meemaa e noho i Bethlehem, gei Mary guu dae gi dono madagoaa e haanau ai, ⁷ gei mee ga haanau dana dama daane madua, gaa hii a Mee gi di gahu hii dama, gaa dugu gi lodo di mee haangai manu, idimaa, di hale noho dangada la gu deeo.

Digau hagaloohi siibi mo digau di langi

⁸ Digau hagaloohi siibi nogo hagaloohi nadau siibi i di boo i lodo henua.

* 1.79: Isaiah 9.2



⁹ Tangada di langi Dimaadua ga haga gida ia gi digaula, gei di maahina o Dimaadua ga ina digaula. Digaula gu uli nadau gai huoloo. ¹⁰ Gei tangada di langi ga helekai gi digaula, “Goodou hudee mmaadagu, au e gowadu gi goodou di Longo Humalia e haga tenetene ai digau huogodoo. ¹¹ Idimaa, Tangada Hagamouli gu haanau adu gi goodou boo nei i lodo di waahale o David. Mee go Christ go Tagi! ¹² Deenei dono haga modongoohia: Goodou ga gidee di tama dulii e hii gi di gahu hii dama e moe i lodo di mee haangai manu.”

¹³ Di madagoaa hua deela, digau di langi dogologowaahae ga lloomoi gi baahi tangada di langi deela, ga haga hagaamu a God, ga daahili:

¹⁴ “Hagaamuina God i di langi i nua loo, gei di aumaalia i henuailala ang gi digau ala e manawa lamalia ginai Mee!”

¹⁵ Di madagoaa digau di langi ne hagatanga, gaa hula gi di langi, gei digau hagaloohi siibi aalaa ga helehelekai i nadau mehanga, “Gidaadou gaa hula gi Bethlehem, gi gidee gidaadou di mee dela ne hai, dela ne hagi mai go Dimaadua.”

¹⁶ Digaula ga limalima gaa hula, ga gidee Mary mo Joseph, mo tama dulii e moe i lodo di mee haangai manu.

¹⁷ Digau hagaloohi siibi ne gidee ginaadou di tama dulii deela, gei digaula ga hagamodongoohia gi Joseph mo Mary nia helekai a tangada di langi ala ne hai ang gi ginaadou i di hai o tama dulii deela. ¹⁸ Digau huogodoo ala ne longono nia helekai digau hagaloohi siibi, la gu goboina huoloo. ¹⁹ Mary ga langahia nia mee huogodoo, ga mamaanadu hua i ono lodo. ²⁰ Digau hagaloohi siibi gaa hula gi muli, e dadaahili hagaamu a God i nia mee huogodoo ala ne longono ginaadou, gei guu mmada ginai, guu kila be nnelekai tangada di langi ala ne helekai ai.

Di wanga di ingoo Jesus

²¹ Muli nia laangi e walu, gei di tama gu sirkumsais, gei digaula gaa gahi di ingoo o Maa bolo Jesus, gii hai be di ingoo tangada di langi dela ne hagaingoo a Mee i mua, gei Mary digi hai dama.*

Di hagamabu Jesus

²² I muli di nau haga madammaa be di hai Nnaganoho Moses, gei Joseph mo Mary gaa lahi di tama gi Jerusalem belee hagamabu ang gi Dimaadua,* ²³ gadoo be nnelekai ala ne hihi i lodo Nnaganoho Dimaadua, “Nia ulu mmaadua daane huogodoo le e hagamabu ang gi Dimaadua.”*

* 2.21: Leviticus 12.3; Luke 1.31
Exodus 13.2,12

* 2.22: Leviticus 12.6-8

* 2.23:

²⁴ Gei meemaa guu kae labelaa nau mee e tigidaumaha gii hai be di mee dela gu haganoho mai baahi Dimaadua, “Nia mwuroi e lua be nia damaa manu ‘pigeon’ e lua.”

²⁵ Di madagoaa deela, gei taane dono ingoo go Simeon e noho i Jerusalem. Mee tangada hai mee donu, ge e hagalaamua a God, nogo talitali di haga mouli o Israel, gei di Hagataalunga Dabu gu i dono baahi. ²⁶ Di Hagataalunga Dabu la gu haga donu gi mee bolo mee hagalee made i mua dono gidee ia di Mesaia dela ne hagababa go Dimaadua. ²⁷ Go di Hagataalunga hua deela ne dagi a mee gi di Hale Daumaha. Di madagoaa tamana mo tinana o Jesus ne laha mai a Mee gi lodo di Hale Daumaha gii hai be nnelekai o Nnaganoho, ²⁸ Simeon gaa daa di tama, ga daahi, ga danggee ang gi God boloo,

²⁹ “Meenei Dimaadua, dolomeenei Goe gu daahi dau hagababa, gei Goe guu mee hua di dugu anga dau hege gii hana i di aumaalia.

³⁰ Au guu mmada donu gi ogu golomada gi dau haga mouli,

³¹ dela gu hagatogomaalia Kooe i mua nia daangada huogodoo.

³² Di maalama e haga modongoohia do hiihai gi digau tuadimee,

ge e gaamai do madamada gi au dama Israel.”*

³³ Tamana mo tinana o tama gu goboina inia helekai a Simeon ala nogo helekai i Mee. ³⁴ Simeon ga haga maluagina meemaa, ga helekai gi Mary, go tinana o Tama, “Tama deenei ne hilihili go God belee hagahuaidu gei e haga mouli digau dogologo o Israel. Mee gaa hai di haga modongoohia mai baahi

* 2.32: Isaiah 42.6; 49.6; 52.10

o God dela ga helekai hai baahi ginai digau dogologo,
³⁵ ga haga modongoohia aga nadau maanadu hagammuni.
 Di manawagee le e hai gadoo be tulumanu dauwa
 ma ga daalo do hadu manawa.”

³⁶ Soukohp ahina Anna, tama ahina a Phanuel, tan-
 gada di madawaawa Asher nogo igolo. Mee di ahina
 gu madumadua, ne hai dono lodo i lodo nia ngadau e hidu.
³⁷ Muli di made dono lodo, gei mee nogo noho hua dono
 dina. Mee gu huowalu maa haa (84) ono ngadau, gei
 mee digi hagatanga gi daha mo di Hale Daumaha. Boo
 mo aa, e daumaha ang gi God, e noho hagaonge mo di
 hai dalodalo. ³⁸ Di aawaa hua deela, gei mee gaa dau,
 ga danggee ang gi God, mo di helekai i di Tama ang gi
 digau huogodoo ala e tali gi God bolo gi haga mehede ina
 Jerusalem.

Hula gi Nazareth

³⁹ Meemaa gaa lawa loo i di nau hai nia hegau gii hai be
 Nnaganoho Dimaadua, meemaa gaa hula gi muli gi Galilee
 gi di nau guongo go Nazareth.* ⁴⁰ Di tama ne madua aga
 gu maaloo, guu honu i di kabemee, gei tumaalia dehuia a
 God gu madalia a Mee.

Tama Daane go Jesus i lodo di Hale Daumaha

⁴¹ Nia ngadau huogodoo nia maadua Jesus e hulahula
 gi Tagamiami Pasoobaa i Jerusalem.* ⁴² Jesus
 gu madangholu maa lua ono ngadau, gei digaula
 gaa hula gi Tagamiami deela, be nadau hai nogo
 hulahula. ⁴³ I muli Tagamiami ne lawa, gei digaula
 gaa hula gi nadau guongo, gei tama daane go Jesus
 guu noho hua i Jerusalem, gei nia maadua o Maa digi iloo.
⁴⁴ Meemaa e hagabau bolo Mee i lodo digau dogologo
 ala e hula, gei meemaa gaa hula i di laangi dogomaalia,

* 2.39: Matthew 2.23 * 2.41: Exodus 12.1-27; Deuteronomy 16.1-8

ga daamada ga halahala a Mee gi baahi nau gau mo nau ihoo. ⁴⁵ Meemaa digi gidee a Mee, gaa hula gi muli gi Jerusalem, e halahala a Mee. ⁴⁶ I muli nia laangi e dolu, meemaa ga gidee a Mee i lodo di Hale Daumaha, e noho i baahi digau agoago o Jew, e hagalongolongo gi nia helekai digaula mo di heheeu ana mee. ⁴⁷ Digau huogodoo ne longono nia helekai kabemee a Maa ne helekai gi nia heeu digaula, digaula gu goboina huoloo. ⁴⁸ Nia maadua o Maa gu goboina di nau gidee a Mee, gei tinana o Maa ga helekai, “Dagu dama daane, ma di aha ne hai Kooe? Gimaua gu uli mau gai i di mau halahala Goel!”

⁴⁹ Jesus ga helekai, “Goolua e halahala Au eiaha? Goolua e de iloo bolo Au belee hai loo gii noho i lodo di hale o dogu Damana?” ⁵⁰ Meemaa digi modongoohia nnelekai a Maa.

⁵¹ Jesus gaa hana i muli meemaa gi Nazareth, di gowaa nogo hagalongo iei Mee gi meemaa. Tinana o Maa e daahi hagahumalia nia mee huogodoo aanei i ono lodo. ⁵² Jesus gu tomo aga dono huaidina mo dono iloo mee, gu hiihai ginai a God mo nia daangada.*

3

Di agoago John Babdais

(Matthew 3.1-12; Mark 1.1-8; John 1.19-28)

¹ Di madangaholu maa lima ngadau o Caesar Tiberius nogo dagi, Pontius Pilate nogo gobinaa i Judea, gei Herod nogo dagi Galilee, dono duaahina go Philip nogo dagi Iturea mo Trachonitis, Lysanias nogo dagi a Abilene, ² gei Annas mo Caiaphas la nia dagi aamua hai mee dabu. Deenei di madagoaa nia helekai a God ne dau i John, go tama Zechariah, i lodo di anggowaa. ³ Gei John gaa hana laa lodo di guongo dela iai di monowai Jordan, ga agoago, “Huli gi daha mo godou haihai huaidu ge gi babdais, gei

* 2.52: 1 Samuel 2.26; Agoago Podo 3.4

God ga dumaalia adu gi godou huaidu!”⁴ Gadoo be di mee dela guu hihi i lodo di beebaa soukohp Isaiah, “Tangada e wolowolo i lodo di anggowaa, boloo, ‘Haga adee ina di ala o Dimaadua gi togomaalia, haga huudonu ina di ala e hana iei Mee.*

⁵ Nia gowaa bogobogo la gi haawa gii honu, nia gonduu llauehe mono gonduu lligi la gi hagabapaba ina.

Nia ala pigapiga la gi haga huudonu ina, gei nia ala dungadungaa gi heia gi malallali.

⁶ Nia daangada huogodoo ga gidee di Hagamouli a God!’ ”

⁷ Nia daangada dogologo ne lloomoi gi John belee babdais. Gei mee ga helekai, “Goodou e hai be nia gihaa! Ma koai ne helekai bolo goodou e mee di llele gi daha mo di hagawelewele o God dela ga dau mai?”⁸ Heia nia mee ala e haga modongoohia bolo goodou guu huli gi daha mo godou huaidu, gei hudee daamada e helehelekai boloo, ‘Tadau damana la go Abraham.’ Au e hagi adu gi goodou bolo God le e mee hua di huli nia hadugalaa aanei gii hai nia dama ni Abraham!”⁹ Talai gu togomaalia belee hele gi daha nia laagau ala hagalee huwa humalia, e dudu.”*

¹⁰ Nia daangada ga heeu gi John, “Gimaadou gaa hai di madau aha?”

¹¹ Gei mee ga helekai, “Be koai hua e lua ono gahu, geia gi wanga ina di gahu e dahi gi tangada dela dono gahu ai. Koai ana meegai i golo, geia gi haga lohohoho ngaadahi gi digau ala e hiigai.”

¹² Hunu gau hagabudu dagitedi ne lloomoi belee babdais, ga heeu gi mee, “Tangada agoago, gimaadou e hai di madau aha?”*

* 3.4: Isaiah 40.3-5

* 3.7: Matthew 12.34; 23.33

* 3.8: John 8.33

* 3.9: Matthew 7.19

* 3.12: Luke 7.29

¹³ Mee ga helekai, “Hudee hagabudu mee laa hongo godou mee ala e donu belee hagabudu.”

¹⁴ Hunu gau dauwa ga heeu gi mee, “Gei gimaadou e hai di madau aha?”

Mee ga helekai, “Hudee kaina nia bahihadu nia daangada, be e hagahuaidu tangada i di kai tilikai. Gii dohu hua gi godou hui donu.”

¹⁵ Nia daangada gu iai nadau hagadagadagagee e hidihidi be John la go di Mesaia. ¹⁶ Gei John ga helekai gi digaula huogodoo, “Au e babdais goodou gi nia wai, gei Tangada dela koia e aamua i di au, le e hanimoi i golo. Au e dee tau loo bolo e wwede nia uga o nia suudi o maa. Mee ga babdais goodou gi di Hagataalunga Dabu mo di ahi. ¹⁷ Mee dana daawolo hili mee, e wanga nia lii palaawaa gi lodo di hale benebene mee, gei nia gili gaa kili gi lodo di ahi e deemee di made.”

¹⁸ Nia ala kai e logo nogo agoago ai a John gi nia daangada i di Longo Humalia bolo gii huli nadau hangahaihai.

¹⁹ John nogo helekai hai baahi gi gobinaa Herod, idimaa Herod ne hai dono lodo gi Herodias, di lodo dono du-aahina daane, guu hai labelaa ana mee huaidu e logo.*

²⁰ Gei Herod gaa hai dana hai koia e huaidu, gaa hudu a John gi lodo di hale galabudi.

Di babdais o Jesus

(Matthew 3.13-17; Mark 1.9-11)

²¹ Muli hua nia daangada huogodoo ne babdais go John, gei Jesus gu babdais labelaa. Dono madagoaa nogo dalodalo, gei di langi gu mahuge, ²² di Hagataalunga Dabu ga hanea gi hongo o Mee, e dina gi di mwuroi. Gei di lee ga hanea i di langi, “Goe go dagu Dama donu hagalabagau. Au e manawa lamalia adu gi di Goe.”*

* 3.19: Matthew 14.3-4; Mark 6.17-18 * 3.22: Genesis 22.2; Pisalem 2.7; Isaiah 42.1; Matthew 3.17; Mark 1.11; Luke 9.35

*Nia maadua mmaadua o Jesus
(Matthew 1.1-17)*

²³ Di madagoaa Jesus ne daamada ana hegau, gei mee gu motolu ono ngadau. Nia daangada e hai bolo Mee tama ni Joseph, go tama daane Heli, ²⁴ Heli go tama daane a Matthat, Matthat go tama daane Levi, Levi go tama daane a Melchi, Melchi go tama daane a Jannai, Jannai go tama daane a Joseph, ²⁵ Joseph go tama daane a Mattathias, Mattathias go tama daane a Amos, Amos go tama daane Nahum, Nahum go tama daane a Esli, Esli go tama daane a Naggai, ²⁶ Naggai go tama daane a Maath, Maath go tama daane a Mattathias, Mattathias go tama daane a Semein, Semein go tama daane a Sosek, Sosek go tama daane a Soda, ²⁷ Soda go tama daane a Joanan, Joanan go tama daane a Rhesa, Rhesa go tama daane a Zerubbabel, Zerubbabel go tama daane a Shealtiel, Shealtiel go tama daane a Neri, ²⁸ Neri go tama daane a Melchi, Melchi go tama daane a Addi, Addi go tama daane a Cosam, Cosam go tama daane a Elmadam, Elmadam go tama daane a Er, ²⁹ Er go tama daane a Joshua, Joshua go tama daane a Eliezer, Eliezer go tama daane a Jorim, Jorim go tama daane a Matthat, Matthat go tama daane a Levi, ³⁰ Levi go tama daane a Simeon, Simeon go tama daane a Judah, Judah go tama daane a Joseph, Joseph go tama daane a Jonam, Jonam go tama daane a Eliakim, ³¹ Eliakim go tama daane a Melea, Melea go tama daane a Menna, Menna go tama daane a Mattatha, Mattatha go tama daane a Nathan, Nathan go tama daane a David, ³² David go tama daane a Jesse, Jesse go tama daane a Obed, Obed go tama daane a Boaz, Boaz go tama daane a Salmon, Salmon go tama daane a Nahshon, ³³ Nahshon go tama daane a Amminadab, Amminadab go tama daane a Admin, Admin go tama daane a

Arni, Arni go tama daane a Hezron, Hezron go tama daane a Perez, Perez go tama daane a Judah, ³⁴ Judah go tama daane a Jacob, Jacob go tama daane a Isaac, Isaac go tama daane a Abraham, Abraham go tama daane a Terah, Terah go tama daane a Nahor, ³⁵ Nahor go tama daane a Serug, Serug go tama daane a Reu, Reu go tama daane a Peleg, Peleg go tama daane a Eber, Eber go tama daane a Shelah, ³⁶ Shelah go tama daane a Cainan, Cainan go tama daane a Arphaxad, Arphaxad go tama daane a Shem, Shem go tama daane a Noah, Noah go tama daane a Lamech, ³⁷ Lamech go tama daane a Methuselah, Methuselah go tama daane a Enoch, Enoch go tama daane a Jared, Jared go tama daane a Mahalaleel, Mahalaleel go tama daane a Cainan, ³⁸ Cainan go tama daane a Enosh, Enosh go tama daane a Seth, Seth go tama daane a Adam, Adam go tama daane a God.

4

Di hagamada o Jesus

(Matthew 4.1-11; Mark 1.12,13)

¹ Jesus ga hagatanga i Jordan, geia guu honu i di Hagataalunga Dabu dela ne lahi a Mee gi lodo di anggowaa.

² Gei Mee gaa noho ilodo di anggowaa inia laangi e madahaa, ga hagamada go Setan. I lodo nia laangi aalaa, gei Mee digi miami, gu hiigai huuloo.

³ Setan ga helekai gi Mee, “Maa Goe di Tama ni God, helekai gi di hadugalaa deenei gii hai di palaawaa.”

⁴ Jesus ga helekai, “Ma guu lawa di hihi i lodo di Bee-baa Dabu boloo, ‘Ma hagalee go nia palaawaa la hua ala e mee di haga mouli tangada.’ ”*

* 4.4: Deuteronomy 8.3

⁵ Setan gaa lahi labelaa a Mee gi di gowaa nnoonua, ga haga mmada a Mee gi nia henua huogodoo i henuailala i tama madagoaa bodobodo, ⁶ ga helekai gi mee, “Au ga gowadu gi di Goe nia mogobuna mahi huogodoo aanei mo nia maluagina huogodoo. Huogodoo gu dugu mai gi di au, gei au e mee hua di wanga nia maa gi tangada dela e hiihai ginai au. ⁷ Nia mee aanei huogodoo ga gowadu gi di Goe, maa Goe ga daumaha mai.”

⁸ Jesus ga helekai, “Ma guu lawa di hihi i lodo di Bee-baa Dabu boloo, ‘Daumaha ang gi Dimaadua go doo God, go Mee hua dela e hai hegau ginai goe!’ ”*

⁹ Setan gaa lahi labelaa a Mee gi Jerusalem, gaa dugu a Mee gi hongo tahuu o di Hale Daumaha, ga helekai gi Mee, “Maa goe di Tama ni God, hobo ia gi daha mo di gowaa deenaa. ¹⁰ Idimaa, ma guu lawa di hihi i lodo di Beebaa Dabu boloo, ‘God ga helekai gi ana gau di langi gi benabena ina Goe gi humalia.’”*

¹¹ “Guu hai labelaa boloo, ‘Digaula gaa kumi laa Goe gi dee tale oo wae gi nia hadu.’ ”*

¹² Jesus ga helekai, “Ma guu lawa di hihi boloo, ‘Goe hudee hagamada ina Dimaadua, go doo God.’ ”*

¹³ Di madagoaa Setan ne lawa di hagamadamada Jesus, gei mee ga hagatanga gi daha mo Mee i tama madagoaa bodobodo.

*Jesus e daamada ana hegau i Galilee
(Matthew 4.12-17; Mark 1.14-15)*

* 4.8: Deuteronomy 6.13 * 4.10: Pisalem 91.11 * 4.11: Pisalem 91.12

* 4.12: Deuteronomy 6.16

¹⁴ Jesus gu maaloo mai i di Hagataalunga Dabu, ge Ia gaa hana gi muli gi Galilee. Dono longo guudele i nia madagowaa huogodoo ala igolo. ¹⁵ Gei Mee e hai ana agoago i lodo nia synagooee digaula, huogodoo gu haga hagaamu a Mee.

Jesus hagalee hagabalagau i baahi digau Nazareth

(Matthew 13.53-58; Mark 6.1-6)

¹⁶ Jesus gaa hana gi Nazareth, di gowaa dela ne tomo aga ieia, ga ulu gi lodo synagooee i di Laangi Sabad be dana hai nogo haihai. Gei Mee ga duu aga belee dau dana Beebaa Dabu. ¹⁷ Gei digaula ga gaamai di beebaa soukohp Isaiah gi Mee, ge Ia gaa huge di beebaa deela, gaa dau di gowaa dela e hihi boloo,

¹⁸ “Di Hagataalunga o Dimaadua la gu i dogu baahi.

Mee gu hagatulu Au gi agoago ina di Longo Humalia ang gi digau hagaloale.

Mee ne hagau mai Au gi hagadele ina gi digau ala e lawalawa gi maahede, mo digau ala e dee gida gi gidee, gi haga maahede ina digau

ala e noho i lodo di haingadaa,*

¹⁹ gi hagadele ina bolo di madagoaa gu dae mai, go di madagoaa Dimaadua e haga dagaloaha ana daan-gada.”

²⁰ Jesus gaa wini di beebaa deela, gaa wanga gi tangada hai hegau, gaa noho gi hongo dono lohongo. Huogodoo ala i lodo synagooee, e daumada a Mee, ²¹ gei Mee ga daamada ga helekai, “Digau nei, dangi nei nia helekai di Beebaa Dabu ala gu longono goodou, la gu kila aga i tatau baahi!”

²² Digaula huogodoo guutene gi Mee huoloo, gei gu goboina i nia helekai humalia aalaa, ala ne loomoi

* 4.18: Isaiah 61.1-2

i baahi o Mee. Digaula ga helekai, “Mee hagalee go tama daane Joseph?”

²³ Jesus ga helekai gi digaula, “Au e iloo bolo goodou ga helekai nia helekai podo mai gi di Au boloo, ‘Togidaa, hagahili ina goe!’ Gei goodou ga helekai mai labelaa boloo, ‘Gi heia i lodo do guongo donu nia mee haga goboina ala ne longono ai gimaadou bolo ne hai Kooe i Capernaum.’” ²⁴ Gei Mee ga duudagi adu hua, ga helekai, “Goodou gi iloo, bolo ma soukohp e hagabalagau i lodo dono guongo donu ai.*

²⁵ “E donu bolo nia ahina guu mmade nadau lodo e dogologowaahee i Israel i di madagoaa soukohp Elijah, i di madagoaa di uwa digi doo i lodo nia ngadau e dolu mo di baahi, mo tau magamaga damana guu gahu tenea deela.* ²⁶ Gei Elijah digi hagau ina gi dahi dangada i lodo Israel, gei ne hagau hua gi di ahina tuadimee gu made dono lodo dela e noho i Zarephath i lodo tenea go Sidon.*

²⁷ Gadoo be di madagoaa soukohp Elisha, nogo iai di magi genegene i Israel, gei deai tangada i digaula ne hili ga madammaa ai, dela hua go Naaman, tangada o Syria.”*

²⁸ Digau huogodoo nogo i lodo synagooee gu hagawelewele huoloo i di nadau longono nia helekai aanei. ²⁹ Digaula gaa lahi a Jesus gi daha mo di waahale gi tomo di gonduu dela ne hau ai di nadau waahale, belee bale a Mee gii doo gi di gowaa helemodu. ³⁰ Gei Jesus gaa hana laa lodo digaula, gaa hana gi daha mo digaula.

Taane iai di hagataalunga huaidu

(Mark 1.21-28)

³¹ Nomuli, Jesus gaa hana gi Capernaum, di waahale i Galilee, ga agoago gi nia daangada i di Laangi Sabad. ³² Nia

* 4.24: John 4.44 * 4.25: 1 Kings 17.1 * 4.26: 1 Kings 17.8-16 * 4.27: 2 Kings 5.1-14

daangada huogodoo gu goboina i nia agoago a Maa, i Mee e agoago i di mogobuna.* ³³ Taane i lodo synagooee, iai di hagataalunga huaidu i ono lodo, mee gaa wolo gi nua, ³⁴ “Jesus o Nazareth, ma di aha e hiihai ginai Goe i gi-maadou? Goe ne hanimoi belee hagahuaidu gimaadou? Aahaa, au e iloo eau Goe tangada dabuaahia kae hegau a God!”

³⁵ Jesus ga hagabuhi gi di hagataalunga huaidu, “Noho dee muu, ulu mai gi daha mo taane deenaa!”

Gei di hagataalunga huaidu ga hagahinga taane gi lala i mua digaula, ga ulu gi daha mo mee ge digi hai dana huaidu gi mee.

³⁶ Nia daangada huogodoo gu goboina ga helehelekai, “Ma nia helekai aha aanei? Mee e mogobuna di helekai gi nia hagataalunga huaidu, gei digaula e ulu mai gi daha!”

³⁷ Di longo o Jesus guu dele i nia madagowaa huogodoo i lodo tenua deela.

Jesus e hagahili ana gau dogologo

(Matthew 8.14-17; Mark 1.29-34)

³⁸ Jesus ga hagatanga gi daha mo synagooee, gaa hana gi di hale o Simon. Tinana di lodo Simon e magi welengina huuloo. Digaula ga helekai gi Jesus i di ahina deela.

³⁹ Jesus ga menege adu gi mee, ga helekai gi di magi welengina gi ulu mai gi daha. Di magi welengina gu ulu mai gi daha, mee ga ala aga, ga nnoo i nua, ga hagamaamaa digaula.

⁴⁰ Hiahi ia di mee, digau huogodoo ala nadau ihoo magi i nia hagadilinga magi e logo, ga laha mai digaula gi Jesus. Mee gaa dugu ono lima gi hongo digaula huogodoo, e hagadau dagidahi, ga hagahili digaula. ⁴¹ Nia hagataalunga huaidu ala e ulu gi daha mo digau dogologo e wwolowwolo, “Goe go Tama a God!”

Jesus gu bule digaula, digi dumaalia gi digaula gi helekai, i digaula gu iloo bolo Mee go di Mesaia.

* 4.32: Matthew 7.28-29

Jesus e agoago i lodo synagooee

(Mark 1.35-39)

⁴² Hooaga haga luada loo, Jesus gaa hana gi daha mo di waahale gi di gowaa lomo modogoia. Gei nia daangada ga daamada ga halahala a Mee, ga gidee a Mee, ga tangi gi Mee bolo gi hudee hagatanga gi daha mo ginaadou. ⁴³ Mee ga helekai gi digaula, “Au e hai loo gi agoago di Longo Humalia o Teenua King o God gi nia waahale labelaa ala i golo, idimaa, deela di mee a God ne hagau mai ginai Au belee hai.”

⁴⁴ Mee ga agoago i lodo nia synagooee i lodo tenua hagatau deela.

5

Jesus e gahi ana dama agoago matagidagi

(Matthew 4.18-22; Mark 1.16-20)

¹ Dahi laangi hua Jesus nogo duu i taalanga Tai Genesaret, nia daangada nogo honohono ginaadou i nadau lloo adu gi Jesus belee hagalongo gi nia helekai a God.* ² Mee ga gidee nia boodi e lua e haga pale aga i tongotai. Digau hai iga guu hula gu gaugau nadau kau.

* 5.1: Matthew 13.1-2; Mark 3.9-10; 4.1



³ Jesus gaa gaga gi hongo di boodi a Simon, ga helekai gi mee gi hologia dului gi daha mo tongotai. Jesus gaa noho i hongo di boodi, ga agoago gi digau dogologo aalaa.

⁴ Mee ga haga lawa ana agoago, ga helekai gi Simon, “Hologia di boodi gi di gowaa honu, dugu ina gi lala nia kau gubenge.”

⁵ Simon ga helekai, “Meenei Tagi, gimaua gu gubenge mai loo boo, gu duadua, gei digi kumi mau iga. Gei Goe bolo gi dugua nia kau, au gaa dugu laa nia kau.”*

⁶ Meemaa gaa dugu nia kau gi lala, gu bulou nau iga logowaahē. Nia kau la bolo ga mahaahaa.* ⁷ Gei meemaa ga lialiagi gi di nau ihoo boodi gi lloomoi e hagamaamaa ginaua. Digaula ga lloomoi, gaa haa nadau boodi e lua gu hontula bolo ga abulu. ⁸ Simon Peter ne mmada gi nia mee ala ne hai beenei, gei mee ga dogoduli gi lala i mua o Jesus, ga helekai, “Meenei Tagi, hana gi daha mo au! Au

* 5.5: John 21.3 * 5.6: John 21.6

tangada huaidu!”

⁹ Mee mo ono ehoo gu goboina tagabae iga ala ne kumi go ginaadou. ¹⁰ Nia hoo Simon, James mo John go nia dama daane Zebedee, la gu goboina labelaa ginaua. Jesus ga helekai gi Simon, “Goe hudee madagu, tugi dolomeenei gaa hana, gei goe ga haangodo gi nia daangada.”

¹¹ Digaula ga hudi aga nia boodi gi tongotai, ga diiagi nia mee huogodoo, ga daudali a Jesus.

Jesus e hagahili taane magi genegene

(Matthew 8.1-4; Mark 1.40-45)

¹² Nomuli, gei Jesus nogo i lodo di waahale dela nogo iai taane e hai dono magi genegene. Taane deelaa ne mmada gi Jesus, ga bala gi lala ga dangidangi, “Meenei, maa Goe e hiihai, heia au gi madammaa!”*

¹³ Jesus ga hagadau dae adu, gaa bili gi mee, ga helekai, “Uaa, Au e hiihai. Madammaa!” Di madagoaa hua deelaa, gei di magi genegene guu hili. ¹⁴ Jesus gaa bule gi mee, “Hudee hagi anga ina di mee deenei gi tei dangada, hana haga huudonu gi tangada hai mee dabu, gi haga dina ina goe, gaa lawa, heia dau tigidaumaha dela gu haganoho go Moses, bolo e hai di haga modongoohia gi digaula bolo goe gu madammaa.”*

¹⁵ Di longo o Jesus guudele labelaa koia gi nonua, gu modoho gi daha, gei digau dogologo ne loomoi belee hagalongo gi Mee, ge e hagahili nadau magi. ¹⁶ Gei Mee gaa hana gi di gowaa lomo e dalodalo.

Jesus e hagahili taane mmade ono dudaginga

(Matthew 9.1-8; Mark 2.1-12)

¹⁷ Dahi laangi hua, Jesus nogo agoago, gei nia Pharisee mono gau haga donudonu haganoho e noho i golo.

* 5.12: heia au gi madammaa: Digau o Jew e hai bolo di magi deenei le e haga dogolia dangada. * 5.14: Leviticus 14.1-32

Digaula ne lloomoi mai nia waahale huogodoo Galilee, Judea, mo mai Jerusalem. Di mogobuna o Dimaadua gu i baahi o Jesus e hagahili nia magi. ¹⁸ Hunu daane ne lloomoi e aamo mai di nadau daane mmade ono wae i hongo di hada. Digaula e hagamaha belee laha mai taane deenei gi mua o Jesus i lodo di hale. ¹⁹ Idimaa gu dogologowaahee, gu deeo di lahi a mee gi lodo, gei digaula gaa lahi a mee gi tuatala o di hale, ga haga bongoo di gowaa e haga hege ia a mee i hongo dono moenge gi lodo digau dogologo i mua o Jesus. ²⁰ Jesus ga gidee la nia hagadonu digaula, Mee ga helekai gi taane deela, “Dogu ihoo hagaaloho, o huaidu gu maahede.”

²¹ Digau hagadonudonu haganoho mo nia Pharisee ga daamada ga helehelekai i nadau mehanga, “Taane deenei la koai, dela e helekai hai baahi gi God? Tangada e mee di wwede nia huaidu ai, dela hua go God modogoia!”

²² Jesus gu iloo nia maanadu digaula, ga helekai, “Goodou e aha ala e hagabaubau beenaa? ²³ Dehee di mee e haingoohia belee helekai boloo, ‘O huaidu la gu maahede,’ be e helekai boloo, ‘Duu i nua, haele?’ ²⁴ Au ga haga modongoohia adu gi goodou bolo Tama Tangada le e mogobuna i henuailala, e mee di wwede nia huaidu.”

Gei mee ga helekai gi tangada mmade ono wae, “Au e helekai adu gi duu i nua, dahi aga ina do moenge, hana gi doo hale.”

²⁵ Di madagoaa hua deela, gei taane ga duu i nua i mua digaula huogodoo, ga dahi aga dono moenge, gaa hana gi dono hale mo di hagaamu a God. ²⁶ Digaula gu goboina, gu mmaadagu, gu hagaamu a God, ga helekai, “Gidaadou guu mmada gi nia mee haga goboina dangi nei!”

Jesus e gahi a Levi
(Matthew 9.9-13; Mark 2.13-17)

²⁷ Muli di mee deenei, Jesus gaa hana ga gidee ia tangada hagabudu dagitedi go Levi, e noho i lodo dono oobidi. Jesus ga helekai, “Daudalia mai Au.” ²⁸ Levi ga du gi nua ga diiagi ana mee huogodoo, ga daudali a Mee.

²⁹ Levi guu hai dana hagamiami damana i dono hale gi Jesus, digau hagabudu dagitedi mono daangada labelaa nogo i baahi digau dogologo aalaa. ³⁰ Hunu Pharisee mono gau haga donudonu haganoho o nadau buini, e helekai haga de hiihai gi nia dama agoago a Jesus boloo, “Ma e aha dela goodou e miami ge e inu i baahi digau hagabudu dagitedi mono balu daangada?”*

³¹ Jesus ga helekai gi digaula, “Digau ala hagalee magi la hagalee halahala togidaa, go digau magi hua. ³² Au hagalee ne hanimoi belee gahigahi digau ala e donu, gei ne hanimoi gi digau ala huaidu, gi daahuli nadau lodo.”

Di heeu di noho hagaonge

(Matthew 9.14-17; Mark 2.18-22)

³³ Hunu gau ne helekai gi Jesus, “Nia dama agoago John nogo noho hagaonge inia madagoaa elogo ge e hai dalodalo. Nia dama agoago nia Pharisee nogo hai labelaa beelaa, gei au dama agoago e miami ge e inu.”

³⁴ Jesus ga helekai, “Goodou e hagamaanadu bolo goodou e mee di hai digau tagamiami haga hai lodo gii noho hagaonge i di madagoaa taane hai lodo la i baahi digaula? E deemee di hai beelaa! ³⁵ Gei di madagoaa i golo, taane hai lodo la gaa lahi gi daha mo digaula, gei digaula gaa noho laa hagaonge.”

³⁶ Jesus ga helekai labelaa gi digaula di ala kai deenei, “Deai tangada e haahi dana mee gahu i di gahu hoou e pono di gahu bobo ai. Maa gaa hai beelaa, gei mee ga haga mahaa di gahu hoou, gei di mee gahu hoou la hagalee tongaadahi gi di mee gahu bobo.

* 5.30: Luke 15.1-2

³⁷ “Deai tangada hogi e hagahau ana waini hoou gi lodo nia mee dugu waini pobo ai, idimaa, nia waini hoou la ga hahaahi nia mee dugu waini pobo, gei nia waini la ga mmaalingi, gei nia mee dugu waini la ga mooho. ³⁸ Gei deeai, nia waini hoou le e hai gi hagahau gi lodo nia mee dugu waini hoou. ³⁹ Tangada e hiihai gi nia waini hoou ai i muli dono inu nia waini gu duai. Mee ga helekai bolo nia waini ala gu duai la koia e kala.”

6

Di heeu o di Laangi Sabad

(Matthew 12.1-8; Mark 2.23-28)

¹ Jesus nogo hana i lodo nia gowaa dogi laagau ‘wheat’ i di Laangi Sabad. Nia dama agoago a Maa ga daamada gaa lagi nadau huwa laagau ‘wheat’, ga milimili i lodo nadau lima, gaa gai nia lii nia maa.* ² Hunu Pharisee ga helekai, “Goodou e aha ala e hai nia mee ala guu bule go tadau haganoho bolo hagalee hai i di Laangi Sabad?”

³ Jesus ga helekai gi digaula, “Goodou digi daulia di mee a David ne hai i tolongo o mee mo ono ehoo ne hiigai?*

⁴ Mee ne hana gi lodo di Hale o God, gaa kae nia palaawaa ala gu hagadabu gi God, gaa gai, gaa wanga gi ono ehoo. Gei di maa e hai baahi gi tadau haganoho ma gaa gai nia maa, ala hua go digau hai mee dabu.”*

⁵ Jesus ga helekai, “Tama Tangada la go di Tagi o di Laangi Sabad.”

Taane made dono lima

(Matthew 12.9-14; Mark 3.1-6)

⁶ Di Laangi Sabad nomuli, gei Jesus ga ulu gi lodo syn-agoosee, ga agoago, gei di maa taane igolo guu made dono lima gau donu. ⁷ Digau haga donudonu haganoho

* 6.1: Deuteronomy 23.25 * 6.3: 1 Samuel 21.1-6 * 6.4: Leviticus 24.9

mono Pharisee e golomada a Mee be Mee e hagahili ana magi i di Laangi Sabad, gei digaula guu mee hua di hagahuaidu a Mee ga hai baahi gi Mee. ⁸ Gei Jesus gu iloo la nia maanadu digaula, ga helekai gi taane deela, “Duu i nua, duu mai gi mua.” Gei mee ga duu aga gaa duu gi mua digaula. ⁹ Gei Jesus ga helekai gi digaula, “Au e heeu adu gi goodou: Ma ni aha ala e dugu mai go tadau haganoho bolo gi heia i di Laangi Sabad? E hagamaamaa be e hagahuaidu? E benebene di mouli tangada, be e daaligi di mouli?” ¹⁰ Mee gaa mmada gi digaula huogodoo, ga helekai gi taane deela, “Holohia doo lima gi daha.” Gei mee gaa holo dono lima, gei guu hili.

¹¹ Gei digaula gu hagawelewele, gu helehelekai i nadau mehanga be dehee di nadau hai ga hai gi Jesus.

Jesus e hilihili ana gau agoago hagau dilongoholu maa lua
(Matthew 10.1-4; Mark 3.13-19)

¹² Muli mai hua, gei Jesus gaa hana gi tomo di gonduu bele dalodalo, guu noho i golo i di boo deela, e hai ana dalodalo anggi God. ¹³ Dono luada, gei Mee ga gahigahi mai ana dama agoago, ga hilihili ana gau dilongoholu maa lua, ga haga ingoo bolo digau agoago hagau: ¹⁴ Simon (dela e haga ingoo labelaa go Mee bolo Peter) mo dono duaahina go Andrew, James mo John, Philip mo Bartholomew, ¹⁵ Matthew mo Thomas, James tama daane a Alphaeus, mo Simon (dela e haga ingoo bolo di ‘Patriot’*), ¹⁶ Judas tama daane James, mo Judas Iscariot tangada dela e wanga a Jesus.

Jesus e agoago mo di hagahili ana magi
(Matthew 4.23-25)

¹⁷ Dono haneia i tomo di gonduu ginaadou mo ana gau agoago hagau, gei Jesus gaa duu i hongo di gowaa bapaba

* 6.15: ‘Patriot’: Di hagabuulinga dangada ala e hai baahi hagammuni gi digau Rome

mo ana dama agoago dogologo. Gei nia hagabuulinga gau dogologo igolo ne loomoi i Judea mo Jerusalem, mo inia waahale o Tyre mo Sidon ala i tongotai. ¹⁸Digaula ne lloomoi belee hagalongo gi nia agoago a Maa, e hagahili nadau magi. Gei digau ala nogo hagahuaidu go nia hagataalunga huaidu gu lloomoi labelaa, gu hagahili. ¹⁹Digau huogodoo e hagamada belee bili gi Mee, idimaa nia mogobuna ala e loomoi i baahi o Mee e hagahili ginaadou huogodoo.

Di maluagina mo di manawa gee

(Matthew 5.1-12)

²⁰ Jesus gaa mmada gi ana dama agoago, ga helekai, “E maluagina go goodou ala e hagaloale, idimaa, Teenua King o God la ni goodou!

²¹ E maluagina go goodou ala e hiigai dolomeenei, goodou ga haangai gi maaluu. E maluagina go goodou ala e tangi dolomeenei, goodou ga gadagada.

²² E maluagina go goodou maa nia daangada ga hudiou adu, gaa bae goodou gi daha, e haga teetee goodou, gei e helekai bolo goodou digau hai mee huaidu, idimaa go Tama Tangada!*

²³ Gi tenetene gi nia mee aanei ma ga kila aga, gei gi gaalege tenetene, idimaa, di hui damanaiee gu hagatogomaalia adu gi goodou i di langi.

Idimaa, nadau maadua mmaadua nogo hai nadau hai beenei gi nia soukohp.*

²⁴ E huaidu huoloo adu gi goodou ala e maluagina dolomeenei,

* 6.22: 1 Peter 4.14 * 6.23: 2 Kronikel 36.16; Nnegau 7.52

idimaa, goodou gu mouli humalia.

²⁵ E huaidu huoloo adu gi goodou ala e maaluu
dolomeenei,

idimaa, goodou ga hiigai!

E huaidu huoloo adu gi goodou ala e gadagada
dolomeenei,

idimaa, goodou ga tangitangi manawa gee!

²⁶ E huaidu huoloo maa nia daangada ga helekai humalia i
goodou,

idimaa, nia maadua mmaadua nogo helehelekai labelaa
beenei i nia soukohp dilikai.

Aloho i godou hagadaumee

(Matthew 5.38-48; 7.12a)

²⁷ “Au e hagi adu gi goodou ala e longono goodou Au:
Aloho i godou hagadaumee, heia nia humalia ang gi
digau ala e hudiou adu gi goodou. ²⁸ Hagahumalia ina
digau ala e haga halauwa goodou, dalodalo i digau ala
e hammaemmaa goodou. ²⁹ Maa tangada gaa paa do
gauwae, wanga ina di baahi dela i golo. Maa tangada
gaa kae do gahu mahaa, wanga ina labelaa doo gahu ulu-
ulu. ³⁰ Wanga gi digau huogodoo ala e tangi adu nadau
mee gi goodou. Maa tangada guu kae dau mee, gei goe
hudee daawa ina. ³¹ Heia gi nia daangada nia mee ala
e hiihai ginai goodou bolo nia daangada gi heia adu gi
goodou.*

³² “Maa goodou e aloho hua i digau ala e aloho i goodou,
malaa, di hagahumalia le e kae go goodou eimaha? Digau
huaidu hogi le e aloho i digau ala e aloho i ginaadou.

³³ Maa goodou gaa hai hua nia humalia gi digau ala e hai
nia humalia adu gi goodou, malaa, di hagahumalia le e kae
go goodou eimaha? Idimaa, digau huaidu le e hai labelaa
beelaa. ³⁴ Maa goodou e wanga hua godou mee gi digau

* 6.31: Matthew 7.12

ala e hagamaanadu go goodou bolo digaula ga gowadu labelaa nadau mee gi goodou, di hagahumalia le e kae go goodou eimaha? Digau huaidu hoga e wanga nadau mee gi digau huaidu, i di nadau maanadu bolo ma e loomoi labelaa ono haga humalia. ³⁵ Deesai! Aloho i godou hagadaumee, heia nia humalia gi digaula. Wanga ina godou mee gi digaula, hudee maanadu bolo ma ga lloo adu ono haga humalia gi goodou, gei godou hui ga llauehaa, gaa hai nia dama ni di God Aamua Huuloo. Idimaa, Mee e humalia gi digau ala hagalee danggee mo digau hai mee huaidu. ³⁶ Goodou gi dumaalia be di godou Damana dela e dumaalia.

Di hagi aga digau ala i golo
(Matthew 7.1-5)

³⁷ “Hudee hagi aga ina nia daangada, gei God ga hagalee hagi aga goodou. Hudee hagahuaidu ina nia daangada, gei God ga hagalee hagahuaidu goodou. Dumaalia gi nia daangada, gei God ga dumaalia adu gi goodou. ³⁸ Wanga gi digau ala i golo, gei God ga gowadu gi goodou. E donu, goodou gaa kae nia mee logo, hagamaamaa humalia ga dui adu gi lodo godou lima i godou mee ala e mee di daahi. Idimaa, godou mee e hai gi nia daangada, aalaa nia mee a God gaa hai adu gi goodou.”

³⁹ Jesus gaa kai dana ala kai deenei: “Tangada deegida le e deeme di daga dana dangada deegida. Maa gaa hai beelaa, meemaa dogolua gaa too gi lodo di aloalo.*

⁴⁰ Tamagiigi kuulu e aamua i dono tinte ai, gei tamagiigi dela gaa lawa dana kuulu la gaa hai be dono tinte.*

⁴¹ “Goe e aha dela e hei e goe di madageinga dela i lodo di golomada o do duaahina, gei goe e de hei e goe di bidalaagau dela i lodo do golomada? ⁴² Goe e aha

* 6.39: Matthew 15.14 * 6.40: Matthew 10.24-25; John 13.16; 15.20

dela e helekai gi do duaahina boloo, ‘Dumaalia mai e daa gi daha di madageinga dela i lodo do golomada,’ gei goe e de hei e goe di bida laagau dela i lodo do golomada? Goe tangada hai hegau ngudu golomada! Daawa ina gi daha i mua di bida laagau dela i lodo do golomada, gei goe ga gidee hagahumalia di daa di madageinga dela i lodo di golomada o do duaahina.

Di laagau mo ono huwa

(Matthew 7.16-20; 12.33-35)

⁴³ “Di laagau tomo humalia le e hagalee huwa huaidu, gei di laagau tomo huaidu le e hagalee huwa humalia.
⁴⁴ Nia laagau huogodoo le e haga modongoohia go nadau huwa. Goe e deemee di hagi au huwa ‘fig’ i di laagau dudua, be e hagi au ‘grape’ i di laagau huaidu.* ⁴⁵ Tangada humalia le e hai nia mee humalia mai di maluagina humalia i lodo dono manawa. Tangada huaidu le e hai nia mee huaidu mai di maluagina huaidu i lodo dono manawa. Idimaa, di ngudu o tangada le e helekai aga i nia mee ala e honu i lodo dono manawa.*

Nia daangada hau hale dogolua

(Matthew 7.24-27)

⁴⁶ “Ma e aha goodou e gahi Au boloo ‘Meenei Tagi’, gei goodou hagalee hai agu mee bolo gi heia? ⁴⁷ Tangada dela ga hanimoi e hagalongo ge e daudali agu helekai, deela tangada ga hagi adu ko Au be mee tangada e hai behee. ⁴⁸ Mee e hai be tangada dela ma gaa hau dono hale, e geli di lohongo di maa gii llala, ga haga duu di hagamau gi hongo tadugalaa. Di labagee gaa mmidi gi di hale deela, gei di hale e deemee di ngalungalua, idimaa ma guu haga duu gii mau. ⁴⁹ Tangada dela ma ga hagalongo gi agu helekai, gei hagalee daudali ai,

* 6.44: Matthew 12.33 * 6.45: Matthew 12.34

geia e hai be tangada dela ma gaa hau dono hale i hongo di gelegele, dono hagamau ai. Di madagoaa di labagee gaa mmidi gi di hale deela, gei di hale la gaa hinga, ga mooho hagahuaidu!”

7

*Jesus e hagahili di magi o di hege o tagi dauwa o Rome
(Matthew 8.5-13)*

¹ Jesus ne lawa di helekai gi nia daangada, gei Mee gaa hana gi Capernaum. ² Di hege o tagi dauwa o Rome la guu hai dono magi, bolo gaa made. Mee tangada hagalabagau ni dono dagi. ³ Di madagoaa tagi dauwa ne longono ia Jesus, geia ga hagau ana dagi mmaadua o Jew gi Mee, gi hanimoi e hagahili di magi o dana hege. ⁴ Digau o Jew ga lloomoi gi Jesus, ga dangidangi hagamaha gi Mee, “Taane deenei e tau gi dau hagamaamaa, ⁵ idimaa, mee e aloho i digau tatau henua, gei mee ne bida hau di madau synagoo.”

⁶ Gei Jesus gaa hana i muli digaula. Mee ne hoohoo adu gi di hale, gei tagi dauwa ga hagau hunu gau i ono ehoo belee helekai gi Jesus, “Goe hudee hai loo bolo Goe e hanimoi, idimaa, au e dee tau loo bolo Goe e ulu gi lodo dogu hale, ⁷ gei au e dee tau loo dogu hanadu gi di Goe. Helekai hua, gei dagu dangada hai hegau la gaa hili dono magi. ⁸ Au tangada e noho i lala ogu dagi aamua labelaa, e dagi agu gau dauwa. Au ga hagadaba boloo, ‘Hana!’ gei mee e hana. Au ga hagadaba boloo, ‘Hanimoi!’ gei mee e hanimoi. Gei au ga hagadaba gi dogu ihege boloo, ‘Heia di mee deenei!’ gei mee e hai.”

⁹ Jesus gu goboina dono hagalongo gi nia helekai aanei. Mee ga huli adu, ga helekai gi di hagabuulinga dangada dela e daudali Ia, “Au e hagi adu gi goodou, bolo Au digi gidee di hagadonu beenei, hagalee hogi i Israel!”

¹⁰ Digau kae hegau gaa hula gi di hale o tagi dauwa deela, gaa mmada, gei di hege la guu hili dono magi.

Jesus e haga mouli tama daane di ahina guu made dono lodo

¹¹ Muli mai hua, gei Jesus mo ana dama agoago mo digau dogologo ala i golo gaa hula gi di waahale go Nain.

¹² Di madagoaa hua ne dau iei Mee i di ngudu di bontai di waahale, tangada made e lahi gi daha mo di waahale. Tama daane dela ne made la tama hua e dahi ni di ahina ne made dono lodo, gei di hagabuulinga gau dogologo o di waahale deela nogo madalia a mee.

¹³ Di madagoaa Tagi ne mmada gi di ahina deela, Mee gu aloho i mee, ga helekai, “Hudee dangi.” ¹⁴ Gei mee ga hanadu, gaabili gi tebedebe, gei digau nogo taga a mee gaa tuu. Gei Jesus ga helekai, “Tama daane, Au e helekai adu, nnoo i nua!” ¹⁵ Taane made deela gaa nnoo i nua, ga daamada ga leelee, gei Jesus gaa wanga a mee gi dono dinana.

¹⁶ Digaula huogodoo gu mmaadagu huoloo mo di haamu a God boloo, “Soukohp aamua gu gila aga i tatau baahi. God gu hanimoi e haga mouli ana daangada!”

¹⁷ Di longo o Jesus guu dele gi lodo nia henua huogodoo o Judea mo nia guongo mai i daha.

Digau kae hegau John Babdais

(Matthew 11.2-19)

¹⁸ Nia dama agoago a John ga hagi anga gi mee nia mee huogodoo aanei, gei mee ga gahi mai ana dama agoago dogolua, ¹⁹ ga hagau meemaa gi Tagi belee heeu gi Mee, “Maa Kooe dela nogo helekai iei John bolo e hanimoi, be gimaadou e tali di madau dangada i golo?”

²⁰ Di madagoaa meemaa ne dau i baahi o Jesus, meemaa ga helekai, “Meenei, John Babdais ne hagau mai gimaua belee heeu adu, be maa Kooe dela nogo helekai iei mee

bolo e hanimoi, be gimaadou e tali di madau dangada i golo?”

²¹ Di madagoaa hua deela, Jesus e hagahili ana gau magi dogologo, mono gau iai nia hagataalunga huaidu, gei e haga gidee ana gau deegida. ²² Mee ga helekai gi nia daangada kae hegau a John boloo, “Hula, hagi anga ina gi John gulu mee ala ne gidee ge ne longono:

Digau deegida gu gidee,

digau habehabe guu mee di taele,

digau longoduli gu longono,

digau mmade gu mouli aga,

gei di Longo Humalia gu agoago gi digau hagaloale.*

²³ “E maluagina go tangada dela hagalee manawa lua i di Au.”

²⁴ Muli hua digau kae hegau a John ne hula, gei Jesus ga daamada ga helekai i John gi digau dogologo, “Di godou madagoaa ne hula gi John i lodo di anggowaa, ma ni aha nogo maanadu go goodou bolo e mmada ginai? Di laagau aalek e hahaangi i di madangi? ²⁵ Ma di aha ne hula ginai goodou belee mmada ginai? Tangada e ulu nia gahu madamada? Deesai. Digau ala e ulu nia goloo beenei ge mouli maluagina e gidee gidaadou i lodo nia hale king.

²⁶ Hagia mai ma di aha dela ne hula ginai goodou belee mmada ginai? Di soukohp? Uaa e donu, gei Au e hagi adu gi goodou bolo goodou ne mmada gi tangada koia e aamua i soukohp. ²⁷ John la go tangada dela gu helekai ai di Beebaa Dabu boloo:

‘God e helekai,

Au ga hagau dagu dangada kae hegau i oo mua,

e huge di ala adu gi di Goel!’ ”*

* 7.22: Isaiah 35.5-6; 61.1 * 7.27: Malachi 3.1

²⁸ Jesus ga duudagi adu ana helekai, “John le e aamua i nia daangada huogodoo ala nogo mouli, gei tangada dela koia i mugi lala loo i lodo Teenua King o God, le e mada aamua i John.”

²⁹ Digau huogodoo gu longono Jesus, gei e donu go digau hagabudu dagitedi, aalaa go digau gu daudali nnelekai donu a God, idimaa, digaula gu babdais go John.*

³⁰ Gei nia Pharisee mo digau haga donudonu haganoho e haga balumee tadinga hagalabagau a God, idimaa, digaula ne de hiihai di babdais go John.

³¹ Jesus ga duudagi adu ana helekai, “Nia daangada dangi nei le e mee di hagatau ko Au gi di aha? Digaula e hai be ni aha? ³² Digaula e hai be nia damagiigi ala e noho i di gowaa huihui mee. Di hagabuulinga nei e wwolo gi di hagabuulinga dela i golo boloo, ‘Gimaadou ne daahili nia daahili haga hai lodo, gei goodou hagalee gaalege! Gei gimaadou ne daahili nia daahili dangada made, gei goodou hagalee tangitangi!’ ³³ John ne hanimoi gaa noho hagaonge, hagalee nogo inu nia waini, gei goodou nogo hai boloo, ‘Di hagataalunga huaidu i lodo o mee!’

³⁴ Tama Tangada ne hanimoi gu miami, gu inu, gei goodou nogo helekai boloo, ‘Mmada gi Taane deela! E hagalugai ge inu waini, gei Mee di hoo ni digau hagabudu dagitedi mo nia balu daangada!’ ³⁵ Di kabemee o God e gila mai bolo e donu i baahi digau ala guu kae di maa.”

Jesus i di hale o Simon di Pharisee

³⁶ Dahi Pharisee ne gahi a Jesus belee miami ginaua hiahi, gei Jesus gaa hana gi di hale o maa, gaa noho gi lala ga miami. ³⁷ Lodo di waahale deela, iai di ahina e mouli huaidu. Mee guu longo bolo Jesus e miami i di hale o di

* 7.29: Matthew 21.32; Luke 3.12

Pharisee, gei mee ga gaamai dana loloaabi ne hai gi nia ‘al-baster’ e honu lolo kala,* ³⁸ mee gaa duu i tua Jesus ga bala gi lala gi baahi nia babaawae o Maa, ga dangidangi mo di haga tiu nia babaawae o Maa gi ono dangi, ga omo nia babaawae o Maa gi ono ngaahulu, gaa honggi, ga hagatulu gi di lolo kala. ³⁹ Di Pharisee gaa mmada gi di mee deenei, ga daalo ang gi ono lodo, “Maa nei boloo Taane deenei la soukohp donu, gei Mee e iloo Ia di ahina dela ne bili ang gi de Ia, e iloo Ia di mouli huaidu o maa!”

⁴⁰ Jesus ga helekai, “Simon, dagu mee i golo e hagi adu gi di goe.”

Simon ga helekai, “Uaa, Tangada agoago, hagia mai.”

⁴¹ Jesus ga helekai, “Nia daane dogolua e boibana nau bahihadu gi taane ana bahihadu. Tangada e dahi e lima lau silber, ge di hoo o maa e madalima. ⁴² Meemaa gu deemee di hui nau boibana, gei tangada ana bahihadu ga dumaalia gi nia boibana meemaa. Koai i meemaa e mada damana dono aloho i mee?”

⁴³ Simon ga helekai, “Au e hagabau bolo go tangada dela ne wanga ginai nia mee mada logo.”

Jesus ga helekai, “Goe e donu.” ⁴⁴ Mee gaa huli gi di ahina, ga helekai gi Simon, “Goe e gidee di ahina deenei? Au ne hanimoi gi doo hale, gei goe digi gaamai au wai belee tonu ogu wae, gei di ahina deenei guu tonu ogu wae gi ono dangi, ga omo gi ono ngaahulu. ⁴⁵ Gei goe digi halagabagau ina Au gi di honggi, gei taamada dogu hanimoi, mee digi noho i dono hongihongi ogu babaawae. ⁴⁶ Goe digi gaamai au lolo olib belee haga maluu dogu libogo, gei mee gu hagatulu ogu babaawae gi di lolo kala. ⁴⁷ Gei Au e helekai adu bolo di aloho damanaiee ne haga modongoohia go mee, e haga modongoohia bolo ono huaidu logowaahee

* 7.37: Matthew 26.7; Mark 14.3; John 12.3

la gu maahede, gei tangada dela ne maahede ono huaidu hogoohi, e haga modongoohia hua go dono aloho dulii.”

⁴⁸ Gei Jesus ga helekai gi di ahina, “O huaidu la gu maahede.”

⁴⁹ Digau ala e noho gi teebele ga daamada ga leelee i nadau mehanga boloo, “Ma koai deenei bolo Ia e mee di wwede nia huaidu?”

⁵⁰ Gei Jesus ga helekai gi di ahina, “Go do hagadonu dela ne daa mai goe gi daha mo di made. Hana i di aumaalia.”

8

Nia ahina nogo madalia Jesus

¹ Nomuli, gei Jesus gaa hana laa lodo nia waahale llauehe mo lligi, e agoago di Longo Humalia o Teenua King o God. Nia dama agoago a Maa gu madalia a Mee, ² mo nia ahina ala ne haga hili nadau magi mo nia hagataalunga huaidu go Mee: Mary (e haga ingoo bolo Mary mai Magdala) dela ne hagabagi ono hagataalunga huaidu e hidu,* ³ Joanna dono lodo go Chuza, tangada oobidi o Herod, mo Susanna, mo nia ahina dogologo i golo ala nogo hagamaamaa a Jesus mo ana dama agoago gi nadau maluagina.

Di ala kai o tangada haga nonnono lii laagau

(Matthew 13.1-9; Mark 4.1-9)

⁴ Nia daangada mai nia waahale e dagadagabuli gi baahi o Jesus, ga dogologo mai, gei Mee ga hagi anga dana ala kai deenei:

⁵ “Taane ne hana ne haga nonnono ana lii. Dono haga nonnono hua ana lii gi lodo di gowaa dogi mee, hunu lii ne monnono gi taalinga di ala, di gowaa dela e dagadagahi go nia daangada, ge e gai go manu. ⁶ Hunu lii ne monnono gi hongo di gowaa haduhadu, gei nia lii la ga matili aga, ga maangoo, idimaa, nia gelegele

* 8.2: Matthew 27.55-56; Mark 15.40-41; Luke 23.49

la hagalee tiu. ⁷ Hunu lii ne monnono gi lodo nia geinga duduia ala e tomo aga dalia nia lii, gei nia maa gaa mmade, idimaa, nia geinga duduia la gu hagadeaadee nia maa. ⁸ Hunu lii ne monnono gi hongo di gelegele humalia. Nia laagau gu tomo aga guu huwa dagi llau.”

Gei Jesus ga helekai haga muliagina boloo, “Tangada ono dalinga i golo, gi hagalongo!”

Tadinga nia ala kai

(Matthew 13.10-17; Mark 4.10-12)

⁹ Nia dama agoago a Jesus ga heeu, “Dehee tadinga di ala kai deenei?” ¹⁰ Gei Mee ga helekai, “Ma gu dumaalia adu gi goodou gi iloo nia mee ngala huogodoo o Teenua King o God, gei Au e agoago gi digau ala i golo i nia ala kai, gei digaula ga halahala nia maa gei e de gidee, ga hagalongo gei e de iloo.*

Jesus e haga modongoohia di ala kai o tangada haga nonnono

(Matthew 13.18-23; Mark 4.13-20)

¹¹ “Deenei tadinga o di ala kai deenei: Nia lii la go nnelekai a God. ¹² Nia lii ala ne monnono gi taalanga di ala, la go digau ala ne longono nia helekai a God, gei Setan ga hanimo i gaa daa nia helekai aalaa gi daha mo nadau manawa, gi de hagadonu digaula ga mouli. ¹³ Nia lii ala ne monnono gi hongo di gowaa haduhadu, la go digau ala ne longono ginaadou nia helekai, gaa kae nia maa i di tenetene, gei nia maa digi mau i nadau lodo. Digaula e hagadonu hua i tama madagoaa bodobodo, gaa dau gi di hagamada, gei digaula gaa too. ¹⁴ Gei nia lii ala ne monnono gi lodo nia geinga duduia, la go digau ala ne longono nia helekai, gei nia maanadu e logo, nia malu-agina, nia haga tenetene o di mouli deenei la guu honu i nadau lodo, gu beehi nnelekai aalaa, gaa hidi ai nia huwa o nia maa gu deemee di mmaadua. ¹⁵ Nia lii ala ne monnono

* 8.10: Isaiah 6.9-10

gi hongo di gelegele humalia, la go digau ala ne longono nia helekai, ga daahi nia maa ilodo nadau manawa humalia ge e hagalongo, gaa noho maaloo, gaa dae loo gi ginaadou ma gaa huwa.

Di malama i lala di boolo

(Mark 4.21-25)

¹⁶ “Tangada e dudu dana malama, ga haga holi gi lala di boolo, be e dugu gi lala di hada ai, ma belee dugu gi hongo di mee dugu malama, gii mmada ginai nia daangada i di nadau ulu mai.*

¹⁷ “Nia mee hagammuni la ga haga kila aga, gei nia mee ala e de gidee, la ga gidee, be e gaamai gi di gowaa maalama.*

¹⁸ “Goodou hagalongo gii donu, idimaa, tangada dela ana mee i dono baahi, le e wanga gi mada logo. Gei tangada dela ana mee ai, le e daa gi daha mo mee, ma e aha maa mee e hagamaanadu bolo ia ana mee dului i dono baahi.”*

Tinana mo nia duaahina daane o Jesus

(Matthew 12.46-50; Mark 3.31-35)

¹⁹ Tinana mo nia duaahina daane o Jesus ga lloomoi gi Jesus, gei digaula gu deemee di heetugi gi Mee idimaa nia daangada gu dogologowaahie. ²⁰ Tangada ga helekai gi Jesus, “Do dinana mo o duaahina daane e tuu i malaelae, e hiihai e heetugi adu.”

²¹ Jesus ga helekai gi digaula, “Dogu dinana mo ogu duaahina daane la go digau ala e hagalongo ge e haga gila aga nia helekai a God.”

Jesus e haga kila di madangi gono

(Matthew 8.23-27; Mark 4.35-41)

* 8.16: Matthew 5.15; Luke 11.33

* 8.17: Matthew 10.26; Luke 12.2

* 8.18: Matthew 25.29; Luke 19.26

²² Di laangi nomuli, Jesus mo ana dama agoago gaa kaga gi di boodi, gei Mee ga helekai gi digaula, “Gidaadou gaa hula gi di baahi igolo o tai.” Malaa, digaula ga hagatanga, gaa hula. ²³ Digaula ga dele adu, gei Jesus guu kii. Digi duai di madangi gaa gono ia i hongo di monowai, gei di boodi gu daamada gu hahaawa, digaula gu i lodo di haingadaa damana. ²⁴ Nia dama agoago a Maa ga hangahanga a Jesus, ga helekai, “Meenei Tagi, gidaadou gaa mmade hua!”

Jesus ga ala aga, ga helekai gi di madangi mono beau bagibagia gii kila, gei gu kila loo. ²⁵ Gei Mee ga helekai gi ana dama agoago, “Godou hagadonu la i hee?”

Digaula gu goboina, gu mmaadagu, ga helehelekai i nadau mehanga boloo, “Taane deenei la koai? Mee ne helekai hua, gei di madangi mono beau gu hagalongo gi Meel!”

*Jesus e hagahili taane ono hagataalunga huaidu
(Matthew 8.28-34; Mark 5.1-20)*

²⁶ Jesus mo ana dama agoago ga dele adu gi tenua go Gerasa, deelaai i di baahi igolo Tai o Galilee. ²⁷ Di madagoaa Jesus ne doo aga i tongotai, Ia ga heetugi gi taane iai nia hagataalunga huaidu i ono lodo mai di waa-hale deelaai. Gu waalooloo taane deenei dono heehee ono goloo ai, hagalee noho i dono hale, gei e nohonoho hua i di gowaa waa daalunga. ²⁸ Mee ne gidee ia a Jesus ga haga hinga ia gi baahi nia wae o Maa, gaa wolo gi nua, “Jesus, Tama a God Aamua Huoloo, Goe e hiihai gi di aha i dogu baahi? Au e dangi adu, bolo Goe gi hudee hagaduadua ina au!” ²⁹ Mee ne helekai beenei, idimaa, Jesus la ne helekai gi di hagataalunga huaidu bolo gii hana gi daha mo mee. Nia holongo e logo gei di hagataalunga huaidu e ulu gi lodo o mee, ma e aha maa mee e lawalawa, ge e nnoo ono lima mo ono wae gi nia daula baalanga, gei mee e haga mmodummodu hua nia maa, gei di hagataalunga huaidu e lahi a mee gi lodo di anggowaa.

³⁰ Jesus ga heeu gi mee, “Do ingoo la koai?”

Gei mee ga helekai, “Dogu ingoo go ‘Dogologo,’” idimaa, nia hagataalunga huaidu e logo i lodo o mee. ³¹ Nia hagataalunga huaidu ga dangidangi gi Jesus bolo gi hudee hagau ina ginaadou gi lodo di luwa dono dua ai.

³² Di hagabuulinga biigi e hoo hoo mai, e miami i taalinga di gonduu, gei nia hagataalunga huaidu ga tangi anga gi Jesus, bolo gi dumaalia ang gi ginaadou gii hula gi lodo nia biigi, gei Jesus gu dumaalia gi digaula. ³³ Gei digaula ga ulu gi daha mo taane, ga ulu gi lodo nia biigi. Gei di hagabuulinga biigi deela gu llele ia gi lala i di laungudu mololo gi lodo di monowai, gu mmaalemu.

³⁴ Nia daane ala nogo benebene nadau biigi ga gidee di mee dela ne hai, digaula gaa llele, ga hagadele di longo deenei gi lodo di waahale mo nia gowaa dogi mee. ³⁵ Nia daangada gaa hula belee mmada gi di mee dela ne hai. Di madagoaa digaula ne lloomoi gi Jesus, ga gidee tangada dela ne hagabagi ono hagataalunga huaidu e noho i baahi o Jesus, ono goloo humalia, gei mee guu hai tangada humalia, huogodoo gu mmaadagu. ³⁶ Digau ala ne gidee ginaadou nia mee aanei, ga hagi anga gi digau o di waahale deela di hai o taane dela ne haga hili dono magi. ³⁷ Gei digau huogodoo o di guongo deela ga tangi anga gi Jesus gii hana, idimaa, digaula gu mmaadagu i Mee. Gei Jesus gaa gaga gi di boodi, ga hagatanga. ³⁸ Taane dela ne ulu mai gi daha ono hagataalunga huaidu, gaa dangi gi Jesus, “Dumaalia mai au e hana i oo muli.”

Gei Jesus ga hagau a mee gii hana, ga helekai, ³⁹ “Hana gi doo hale, hagia anga ina di mee a God ne hai adu gi di goe.”

Gei taane deela gaa hana laa lodo di waahale, ga hagi anga gi digaula di mee a Jesus ne hai ang gi deia.

*Tama ahina Jairus mo di ahina ne bili gi di gahu o Jesus
(Matthew 9.18-26; Mark 5.21-43)*

⁴⁰ Di madagoaa Jesus ne hanimoi labelaa gi di baahi i golo o tai, nia daangada gu benebene a Mee, idimaa, huogodoo nogo talitali a Mee. ⁴¹ Taane dono ingoo go Jairus, tagi di oobidi synagoo, gaa dau i baahi o Mee, ga dogoduli iha gi baahi nia wae o Jesus, gaa dangi gi Mee bolo ginawa e hula gi dono hale, ⁴² idimaa, dana dama ahina hua e dahi e madangaholu maa lua ono ngadau, gu hoo hoo gaa made.

Gei Jesus gaa hana gi golo, gei digau dogologo gu taele i di gili o Maa i nia baahi huogodoo. ⁴³ I lodo digau aanei la di ahina nogo halihali ono dodo i nia ngadau e madangaholu maa lua, gei mee gu hagawodi ana teenedi huogodoo gi nia dogidaa, gei tangada ne mee di hagahili dono magi ai. ⁴⁴ Di ahina deela ga hanimoi laa tua Jesus, gaa bili gi taalinga di gahu o Maa, gei di magi o maa guu hili. ⁴⁵ Jesus ga heeu, “Ma koai dela ne bili mai gi di Au?”

Digau huogodoo bolo hagalee go ginaadou, gei Peter ga helekai, “Meenei Tagi, nia daangada dogologo gu haganiga i doo gili.”

⁴⁶ Gei Jesus ga helekai, “Tangada gu bili mai, idimaa, Au gu hagalongono eia i di Au bolo ogu mahi la guu daa.” ⁴⁷ Di ahina gu modongoohia bolo ia guu gida, geia ga hanimoi mo dono bolebole, ga hagahinga adu gi nia wae o Jesus. I mua digau dogologo, mee ga hagi anga gi Jesus tadinga dela ne bili eia gi Mee, mo di hili limalima dono magi. ⁴⁸ Jesus ga helekai gi mee, “Dagu dama ahina, do hagdONU ne hai goe gii hili. Hana i di aumaalia.”

⁴⁹ Di madagoaa Jesus nogo helekai ai, gei tangada kae hegau ga hanimoi i di hale o Jairus, ga helekai gi Jairus, “Dau dama ahina la guu made, goe hudee haga deaadee ina Tangada Agoago.”

⁵⁰ Jesus ga longono Ia, ga helekai gi Jairus, “Goe hudee madagu, hagdONU, gei dau dama ahina ga humalia.”

⁵¹ Di madagoaa mee ne dau i di hale, Mee hagalee du-maalia gi tangada gi ulu i ono muli gi lodo di hale, ala hua go Peter, John, James, tamana mo tinana o tama ahina. ⁵² Digau huogodoo ala i golo e tangitangi lodo huaidu i di tama, gei Jesus ga helekai, “Hudee tangitangi, di tama la digi made. Mee e kii hual!”

⁵³ Digaula huogodoo ga gadagada, ga haga balumee a Mee, i digaula gu iloo bolo di tama la guu made. ⁵⁴ Gei Jesus gaa kumi di lima o maa, gaa wolo, “Dagu dama, nnoi nua!” ⁵⁵ Gei tama ahina gu mouli, gu nnoi nua, gei Jesus ga helekai gi haangai ina a mee. ⁵⁶ Nia maadua o maa gu homouli, gei Jesus ga helekai gi meemaa gi hudee hagi anga gi dahi dangada di mee dela ne hai.

9

*Jesus e hagau nia dama agoago dilongoholu maa lua
(Matthew 10.5-15; Mark 6.7-13)*

¹ Jesus ga haga dagabuli ana dama agoago dilongoholu maa lua, gaa wanga gi digaula nia mogobuna mo nia mahi e hagabagi nia hagataalunga huaidu mo di hagahili nia magi huogodoo. ² Gei Mee ga hagau digaula bolo gi agoago ina Teenua King o God, gei gi hagahili ina nia magi. ³ Mee ga helekai gi digaula, “Hudee kae mee digagi i godou hula, hudee kae dogodogo, budehede, meegai, palaawaa, bahihadu, be nia gahu.* ⁴ Maa di hale ga hagaahi mai goodou, ulu gi lodo di hale deela, noho i golo, gaa dae loo gi di godou hagatanga i di waahale deela. ⁵ Maa digau o di gowaa deela ga hagalee benebene goodou, ulu gi daha mo di waahale deela, dudua godou babaawae, e hai di haga modongoohia gi digaula.” *

* 9.3: Luke 10.4-11; Nnegau 13.51 * 9.5: Nnegau 13.51

⁶ Nia dama agoago ga hagatanga, gaa hula gi lodo nia waahale lligi huogodoo, ga hagadele di Longo Humalia mo di hagahili nia magi i nia gowaa huogodoo.

Di hinihini Herod

(Matthew 14.1-12; Mark 6.14-29)

⁷ Herod di tagi o Galilee ne longono ia nia mee huogodoo ala ne hai, gei mee guu lodo hinihini huoloo, idimaa, hunu daangada e helekai bolo John Babdais la ne mouli aga.*

⁸ Hunu gau e helekai bolo ma go Elijah ne gila aga, gei hunu gau e helekai bolo mee soukohp i nia soukohp namua ne mouli aga. ⁹ Gei Herod ga helekai, “Au gu tuu di libogo o John gi daha, gei ma koai taane deenei dela ono longo aanei?” Gei mee e hagamahi bolo ia e mmada gi Jesus.

Jesus e haangai ana daane e lima mana (5,000)

(Matthew 14.13-21; Mark 6.30-44; John 6.1-14)

¹⁰ Digau agoago hagau ga lloomoi, ga hagi anga gi Jesus nadau mee huogodoo ala ne hai, gei Mee gaa lahi digaula mada ginaadou gi di waahale Bethsaida. ¹¹ Digau dogologo ala ne longono gaa hula i muli o Mee. Mee ga benebene digaula, ga helehelekai gi digaula i di hai o Teenua King o God, ga hagahili nia magi.

¹² Hiahi ia di mee, gei ana dama agoago dilongoholu maa lua ga lloomoi gi Mee ga helekai, “Hagau ina digau aanei gii hula gi nia waahale lligi mono gowaa dogi mee, gi halahala nadau mee e gai mono gowaa e noho ai, idimaa, di gowaa deenei le e lomo.”

¹³ Gei Jesus ga helekai, “Goodou bida haangai ina digaula.”

Gei digaula ga helekai, “Nia palaawaa hua elima ge lua iga ala igolo. Goe ehiihai gimaadou gii hula ehui mai madau meegai

* 9:7: Matthew 16.14; Mark 8.28; Luke 9.19

gi di hagabuulinga dangada dogologo deenei?” ¹⁴ Nia daane e lima mana (5,000) ala nogo i golo.

Jesus ga helekai gi ana dama agoago, “Haganoho ina digaula gi nia hagabuulinga daangada dagi madalima.”

¹⁵ Muli hua nia dama agoago a Maa ne haga noho digaula, ¹⁶ Jesus ga dahi mai nia palaawaa e lima ge lua iga, gaa mmada gi di langi, ga danggee anggi God, ga ginigini, gaa wanga gi ana dama agoago gi duwwaa gi digaula. ¹⁷ Digaula gu miami huogodoo gu maaluu, gei ana dama agoago gaa haa nadau meegai ne dubu gi nia gada e madangaholu maa lua.

Peter e haga modongoohia Jesus

(Matthew 16.13-19; Mark 8.27-29)

¹⁸ Dahi laangi hua, gei Jesus e dalodalo modogoia, ana dama agoago ga lloomoi gi Mee, gei Mee ga heeu gi digaula, “Nia daangada le e hai bolo Au koai?”

¹⁹ Digaula ga helekai, “Hunu gau e helekai bolo Goe go John Babdais, gei hunu gau e helekai bolo Goe go Elijah, gei hunu gau i lodo digaula e helekai bolo Goe la di soukohp i nia soukohp namua dela ne mouli aga.”*

²⁰ Gei Mee ga heeu gi digaula, “Gei goodou e hai bolo Au koai?”*

Peter ga helekai, “Goe go di Mesaia a God.”

Jesus e helekai i dono hagaduadua mo dono made

(Matthew 16.20-28; Mark 8.30-9.1)

²¹ Jesus ga helekai maaloo gi digaula bolo gi hudee hagianga ina di mee deenei gi tei dangada. ²² Mee ga helekai labelaa, “Tama Tangada e hai loo gi hagaduadua, ge e hai gi haga balumee go nia dagi mmaadua, digau aamua hai mee dabu mo digau haga donudonu haganoho. Mee ga daaligi gii made, nia laangi e dolu nomuli ga hagamouli aga.”

* 9.19: Matthew 14.1-2; Mark 6.14-15; Luke 9.7-8 * 9.20: John 6.68-69

²³ Mee ga helekai gi digaula huogodoo, “Maa tangada e hiihai e daudali mai Au, geia gi haga de langahia ina dono mouli, gidahi aga ina dono loobuu inia laangi huogodoo, daudali mai Au.* ²⁴ Idimaa, tangada dela e hiihai e benebene dono mouli, ga de gidee dono mouli. Gei tangada dela gaa hudu gi daha dono mouli i di Au, ga benebene dono mouli.* ²⁵ Di humalia aha e kae go tangada dela ma ga hai mee gi henuailala hagatau, nomuli gei mee ga de gidee ia dono mouli? Hagalee! ²⁶ Maa tangada ga langaadia i di Au mo agu agoago, gei Tama Tangada le e langaadia labelaa i tangada deela, i dono madagoaa ma ga hanimoi ai inia madamada o Tamana mo digau di langi haga madagu. ²⁷ Au e hagi adu gi goodou di tonu, bolo hunu gau i ginei hagalee mmade, gaa dae loo gi di nadau gidee Teenua King o God.”

Di huli o Jesus

(Matthew 17.1-8; Mark 9.2-8)

²⁸ Hoo hoo gi di tabu e dahi i muli ana helekai inia mee aanei, gei Jesus ga lahi a Peter, John mo James gi tomo di gonduu e dalodalo.* ²⁹ Dono madagoaa hua e dalodalo ai, gei ono hadumada gu dina gee, gei ono gahu gu kene hila mmaa. ³⁰ Nomuli hua gei nia daane dogolua, go Moses mo Elijah, e helehelekai gi Mee. ³¹ Meemaa ne kila mai i lodo nia madamada o di langi, ga helekai gi Jesus i dana hai dela gaa hai hoo hoo mai, e haga honu di mee a God dela bolo Ia e made i Jerusalem. ³² Peter mo ono ehoo guu kii danu mmoe, ga aala aga, gaa mmada gi di madamada o Jesus mo nia daane dogolua ala e tuu i baahi o mee. ³³ Di hagatanga hua nia daane dogolua i baahi o Jesus, gei Peter ga helekai, “Tagi, gidaadou

* 9.23: Matthew 10.38; Luke 14.27 * 9.24: Matthew 10.39; Luke 17.33;
John 12.25 * 9.28: 2 Peter 1.17-18

gu humalia huoloo ala gu i ginei! Gimaadou gaa hau madau damaa hale e dolu, e dahi ni aau, e dahi ni Moses, gei e dahi ni Elijah.” (Gei mee digi iloo humalia ana helekai ne hai.)

³⁴ Di madagoaa hua a mee dela e leelee, di gololangi ga haneaia, gaa gahu digaula. Ana dama agoago gu mmaadagu i di madagoaa di gololangi deela ne gahu digaula. ³⁵ Di lee ga helekai mai i lodo di gololangi, “Deenei dagu Dama daane dela gu hilihili ko Au. Hagalongo gi Mee!”*

³⁶ Di madagoaa di lee ne noho, gei Jesus gu modogoia. Ana dama agoago guu noho dee muu, gei digi hagi anga gi tangada i nadau mee ala ne mmada ginai.

*Jesus e hagahili tama daane iai di hagataalunga huaidu i ono lodo
(Matthew 17.14-18; Mark 9.14-27)*

³⁷ Di laangi nomuli, gei Jesus mo ana dama agoago dogodolu gallooa i tomo di gonduu, gei di hagabuulinga dangada dogologo ga heetugi gi Jesus. ³⁸ Tangada gaa wolo mai i baahi digau dogologo aalaa boloo, “Tangada Agoago, au e dangi adu gii mmada gi dagu dama daane hua e dahi! ³⁹ Di hagataalunga huaidu gu hagahuaidu a mee, guu hai a mee gi wolowolo, gi gaehagaeha, gii puu biabi dono ngudu, dela hua dana hai e haga mmaemmae a mee, hagalee hagatanga gi daha mo mee. ⁴⁰ Au ne dangi anga gi au dama agoago bolo gi haga bagia di maa gi daha, gei digaula ne deeme.”

⁴¹ Jesus ga helekai, “Goodou digau de hagadonu gei e hala! Au e hai gii noho waalooloo behee i godou baahi? E waalooloo behee dagu hagamaamaa goodou?” Gei mee ga helekai gi taane, “Laha mai dau dama daane gi kinei.”

* 9.35: Isaiah 42.1; Matthew 3.17; 12.18; Mark 1.11; Luke 3.22

⁴²Tama daane la ga hanimoi, gei di hagataalunga huaidu gaa hudu a mee gi hongo di gelegele, gaa hai a mee gi gaehagaeha. Gei Jesus ga hagabagi di hagataalunga huaidu, ga hagahili a mee, gaa wanga a mee gi dono damana.

⁴³Digau huogodoo gu goboina di mogobuna mahi o God.

Jesus e helekai labelaa i dono made
(Matthew 17.22-23; Mark 9.30-32)

Nia daangada e goboina hua igolo i nia mee huogodoo ala ne hai go Jesus, gei Mee ga helekai gi ana dama agoago, ⁴⁴ “Goodou hudee de langahia dagu mee dela ga hagi adu: Tama Tangada le e wanga gi lodo nia mogobuna o nia daangada.” ⁴⁵ Nia dama agoago a maa digi modongoohia ginaadou telekai deenei. Idimaa, ma ne dugu hagammuni i digaula bolo gi de iloo di maa, gei digaula hogi nogo mmaadagu di heeu gi Mee.

Koai e kaedahi e aamua?
(Matthew 18.1-5; Mark 9.33-37)

⁴⁶ Di lagamaaloo guu hai i mehanga nia dama agoago a Jesus, be di maa koai i ginaadou dela e aamua.* ⁴⁷ Jesus gu iloo nia maanadu digaula, ga gahi mai dana damagiigi, ga haga duu i dono baahi, ⁴⁸ ga helekai gi digaula, “Be koai hua dela ga benebene di tama deenei i dogu ingoo, la ne benebene hua Au, gei tangada dela e benebene Au, la ne benebene hua Tangada dela ne hagau mai Au. Tangada dela i mugi lala loo i goodou, deela tangada e aamua i goodou huogodoo.”*

Be koai hua dela hagalee hai baahi adu gi goodou, la di hoo ni goodou
(Mark 9.38-40)

⁴⁹ John ga helekai aga, “Tagi Aamua, gimaadou guu mmada gi tangada e hagabagi ana hagataalunga

* 9.46: Luke 22.24 * 9.48: Matthew 10.40; Luke 10.16; John 13.20

huaidu i do ingoo, gei gimaadou guu bule a mee, idimaa mee hagalee tangada ni tadau buini.”

⁵⁰ Jesus ga helekai gi mee mo ana dama agoago ala i golo, “Goodou hudee bule ina a mee, idimaa, tangada dela hagalee hai baahi adu gi goodou, la di hoo ni goodou.”

Di waahale Samaria hagalee benebene Jesus

⁵¹ Jesus ne hoohoo di lahi gi di langi, gei Mee ga maanadu, gaa hana gi Jerusalem. ⁵² Mee ga hagau ana gau kae hegau gii hula i ono mua gi di waahale dulii i Samaria e hagatogomaalia nia mee huogodoo ang gi de Ia.

⁵³ Gei digau i di gowaa deela la hagalee benebene Jesus, idimaa, gu modongoohia bolo Mee e hana gi Jerusalem.

⁵⁴ Di madagoaa nia dama agoago a Maa go James mo John ne iloo di mee dela ne hai, meemaa ga heeu, “Meenei Tagi, Goe e hiihai bolo gimaua gi gahigahia di ahi gi haneia i di langi e hagahuaidu digaula?”*

⁵⁵ Jesus ga huli adu, ga hagabuhi gi meemaa. ⁵⁶ Nomuli, gei Jesus mo ana dama agoago gaa hula gi tuai waahale.

Digau ala ga daudali a Jesus

(Matthew 8.19-22)

⁵⁷ Di nadau hula i hongo di ala, taane ga helekai gi Jesus, “Au ga daudali Goe gi nia gowaa huogodoo ala e hana ginai Goe.”

⁵⁸ Jesus ga helekai, “Nia manu ‘fox’ la nadau bongoo i golo, nia manu mamaangi nadau waehongo i golo, gei Tama Tangada la dono madagowaa e kii ge e hagamolooloo Ia ai.”

⁵⁹ Gei Mee ga helekai gi tuai daane, “Daudali mai i ogu muli.”


Gei taane ga helekai, “Meenei, dumaalia mai, au e hana edanu dogu damana i mua.”

* 9.54: 2 Kings 1.9-16

⁶⁰ Jesus ga helekai, “Dugu anga gi digau mmade gi danumia nadau gau mmade. Gei goe hana, hagadele ina Teenua King o God.”

⁶¹ Tuai dangada ga helekai, “Au e daudali adu Goe, gei i mua dumaalia mai gi di au e hana, e hai dagu hagaaloho gi digau dogu hale.”*

⁶² Gei Jesus ga helekai gi mee, “Tangada ma ga daamada e haga maluu dana hadagee, ge e mmada gi muli, le e balumee gi Teenua King o God.”



10

Jesus e hagau digau madahidu maa lua

¹ Muli nia mee aanei, Tagi gaa hili ana gau agoago e madahidu maa lua, ga hagau dau dogolua i mua dono hana ginia waahale mono gowaa ala e hana ginai.

² Mee ga helekai, “Taugai gu damana, gei digau ngalua le e hogoohi. Dalodalo anggi Tagi o taugai deenei gi hagau ina mai digau ngalua e hagi taugai.* ³ Hula!

* 9.61: 1 Kings 19.20 * 10.2: Matthew 9.37-38

Au e hagau goodou gadoo be nia dama siibi laa lodo nia paana lodo geinga.* ⁴ Goodou hudee kae mee dugu hadu, budehede dagidagi mee, be nia suudi. Hudee tuu bolo e hagaaloho gi tangada i hongo di ala.* ⁵ Godou madagoaa gaa dau i di hale, gei goodou gi helekai i mua boloo, 'Di aumaalia gii noho i baahi di hale deenei.' ⁶ Maa tangada e aloho i di aumaalia e noho i golo, heia godou hagaaloho di noho di aumaalia gii noho i dono baahi. Maa ga hagalee, kaina godou hagaaloho di aumaalia gi muli. ⁷ Noho i di hale deela, inu ge miami nia mee ala ma ga gowadu gi goodou, idimaa, digau hai hegau le e wanga nadau hui. Hudee hula gi di hale nei mo di hale nei.* ⁸ Goodou ma gaa hula gi lodo di waahale, ga benebene go digaula, geina nia mee ala ma ga dugu adu gi godou mua. ⁹ Goodou hagamaaloo ina aga digau magi ala i di waahale deela, mo di agoago gi digaula boloo, 'Teenua King o God la gu hanimoi gu hoohoo adu gi goodou.' ¹⁰ Goodou ma gaa hula gi dahi waahale, ga hagalee benebene go digaula, goodou hula gi hongo nia ala o di waahale deela, helekai boloo,* ¹¹ 'Nia gelegele o godou waahale ala e pigi gi madau babaawae, ga duidui e hai baahi adu gi goodou. Gei goodou gi iloo bolo Teenua King o God la gu hanimoi, gu hoohoo adu gi goodou!' ¹² Au e hagi adu gi goodou di tonu bolo di Laangi Hagi aga, God koia e dumaalia gi Sodom i di waahale deela!*

Nia waahale de hagadonu

(Matthew 11.20-24)

¹³ "E huaidu adu gi di goe Chorazin, ge e huaidu labelaa gi Bethsaida! Maa nei boloo nia mogobuna ala ne hai i

* 10.3: Matthew 10.16 * 10.4: Matthew 10.7-14; Mark 6.8-11; Luke 9.3-5 * 10.7: 1 Corinthians 9.14; 1 Timothy 5.18 * 10.10: Nnegau 13.51 * 10.12: Genesis 19.24-28; Matthew 11.24; 10.15

gulu baahi, la ne hai i Tyre mo Sidon, digaula la guu noho gi lala hua i mua, gu ulu gi nia gahu manawagee mo di haga dogolia nadau gili gi nia luaahi, e haga modongoohia bolo ginaadou gu maaliu gi daha mo nadau huaidu.*

¹⁴ I di Laangi Hagi aga, God e mada dumaalia gi Tyre mo Sidon i goolua. ¹⁵ Capernaum, goe e bida hiihai e haga menege aga goe gi di langi i nua? Goe gaa hudu gi lodo di gowaa hagaduadua!”*


¹⁶ Jesus ga helekai gi ana dama agoago, “Be koai e hagalongo adu gi goodou, ia ne hagalongo mai gi di Au. Be koai hagalee hagalongo adu gi goodou, ia digi hagalongo mai gi di Au. Be koai hagalee hagalongo mai gi di Au, ia digi hagalongo gi Tangada dela ne hagau mai Au.”*

Di lloomoi gi muli digau madahidu maa lua

¹⁷ Digau agoago madahidu maa lua ne lloomoi gi muli ge e tenetene huoloo, ga helekai gi Jesus, “Meenei Tagi, nia hagataalunga huaidu gu hagalongo mai gi gimaadou ne hagabagi digaula gi daha mo nia daangada i do ingool!”

¹⁸ Jesus ga helekai, “Au guu mmada gi Setan e doo iha i di langi, e maahina be di ila. ¹⁹ Hagalongo! Au gu gowadu gi goodou di mogobuna gii mee goodou di taele i hongo nia gihaa mono ‘scorpion’, gei gi aali goodou laa hongo nia mogobuna o di hagadaumee, deai di mee e hagahuaidu goodou ai.*

* 10.13: Isaiah 23.1-18; Ezekiel 26.1–28.26; Joel 3.4-8; Amos 1.9-10; Zechariah 9.2-4 * 10.15: Isaiah 14.13-15 * 10.16: Matthew 10.40; Mark 9.37; Luke 9.48; John 13.20 * 10.19: Pisalem 91.13



Di manu 'scorpion'

²⁰ Hudee tenetene bolo nia hagataalunga huaidu la gu hagalongo adu gi goodou, gei gii tene hua gi godou ingoo ala guu hihi i di langi.”

Tenetene o Jesus

(Matthew 11.25-27; 13.16-17)

²¹ Di madagoaa hua deela, gei Jesus guu honu i di tene mai di Hagataalunga Dabu, Mee ga helekai, “Tamana, Tagi o di langi mo henuailala. Au e danggee idimaa i dau haga modongoohia ang gi digau ala e de modongoohia ginaadou nia mee ala ne hagammuni Kooe i digau ala bolo ginaadou e kabemee mo di iloo nia mee. Uaa, Tamana, deenei di mee e manawa tene ginai Goe gi heia gii gila.

²² “Dogu Damana ne gaamai gi di Au nia mee huogodoo. Tangada e iloo Tama ai, dela hua go Tamana. Gei dei tangada e iloo Tamana ai, dela hua go Tama mo ana daangada ne hilihili belee haga modongoohia aga Ia.”*

* 10.22: John 3.35; 10.15

²³ Gei Jesus gaa huli gi ana dama agoago ga helekai mada ginaadou, “Goodou gu haadanga lamalia, i goodou ga gidee nia mee ala e mmada ginai goodou. ²⁴ Au e hagi adu gi goodou, bolo e logo nia soukohp mono king nogo hiihai huoloo bolo ginaadou e mmada gi nia mee ala e mmada ginai goodou, gei digaula ne deemee. Digaula nogo hiihai gi longono nia mee ala e longono goodou, gei digaula digi longono.”

Di ala kai tangada Samaria humalia

²⁵ Tangada haga donudonu haganoho ne hanimoi belee hagamada a Jesus, ga helekai, “Tangada agoago, au e hai dagu aha, gei au ga hai mee gi di mouli dee odi?”*

²⁶ Jesus ga helekai gi mee, “Di Beebaa Dabu e helekai bolo aha? Dehee dau haga modongoohia nia maa?”

²⁷ Gei taane ga helekai, “Aloho i Dimaadua go doo God aga i lodo do manawa hagatau, mo do hagataalunga hagatau, mo oo mahi hagatau, mo au maanadu hagatau, gei gi aloho i tangada dela i do baahi, gii hai be do aloho i di goe.”*

²⁸ Gei Jesus ga helekai, “E hai donu. Heia nia maa, gei goe ga mouli.”*

²⁹ Gei tangada haga donudonu haganoho e hiihai gii donu humalia, ga heeu gi Jesus, “Tangada dela i dogu baahi la koai?”

³⁰ Jesus ga helekai, “Dahi daane e hagatanga i Jerusalem e hana gi Jericho, gaa kumi go digau haga dogolege, gaa dada ono goloo, ga daaligi a mee, gu hoo hoo gaa made, ga diiagi i golo. ³¹ Tangada hai mee dabu ga haneia i hongo di ala deela, gaa mmada gi taane deela, gei mee gaa hana hua i di baahi i golo o di ala.

* 10.25: Matthew 22.35-40; Mark 12.28-34

* 10.27: Leviticus 19.18;

Deuteronomy 6.5 * 10.28: Leviticus 18.5

³² Tangada Levi ga hanimoi labelaa i di ala deela, gaa mmada gi taane deela, geia gaa hana labelaa i di baahi i golo o di ala. ³³ Gei tangada Samaria ga heehee mai i di ala deela, ga gidee taane deela, geia gu aloho huoloo i mee.* ³⁴ Mee ga hanadu gi mee gaa dui ana lolo mono waini gi nia gowaa moholehole, ga haga pigipigi, ga hagama a mee gi hongo dana manu, gaa lahi gi di hale noho dangada, ga madamada humalia ai. ³⁵ Ga hooaga luada, gei mee gaa wanga ana bahihadu silber e lua gi tagi o di hale deela, ga helekai, ‘Benabena ina mua taane deenei. Au gaa hana, ga hanimoi laa, gaa hui nia mee huogodoo ala ne hai hegau iei goe gi mee.’”

³⁶ Gei Jesus ga haga lawa dana ala kai deenei, ga heeu, “Goe e maanadu ma koai i nia daangada dogodolu aanei la ne hai be tangada hoohoo gi tangada dela ne daaligi go digau gaiaa?”

³⁷ Tangada haga donudonu haganoho ga helekai, “Go tangada dela ne hagamaamaa a mee.”

Gei Jesus ga helekai, “Hana laa, heia beela.”

Jesus e heetugi gi Martha mo Mary

³⁸ Di hana o Jesus mo ana dama agoago i hongo di ala, Mee ga hanimoi gi di waahale, gei di ahina go Martha ga benebene a Mee.* ³⁹ Mee dono duaahina ahina igolo, go Mary, nogo noho hua i baahi nia wae o Tagi, e hagalongo gi nia agoago a maa. ⁴⁰ Martha gu lodo huaidu i ana moomee huogodoo ala e hai, ga hanadu gi Jesus, ga helekai, “Meenei Tagi, Goe e de hei e Goe dogu duaahina deela guu hai au gii hai nia hegau huogodoo? Helekai gi mee gi hanimoi, e hagamaamaa au.”

* 10.33: 2 Kronikel 28.15 * 10.38: John 11.1

⁴¹ Tagi ga helekai, “Martha, Martha, goe e de nnoomaalia i nia mee e logo. ⁴² Di mee donu belee hai, la dela guu hai go Mary, gei e deemee di daa gi daha mo mee.”

11

Jesus e agoago talodalo
(*Matthew 6.9-13; 7.7-11*)

¹ Dahi laangi hua, gei Jesus nogo dalodalo i dahi gowaa. Dono madagoaa ne lawa, gei tangada i ana dama agoago ga helekai gi Mee, “Tagi, aago ina mai gimaadou di hai talodalo be John dela ne aago gi ana dama agoago.”

² Jesus ga helekai gi digaula, “Di godou madagoaa ma ga dalodalo, dalodalo beenei: ‘Tamana, do ingoo gi dabuaahia. Do henua gi dau mai.

³ Gaamai madau meegai gi humalia mai gi gimaadou i nia laangi huogodoo.

⁴ Weedee madau ihala la gi daha, idimaa, gimaadou e dumaalia gi nia hala o nia daangada huogodoo

ala ne hai mai gi gimaadou. Hudee dugu anga gimaadou gi nia hagamada haingadaa.’ ”

⁵ Jesus ga helekai, “Dolomaa, tei goodou gaa hana gi di hale o dono ehoo i di madahidi waelua di boo, ga helekai boloo, ‘Dogu ihoo hagaaloho, dumaalia mai, gaamai hunu palaawaa e dolu, ⁶ idimaa, dogu ihoo ne hanimo i gi dogu hale, gei agu meegai belee haangai a mee ai.’ ⁷ Dolomaa, do ehoo la ga helekai mai i lodo dono hale boloo, ‘Hudee haga daadaamee ina au! Di bontai la guu tai, gei au mo agu dama la guu kii. Au e deemee di duu i nua e gowadu au mee.’ ⁸ Malaa, e hai behee? Au e hagi adu gi goodou bolo maa mee ga hagalee e duu i nua e gowadu di palaawaa

idimaa goe di hoo ni oono, gei mee gaa duu i nua hua ga gowadu au mee huogodoo ala e hiihai ginai goe, idimaa go do de langaadia di dangidangi hagamahi.

⁹ “Malaa, Au e hagi adu gi goodou: Goodou dangidangi, gei goodou ga hai mee ginai. Halahala ina, gei goodou ga gidee goodou. Dugidugi, gei di bontai la ga huge adu gi goodou. ¹⁰ Idimaa, digau ala e dangidangi, le e hai mee ginai. Gei digau ala e halahala, la ga gidee. Gei di bontai le e huge ang gi tangada ma ga dugidugi.

¹¹ “Ma tamana koai i godou lodo e wanga dana gihaa lodo geinga gi dana dama daane ma ga dangi ang gi deia di iga? ¹² Mee ga hiihai gi di ngogo, gei goe e wanga gi mee di ‘scorpion’? ¹³ Goodou digau huaidu, gei goodou e iloo di wanga nia mee ala e humalia gi godou dama. Nia holongo e hia gi nonua a Tamana i di langi e wanga di Hagataalunga Dabu gi digau ala e dangidangi ang gi de Ia?”

Jesus mo Beelzebul

(Matthew 12.22-30; Mark 3.20-27)

¹⁴ Jesus e hagabagi dana hagataalunga huaidu e deemee di leelee, gei di madagoaa di maa dela ne ulu gi daha, taane deela ga daamada ga leelee. Digau dogologowaa-hee gu goboina huoloo. ¹⁵ Gei hunu gau e helekai boloo, “Ma go Beelzebul, di tagi o nia hagataalunga huaidu, dela ne wanga gi Mee di mogobuna e hagabagi digaula gi daha.”*

¹⁶ Hunu gau e hiihai e haga hala a Jesus, gei digaula ga helekai gi Mee gi heia ana mogobuna e haga modongoochia bolo go God dela ne haga mogobuna Ia.* ¹⁷ Gei Jesus gu iloo Ia nia maanadu digaula, ga helekai, “Tei henua ma gaa wwae hagabuulinga ga heheebagi

* 11.15: Matthew 9.34; 10.25 * 11.16: Matthew 12.38; 16.1; Mark 8.11

i nadau mehanga, la hagalee waalooloo. Gei digau di hale ma ga dee buni, le e meheuheu dagidahi. ¹⁸ Malaa, tenea o Setan magaa hai ono buini, ga heheebagi i nadau mehanga, ga mooho, ga hagalee. Goodou e hai bolo Au gu hagabagi dagu hagataalunga huaidu, idimaa, Beelzebul ne gaamai nia mogobuna ala ne hai hegau iei Au. ¹⁹ Maa e hai beenaa go dagu hai ne hagabagi digaula, gei digau ala e daudali goodou, le e hagabagi nadau hagataalunga huaidu behe? Digau ala e daudali goodou, la gu haga modongoohia bolo goodou e hala. ²⁰ Gei deeai, ma go di mogobuna o God dela ne hagabagi ai agu hagataalunga huaidu, gei di maa e haga modongoohia bolo Teenua King o God la gu hanimoi gi goodou.

²¹ “Ma ga iai taane maaloo i golo gutogomaalia ono goloo heebagi, e hagaloohi dono hale, gei ono goloo huogodoo e benebene humalia. ²² Maa taane maaloo gi nonua ga heebagi, ga haga magedaa a mee, gei taane maaloo deenei gaa kae nia goloo heebagi ala nogo gana ginai tangada dono hale, gaa duwwe nia mee ala ne gaiaa.

²³ “Tangada dela hagalee dau mai gi di Au, le e hai baahi mai gi di Au, gei tangada dela hagalee hagamaama Au e hagabudu agu mee, le e wweuwweu nia maa dagidahi.*

Di hanimoi gi muli o di hagataalunga huaidu

(Matthew 12.43-45)

²⁴ “Di hagataalunga huaidu ma ga ulu gi daha mo tangada, geia gaa hana i hongo tenea damana maango, e halahala dana gowaa e hagamolooloo ai, gei digi gida dana gowaa, geia ga hagamaanadu boloo, ‘Au gaa hana gi muli gi dogu hale.’ ²⁵ Geia gaa hana gi muli, gaa mmada gi dono hale gu madamma, gei gu benebene hagahumalia. ²⁶ Gei mee gaa hana labelaa, ga laha mai ana hagataalunga e hidu ala koia e huaidu gi nonua i deia,

* 11.23: Mark 9.40

gaa noho i golo. I di lawa, gei tangada deela la koia gu huaidu gi nonua i mee matagidagi.”

Tenetene e donu

²⁷ Jesus nogo helekai nia mee aanei, gei di ahina ga helekai aga i lodo digau dogologo, boloo, “E maluagina go tinana dela ne haanau Goe ge ne haga uu Goe!”

²⁸ Gei Jesus ga helekai, “Deeai, digau ala e maluagina la go digau ala e hagalongo gi nia helekai a God, mo di daudali nia maal!”

Di hiihai gi nia mogobuna bolo gi heia

(Matthew 12.38-42)

²⁹ Di lloomoi hua digau dogologo ga haganiga a Jesus, gei Mee ga helekai, “E huaidu huoloo go digau dolomeenei! Digaula e hiihai gi di mogobuna, gei di mogobuna e hai gi digaula ai, dela hua go di mogobuna ne hai gi Jonah.* ³⁰ Soukohp Jonah la ne hai di haga modongoochia anggi digau Nineveh, gadoo be Tama Tangada e hai di haga modongoochia anggi digau dolomeenei.* ³¹ I di Laangi Hagi aga, di king ahina o Sheba gaa duu i nua, ga hagahuaidu digau ala dolomeenei, idimaa, mee ne hanimoi haga mogowaa loo belee hagalongo gi nia agoago kabemee a King Solomon. Gei Au e hagi adu gi goodou bolo ma iai Tangada i ginei, e koia e mada aamua i Solomon.* ³² I di Laangi Hagi aga, gei digau Nineveh gaa tuu gi nua, ga hagahuaidu goodou, idimaa, digaula guu huli gi daha mo nadau huaidu i di nadau madagoaa ne hagalongo gi nia agoago Jonah. Gei Au e hagi adu gi goodou bolo ma iai Tangada i ginei e koia e mada aamua i Jonah!*

* 11.29: Matthew 16.4; Mark 8.12 * 11.30: Jonah 3.4 * 11.31: 1 Kings 10.1-10; 2 Kronikel 9.1-12 * 11.32: Jonah 3.5

Di maalama o tuaidina
(*Matthew 5.15; 6.22-23*)

³³ “Deai tangada e dudu dana malama ga haga mmuni di maa be haga holi gi di boolo ai, dela hua e dugu gi hongo di gowaa dugu malama, gei nia daangada gaa mee di gidee di maalama i di nadau lloomoi.* ³⁴ O golomada le e hai be di malama ni do huaidina. O golomada la ga humalia, ge do huaidina hagatau la ga maalama huoloo. Gei o golomada la ga huaidu, ge do huaidina hagatau la ga bouli dongoeho. ³⁵ Malaa, heia gii donu bolo di maalama dela i oo lodo la hagalee di bouli. ³⁶ Maa do huaidina hagatau la guu honu i di maahina, di bouli ai, di maa ga maahina hagatau, gadoo be di maahina o di malama ma ga maahina ia i oo nua.”

Jesus e hagahuaidu nia Pharisee mo digau haga donudonu haganoho
(*Matthew 23.1-36; Mark 12.38-40*)

³⁷ Jesus ne lawa dana helehelekai, gei dahi Pharisee gaa gahi a Mee e miami ginaua, gei Mee gaa hana gaa noho gi lala belee miami. ³⁸ Di Pharisee deela ga homouli gi Jesus dela digi tonu ono lima i mua dono miami. ³⁹ Gei Tagi ga helekai gi mee, “Goodou go nia Pharisee e haga madammaa hua nia gili godou ibu mono pileedi, gei godou lodo le e honu i nia lagamaaloo mono hai mee huaidu. ⁴⁰ Goodou e dadaulia! Ma hagalee go God dela ne hai di gili laa daha mo lodo? ⁴¹ Wanga ina nia mee ala i lodo godou ibu mo godou pileedi gi digau hagaloale, gei nia mee huogodoo la ga madammaa adu gi goodou.

⁴² “E huaidu huoloo adu gi goodou nia Pharisee. Goodou e wanga gi God dahi baahi e madangaholu o godou manga laagau hai suub e haga ingoo bolo ‘mint’ mono ‘rue’ mono manga laagau huogodoo ala i golo, gei hagalee haga dahidamee di tonu mo di aloho o God. Goodou heia

* 11.33: *Matthew 5.15; Mark 4.21; Luke 8.16*

di tonu mo di aloho i mua, ga nomuli gaa hai laa nia mee ala i golo.*

⁴³ “E huaidu huoloo adu gi goodou nia Pharisee. Goodou e hiihai gi nia lohongo ala e aamua ilodo nia synagoo, gei e hiihai bolo nia daangada gi hagaaloho ge gi hagabalagau ina goodou i nia gowaa huihui mee. ⁴⁴ E huaidu huoloo adu gi goodou! Goodou e hai gadoo be nia daalunga ala digi hihia ginai nia ingoo gi nonua, ala e heehee ai nia daangada nonua, gei e de iloo ginaadou nia maa.”

⁴⁵ Tangada e dahi i digau haga donudonu haganoho ga helekai gi Mee, “Tangada Agoago, dau helekai ne hai, la gu hagahuaidu labelaa gimaadou!”

⁴⁶ Jesus ga helekai, “E huaidu huoloo labelaa go goodou go digau haga donudonu haganoho. Goodou e hagama godou mee daamaha gi hongo nia daangada, gei godou madaalima ne holo belee hagamaamaa digau ala e aamo nia maa ai. ⁴⁷ E huaidu huoloo adu gi goodou! Goodou e hau nia daalunga humalia ang gi nia soukohp, aalaa go nia soukohp ne daaligi go godou maadua mmaadua.

⁴⁸ Di godou hai deenei e haga modongoochia bolo goodou e donu hua gi nia hai godou maadua mmaadua ne hai. Digaula gu daaligi nia soukohp, gei goodou guu hau nia daalunga digaula. ⁴⁹ Di kabemee o God e helekai boloo, ‘Au e hagau agu soukohp mono gau kae hegau gi digaula, gei digaula ga daaligi hunu ginaadou ge e hagaduadua hunu ginaadou.’ ⁵⁰ Gei digau dolomeenei le e hagaduadua i tadaaligi o nia soukohp ala ne mmade mai taamada di hai o henuailala, ⁵¹ mai taaligi o Abel gaa tugiloo gi taaligi o Zechariah dela ne daaligi i mehanga di gowaa hai tigidaumaha mo di Gowaa Dabu. Uaa, Au e hagi adu gi

* 11.42: Leviticus 27.30

goodou bolo digau ala dolomeenei, le e hagaduadua i nia mee ala ne hai go digaula huogodoo!*

⁵² “E huaidu huoloo adu gi goodou go digau haga donudonu haganoho! Goodou nogo daahi di gii dela belee huge di bontai di hale o di iloo nia mee. Goodou digi hula gi lodo, gei goodou nogo tai digau ala bolo ginaadou e ulu gi lodo!”

⁵³ Di madagoaa Jesus ne hagatanga i di gowaa deela, gei digau haga donudonu haganoho mo nia Pharisee ga daamada ga hagahuaidu a Mee, ga heheeu gi Mee nia mee e logo, ⁵⁴ e hagamada belee haga hala a Mee, bolo gi hagalongo ginaadou gi Mee ma ga helekai hala.

12

Di haga iloo hai baahi gi nnegau ngudu golomada

(Matthew 10.26-27)

¹ Dogologowaahee ne lloomoi gi di gowaa e dahi, gu deeo di heehee. Jesus ga helekai matagidagi gi ana dama agoago, “Goodou halagaliga i daha mo nia ‘yeast’ o nia Pharisee, aalaa go nia hegau ngudu golomada digaula.* ² Nia mee ala guu gahu gii nngala, le e huge aga. Gei nia mee huogodoo ala gu hagammuni, le e haga modongoohia gi iloo.* ³ Gei godou mee ala ne helekai ai i lodo di bouli, la ga longono i lodo di maalama. Gei godou mee ala ma ga helekai haga moolee i lodo di ruum tai, la ga longono mai i nia dahuhu o nia hale.

Ma koai belee madagu ai

(Matthew 10.28-31)

⁴ “Au e hagi adu gi goodou, ogu ihoo hagaaloho, hudee mmaadagu i digau ala e daaligi tuaidina, ga nomuli

* 11.51: Genesis 4.8; 2 Kronikel 24.20-21 * 12.1: Matthew 16.6; Mark 8.15

* 12.2: Mark 4.22; Luke 8.17

ga deemee di hai di mee dela koia e mada huaidu. ⁵ Au ga haga modongoohia adu gi goodou, be di maa ko ai belee madagu ai. Madagu i God, dela ono mogobuna e hudu goe gi lodo di ahi dee odi, i muli do daaligi gii made. Au e helekai adu, goodou gi mmaadagu i Mee.

⁶ “Nia lomilomi e lima le e huihua gi nia teenedi e lua, gei God e hagalee de langahia dahi lomilomi. ⁷ Nia ngaahulu o godou libogo hogi la guu lawa di dau. Deelaa laa, hudee mmaadagu, goodou koia e mada hagabalagau laa hongo nia lomilomi e logo!

*Di haga modongoohia mo di hudu gi daha Christ
(Matthew 10.32-33; 12.32; 10.19-20)*

⁸ “Au e hagi adu gi goodou bolo digau ala e haga modongoohia ginaadou i mua digau dogologo bolo ginaadou nia dama ni aagu, gei Tama Tangada e haga modongoohia aga digaula labelaa i mua digau di langi a God. ⁹ Gei digau ala e haga de iloo ginaadou Au i mua digau dogologo, gei Tama Tangada ga haga de iloo digaula labelaa i mua digau di langi a God.

¹⁰ “Tangada dela ga helekai hai baahi gi Tama Tangada le e mee hua di dumaalia ginai, gei tangada dela ga helekai hai baahi gi di Hagataalunga Dabu, le e deemee di dumaalia ginai.*

¹¹ “Di madagoaa digaula gaa lahi goodou e gabunga i lodo nia synagoege, be i mua nia gobinaa mo nia dagi, goodou hudee mmaanadu e logo be goodou ga duuli goodou behe, be goodou ga helekai bolo aha.* ¹² Idimaa, di Hagataalunga Dabu ga aago laa goodou i di madagoaa deela, be goodou e helekai bolo aha.”

Di ala kai o tangada maluagina dadaulia

* 12.10: Matthew 12.32; Mark 3.29
13.11; Luke 21.14-15

* 12.11: Matthew 10.19-20; Mark

¹³ Taane i lodo digau dogologo ga helekai gi Jesus, “Tangada Agoago, helekai gi dogu duaahina gi duwvaa i gimaui nia mee di mau damana.”

¹⁴ Jesus ga helekai, “Dogu ihoo hagaaloho, ma koai ne gaamai gi di Au di tonu e haga donu goolua, be e duwwe di maluagina i goolua?”

¹⁵ Gei Mee ga helekai gi digaula huogodoo, “Gii pula i goodou i nia hagagailaa huogodoo, idimaa, di mouli hagatau o tangada la hagalee go nia mee ala e hai mee ginai, eimaha hogi ma mee tangada maluagina behee.”

¹⁶ Jesus ga helekai gi digaula di ala kai deenei: “Tangada maluagina dana gowaa dela koia e huwa nia huwa laagau humalia. ¹⁷ Gei mee ga hagabaubau boloo, ‘Dagu gowaa ai e benebene agu huwa laagau huogodoo. Au gaa hai dagu aha?’ ¹⁸ Mee gaa bida hagamaanadu boloo, ‘Deenei dagu hai gaa hai: Au ga oho gi lala agu doogoo, gaa hau gi mada llauehe gi oo, e dugu agu huwa laagau huogodoo, mo ogu goloo ala i golo. ¹⁹ Gei au ga hagamaanadu mai gi di au boloo: Goe taane haadanga lamalia, goe guu hai au mee humalia huogodoo ala ga hai hegau iei goe nia ngadau e logo. Mouli haingoohia, miami, inu mo di tenetene adu gi di goe.’ ²⁰ Gei God ga helekai gi mee, ‘Goe tangada dadaulia! Di boo hua deenei gei goe ga diiagi do mouli, gei di maa koai dela ga hai mee gi nia mee huogodoo nogo benebene kooe?’ ”

²¹ Jesus ga helekai haga muliagina, “Deenei di hai e hai gi digau ala e haga bae nadau maluagina anga hua gi ginaadou, gei digaula la hagalee maluagina i mua o God.”

Hagadagadagagee gi God

(Matthew 6.25-34)

²² Jesus ga helekai gi ana dama agoago, “Deelaa laa Au e helekai adu bolo gi hudee hei e goodou nia meegai ala e hiihai ginai belee mouli ai, be go nia goloo ala

e gahu ai goodou. ²³ Di mouli le e mada hagabalabagau i nia meegai, ge tuaidina le e mada hagabalabagau i nia goloo gahu. ²⁴ Mmada gi nia manu mamaangi: digaula hagalee dogi nadau lii laagau, be e hadi taugai. Digaula nadau hale dugu mee ai, gei God e haangai digaula! Goodou le e mada hagabalabagau i nia manu mamaangi! ²⁵ Ma tangada i goodou e mee di mouli mada waalooloo i dana hagabaubau e logo? ²⁶ Maa goodou e deemee di hai di mee dulii loo deenei, gei goodou e hagabaubau e logo i nia mee ala i golo eimaha? ²⁷ Mmada gi nia akai lodo geinga ala e tomo. Digaula hagalee ngalua e gahu ginaadou. Gei Au e hagi adu gi goodou bolo di King Solomon mo ono maluagina la hagalee madamada i tei akai aanei.* ²⁸ Go God dela e haga gahu nia geinga lodo henua, nia geinga ala e tomo dangi nei, daiaa gu hagalee, guu dudu i lodo di mee dudu geinga, malaa, Mee hagalee ga haga gahu labelaa goodou? Godou hagadonu le e lligi!

²⁹ “Goodou hudee manawa gee i nia madagoaa e logo, be goodou gaa gai be e inu godou aha. ³⁰ Idimaa, digau e noho i lodo di bouli henuailala e hagabaubau nia mee beenei. Di godou Damana le e iloo di godou dee dohu. ³¹ Gei goodou gi haa manawa hua i dono Henua, gei Mee ga hagahumalia goodou gi nia mee aanei.

Nia maluagina i di langi

(Matthew 6.19-21)

³² “Hudee mmaadagu dagu hagabuulinga siibi dulii nei, i di godou Damana le e manawa tenetene di gowadu gi goodou Teenua King o God. ³³ Huia gi daha godou mee huogodoo, wanga ina nia bahihadu gi digau hagalole. Heia godou mee dugu hadu hagalee mooho, mo di benebene godou maluagina i di langi i di gowaa dela

* 12.27: 1 Kings 10.4-7; 2 Kronikel 9.3-6

hagalee ngudu ai, idimaa, digau gaiaa e kae nia maa ai, ge hagalee gai go manu. ³⁴ Idimaa, di gowaa dela iai godou maluagina, deela di gowaa e haa manawa ai goodou.

Digau hagaloohi hagamadabouli

³⁵ “Gi togomaalia gi tei mee ga hanimoi, gi ulu i nia goloo hai hegau, ge godou malama gi ula,* ³⁶ gadoo be digau hai hegau e tali nadau dagi e hanimoi gi muli i tagamiami haga hai lodo. Mee ga hanimoi ga dugidugi, gei digaula ga hagalimalima gaa huge di bontai gi mee.*

³⁷ E maluagina go digau hai hegau ala gaa mmada ginai di nadau dagi e aala, gu togomaalia gi dono hanimoi. Au e hagi adu gi goodou di tonu, mee ga daa gi daha dono gahu mahaa, gaa hai digaula gii noho gi lala, ga ngalua gi digaula. ³⁸ E maluagina go digau ala ma gaa mmada ginai mee gu togomaalia, ma e aha maa mee ga hanimoi i di madahidi waelua di boo, be no muli! ³⁹ Gei goodou guu mee hua di iloo bolo maa tangada dono hale ga iloo di madagoaa tangada gaiaa ga hanimoi, gei mee hagalee hai a mee gi ulu gi lodo dono hale.* ⁴⁰ Goodou gi togomaalia labelaa, idimaa, Tama Tangada le e hanimoi i di aawaa dela hagalee e kana go goodou.”

Tangada hai hegau manawa dahi mo tangada hai hegau manawa logo

(Matthew 24.45-51)

⁴¹ Peter ga helekai, “Meenei Tagi, di ala kai deenei laa mai gi gimaadou, be gi digau huogodoo?”

⁴² Gei Tagi ga helekai, “Ma koai tangada hai hegau manawa dahi ge kabemee? Tangada beenei gaa dugu go dono dagi e dagi di hale mono hegau, ge e wanga nia duhongo meegai gi digau hai hegau i di madagoaa e tau anga. ⁴³ E maluagina huoloo go tangada hai hegau

* 12.35: Matthew 25.1-13 * 12.36: Mark 13.34-36 * 12.39: Matthew 24.43-44

ma gaa mmada ginai dono dagi e hai nia mee aanei i dono hanimoi gi dono hale! ⁴⁴ Au e hagi adu gi goodou di tonu bolo tangada dono hale, la gaa dugu a mee e dagi ono golo huogodoo. ⁴⁵ Maa tangada hai hegau ga maanadu bolo dono dagi le e duai nau ga hanimoi laa, gei mee ga daamada ga dadaaligi nia daane mono ahina huogodoo, geia ga miami ga inuinu gi libaliba. ⁴⁶ Dahi laangi hua di tagi ga hanimoi, gei tangada hai hegau deela e hagalee talitali a mee, e de iloo ia di madagoaa dela e hanimoi iei mee. Di tagi ga duuduu a mee haga ligiligi, gaa hai a mee gii dau gi di hagaduadua o digau de hagalongo.

⁴⁷ “Tangada hai hegau dela e iloo nia mee o dono dagi ala bolo gi heia, geia hagalee hai nia maa, tangada deela le e hagaduadua kono. ⁴⁸ Gei tangada hai hegau dela e de iloo nia mee o dono dagi ala bolo gi heia, geia gu hai hala, tangada deela le e hagaduadua maamaa.

“Nia mee e logo e hai gii hai go tangada dela ne wanga ginai nia mee e logo, gei nia mee e mada logo gi nonua le e hai gii hai go tangada dela ne wanga ginai nia mee mada logo.

Di waewae ne hidi mai i Jesus

(Matthew 10.34-36)

⁴⁹ “Au ne hanimoi belee dudu henuailala, gei dogu hiihai le e hai bolo ma gii lawa di gaa! ⁵⁰ Au belee kae di babdais, gei Au gu lodo huaidu huoloo gaa dae loo gi di kae di maa.*

⁵¹ Goodou e hagabau bolo Au ne hanimoi belee gaamai di aumaalia gi henuailala? Deesai, hagalee di aumaalia, gei go di waewae. ⁵² Dangi nei gaa hana, gei digau o di hale dogolima ga dee buni, dogodolu ga hai baahi gi dogolua, gei dogolua ga hai baahi gi dogodolu.

⁵³ “Nia damana ga hai baahi ang gi nadau dama daane, gei nia dama daane ang gi nadau damana. Nia dinana ga hai baahi ang gi nadau dama ahina, gei nia dama ahina

* 12.50: Mark 10.38

ang gi nadau dinana. Nia dinana dau aga ga hai baahi ang gi nadau dama ahina dau aga, gei nia dama ahina dau aga ga hai baahi ang gi nadau dinana dau aga.”*

Di iloo di madagoaa

(Matthew 16.2,3)

⁵⁴ Jesus e helekai labelaa gi nia daangada, “Goodou ma gaa mmada gidi gololangi ehanaga idai, gei goodou ga helekai bolo di uwa gaa doo, gei di maa gaa doo. ⁵⁵ Goodou ga hagalongoia di madangi e hanimoi i ngaaga, gei goodou e helekai bolo ma ga welengina, gei di maa ga welengina. ⁵⁶ Goodou digau hai hegau ngudu golomada! Goodou e iloo nia hagamodongoohia i di gili di langi mo henuailala, malaa, goodou le e aha ala e de iloo nia hagamodongoohia o di madagoaa dolomeenei?

Hagahumalia ina goe gi do hagadaumee

(Matthew 5.25-26)

⁵⁷ “Goodou e aha ala e hagalee halahala gii donu goodou di hai di mee dela e hai donu? ⁵⁸ Maa tangada ga hai baahi adu gi di goe i nnaganoho, gaa lahi goe gi di gabunga, hagahumalia ina gulu mehanga i mua doo hana gi di gabunga. Maa goe ga hagalee hai beenei, mee gaa dagi goe gi mua tangada hai gabunga, gaa wanga goe gi tinggee, gaa haa gi lodo di hale galabudi. ⁵⁹ Au e hagi adu gi di goe bolo goe gaa noho i golo gaa dae loo gi di madagoaa ma gaa hui do boibana gii odi!”

13

Huli gi daha mo o huaidu gi dee made goe

¹ Di madagoaa deela, hunu gau nogo i golo ga helekai gi Jesus i digau Galilee ala ne daaligi go Pilate i di nadau madagoaa nogo hai nadau tigidaumaha ang gi God. ² Jesus

* 12.53: Micah 7.6

ga helekai, “Idimaa digau Galilee ala ne daaligi beelaa, gei goodou e hagabau bolo nadau huaidu le e huaidu laa hongo nia huaidu digau Galilee ala i golo? ³ Gei deesai! Au e hagi adu gi goodou bolo maa goodou ga hagalee huli gi daha mo godou huaidu, goodou huogodoo le e mmade be digaula. ⁴ E hai beheee go digau dilongoholu maa walu nogo i Siloam* ala ne mmade i di angulaa ne hinga gi hongo digaula? Goodou e hagabau bolo digaula koia e huaidu i digau huogodoo ala i Jerusalem? ⁵ Gei deesai! Au e helekai adu bolo maa goodou hagalee huli gi daha mo godou huaidu, gei goodou huogodoo le e mmade gadoo be digaula.”

Di ala kai o di laagau ‘fig’ dee huwa

⁶ Jesus ga helekai gi digaula i di ala kai deenei, “Taane dana laagau ‘fig’ e tomo i lodo dana gowaa dogi waini. Mee e haga dinadina di ‘fig’ be di maa guu huwa, gei digi huwa. ⁷ Gei mee ga helekai gi dana dangada hai hadagee boloo, ‘Nia ngadau e dolu nogo hani hanimoi iei au belee mmada be di maa guu huwa, gei au digi gidee nia huwa. Hele ina di maa gi lala. Ma e aha dela e haga hai hegau balumee nia gelegele.’ ⁸ Gei tangada hai hadagee ga helekai, ‘Meenei, dugua gii hai dono ngadau e dahi i golo, gei au gaa geli di gili di maa, ga haga oho di maa. ⁹ Hila hua di laagau ‘fig’ deenei gaa huwa humalia i lodo di ngadau e dahi, gei di maa gu humalia, maa ga hagalee, gei goe gaa hele laa di maa gi lala.’ ”

Jesus e hagahili di ahina habehabe i di Laangi Sabad

¹⁰ Dahi Laangi Sabad, gei Jesus nogo agoago i lodo synagoojee. ¹¹ Di ahina i golo iai di hagataalunga huaidu i ono lodo dela ne hai a mee gii magi nia ngadau e madangaholu maa walu. Mee guu biga gi mua,

* 13.4: “Siloam” di gowaa i lodo Jerusalem.

gu deemee di duu donu gi nua. ¹² Di madagoaa Jesus ne gidee Ia, ga gahi mai a mee, “Di ahina, goe gu mehede gi daha mo doo magi!” ¹³ Jesus gaa dugu ono lima gi hongo o mee. Di madagoaa hua deela, di ahina deela gu duu donu gi nua mo di hagaamu a God.

¹⁴ Gei tagi synagooee gu hagawelewele gi Jesus dela ne haga hili dana magi i di Laangi Sabad, ga helekai gi nia daangada, “Nia laangi e ono ala e ngalua ai gidaadou, goodou hagahili ina godou magi i nia laangi aalaa, hagalee i di Laangi Sabad.”*

¹⁵ Gei Tagi ga helekai gi mee, “Goodou digau hai hegau ngudu golomada! Goodou e hagamaahede godou kau mo godou ‘donkey’ i nadau lohongo, e dagi gi daha belee haga inu i di Laangi Sabad. ¹⁶ Deenei la tangada ni di hagadili o Abraham dela nogo lawalawa go Setan i nia ngadau e madangaholu maa walu. Mee hagalee belee hagamehede i di Laangi Sabad?” ¹⁷ Telekai a Mee deenei la gu haga langaadia ono hagadaumee, gei nia daangada dogologo le e tenetene gi nia mee haga goboina huogodoo ala nogo hai go Mee.

Di ala kai o di lii laagau ‘mustard’
(Matthew 13.31-32; Mark 4.30-32)

¹⁸ Jesus ga heeu, “Teenua King o God le e hai be di aha? Ma e hagatau ko Au gi di aha? ¹⁹ Ma e hai beenei: Dahi daane ne kae ana lii laagau ‘mustard’, gaa dogi i dana gowaa. Di laagau gaa tomo, ga damana, gei nia manu gaa hai nadau waehongo i nia manga o di maa.”

Di ala kai o nia ‘yeast’
(Matthew 13.33)

²⁰ Jesus ga heeu labelaa, “Au ga hagatau Teenua King o God gi di aha? ²¹ Ma e hai beenei: Di ahina ne kae

* 13.14: Exodus 20.9-10; Deuteronomy 5.13-14

ana ‘yeast’, ga unugi dana haga munga palaawaa, gei di palaawaa la gaa tanga.”

Di bontai mada giigi

(Matthew 7.13-14,21-23)

²² Jesus guu hana laa lodo nia waahale llauehe mo lligi e agoago i dono ala adu gi Jerusalem. ²³ Tangada ga heeu gi Mee, “Meenei, ma digau hua dului ala ga mouli?”

Jesus ga helekai gi digaula, ²⁴ “Heia godou mee ala e mee gi ulu goodou i di bontai mada giigi, idimaa, digau dogologo e hagamahi bolo ginaadou e ulu, gei e deeme. ²⁵ Di tagi o di hale gaa tai di bontai, gei goodou gaa tuu i malaelae ga daamada ga dugidugi di bontai mo di helekai boloo, ‘Meenei, hugea mai di bontai gi gimaadou.’ Gei mee ga helekai adu gi goodou boloo, ‘Au e de iloo be goodou nelloomoi i hee!’ ²⁶ Gei goodou ga helekai boloo, ‘Gimaadou nogo miami, nogo inu madalia goe, gei goe nogo agoago i di madau waahale!’ ²⁷ Gei mee ga helekai labelaa, ‘Au e de iloo be goodou nelloomoi i hee. Tuuidaha mo au, goodou huogodoo digau huaidu!’* ²⁸ Goodou ga tangitangi ga gadigadi godou niha i di godou madagoaa ma gaa mmada gi Abraham, Isaac mo Jacob, mo nia soukohp huogodoo i lodo Teenua King o God, i di madagoaa dela e kili goodou gi daha.* ²⁹ Nia daangada ga lloo ia i dua ge e lloo aga i dai, ga lloomoi i ngeia ge e lloomoi i ngaaga, gaa noho gi lala i tagamiami i lodo Teenua King o God.* ³⁰ Gei digau ala mugi muli dolomeenei gaa hula laa mua, gei digau ala e mugi mua dolomeenei gaa hula laa muli.”*


Jesus e aloho i Jerusalem

(Matthew 23.37-39)

* 13.27: Pisalem 6.8 * 13.28: Matthew 22.13; 25.30 * 13.29: Matthew 8.11-12 * 13.30: Matthew 19.30; 20.16; Mark 10.31

³¹ Di madagoaa hua deela, hunu Pharisee ne loomoi gi Jesus, ga helekai gi Mee, “Hana gi daha gi tuai gowaa, idimaa, Herod e hiihai e daaligi Goe.”

³² Gei Jesus ga helekai gi digaula, “Hula, haga iloo gi di manu ‘fox’ deela, bolo Au e hagabagi agu hagataalunga huaidu, gei e hagahili agu magi dangi nei mo daiaa, gei au gaa lawa agu hegau i tolu laangi.



Di manu ‘fox’

³³ Au gaa hana i dogu ala dangi nei, daiaa mo dono daiaa. Ma hagalee donu bolo soukohp e daaligi i tuai gowaa, dela hua i Jerusalem.

³⁴ “Jerusalem, Jerusalem! Goe gu daaligi nia soukohp mo di dilidili digau kae hegau a God ala ne hagau adu gi di goe. Nia holongo e hia Au ne hiihai di holo ogu lima, e daabui mai goodou huogodoo, gadoo be teduu ahina ma ga daabui mai ana dama gi lala ono bakau, gei goe digi dumaalia mai gi di Au! ³⁵ Gei dau Hale Daumaha la ga diiagi. Au e haga modongoohia adu gi di goe, bolo

goe ga deemee di mmada mai gi di Au, gaa dae loo gi do madagoaa ma ga helekai boloo, 'God gu haga maluagina Tangada dela ga hanimoi i di ingoo o Dimaadua.' ”*

14

Jesus e hagahili taane magi

¹ Dahi Laangi Sabad, gei Jesus ne hana ga miami i di hale o di Pharisee aamua, gei nia daangada e madamadaagi a Mee hagatau. ² Dahi daane e haga hula ono wae mo ono lima, gaa hana gi Jesus. ³ Gei Jesus ga huli adu gi digau haga donudonu haganoho mo nia Pharisee, ga heeu, “Tadau haganoho le e mahuge ang gi di hagahili di magi i di Laangi Sabad be deesai?”

⁴ Gei digaula digi helekai. Jesus ga dahi mai taane deela, ga hagahili, ga hagau gi dono hale. ⁵ Nomuli, gei Mee ga helekai gi digaula, “Dolomaa tei goodou ga iai dana dama daane be dana kau gaa doo gi lodo di monowai i di Laangi Sabad, mee hagalee ga dahi aga di maa hagalmalima i di Laangi Sabad deela?”*

⁶ Gei digaula gu deemee di helekai gi telekai a Maa.

Di manawa hila gi lala mo tumaalia o tangada

⁷ Jesus gu modongoohia digau ala negahi mai gi tagamiami e hilihili nia gowaa koia e humalia e noho ginaadou, gei Mee gaa kai dana ala kai deenei gi digaula: ⁸ “Maa tangada gaa gahi goe gi tagamiami haga hai lodo, hudee noho i di gowaa dela koia e humalia. Goe gaa noho i golo, gei tangada e mada hagabalabagau i oo nua, ga gahi aga labelaa,* ⁹ gei tangada dela negahi goolua, ga helekai adu gi di goe bolo goe gi wanga ina di lohongo gi mee e noho ai. Gei goe ga langaadia,

* 13.35: Pisalem 118.26; Jeremiah 22.5 * 14.5: Matthew 12.11 * 14.8: Agoago Podo 25.6-7

gaa noho gi lala i di gowaa mugi lala loo. ¹⁰ Maa goe gaa gahi go tangada gi hanaga gi tagamiami haga hai lodo, noho i di gowaa dela i mugilala loo, gei tangada dela ne gahi goe ga helekai adu boloo, 'Dogu ihoo hagaaloho, hanaga laa nei gi di gowaa e humalia.' Ma gaa hai beenei, le e hai goe gi hagabalagau i mua o ehoo ala ne gahi aga dalia goe. ¹¹ Idimaa, digau ala e hagalaamua ginaadou, le e hai gi mugi lala, gei digau ala e hai ginaadou gi mugi lala loo, le e hai gi hagalaamua."*

¹² Gei Jesus ga helekai gi tagi di hale, "Goe ma gaa hai dau hagamiami oodee be hiahi, hudee gahia o ehoo, be o duaahina, be oo gau, be go digau maluagina ala i do baahi, idimaa, digau aanei gaa gahi labelaa goe. Ma gaa hai beenei, digaula gaa hui adu labelaa do humalia.

¹³ Goe ma gaa hai dau hagamiami damana, gahia digau hagaloale, digau moocho nadau huaidina, digau habehabe, mo digau deegida, ¹⁴ gei goe ga haga maluagina, idimaa, digaula e deemee di hui goe gi muli labelaa. God e hui labelaa goe i di laangi dela e mouli aga digau humalia."

Di ala kai tagamiami aamua

(Matthew 22.1-10)

¹⁵ Tangada e dahi i digau ne gahi aga nogo noho i tee-bele, ne longono ia nia helekai aanei, ga helekai gi Jesus, "E maluagina go digau ala ma gaa noho i tagamiami aamua i Teenua King o God!"

¹⁶ Gei Jesus ga helekai gi mee, "Tangada ne hai dana hagamiami damana, gei mee gaa gahi ana gau dogologo, ¹⁷ gaa dae mai di madagoaa tagamiami, gei mee ga hagau dana dangada hai hegau gi ana gau ala ne gahi boloo, 'Lloomoi, nia mee huogodoo gu togomaalia!' ¹⁸ Gei tangada nei mo tangada nei i digaula gaa hai nadau dangidangi. Tangada matagidagi ga helekai gi tangada

* 14.11: Matthew 23.12; Luke 18.14

hai hegau boloo, 'Au guu hui dagu gowaa, gei au belee hai gii mmada gi di gowaa. Dumaalia mai mua gi dagu dangidangi.' ¹⁹ Tangada i golo boloo, 'Au guu hui agu kau madangaholu, gei au belee hana, e hagadina nia maa. Dumaalia mai gi di au.' ²⁰ Gei tangada i golo e helekai boloo, 'Au dogo hai hua dogu lodo, gu deemee di hanadu.'

²¹ "Gei tangada hai hegau gaa hana gi muli, ga hagi anga gi dono dangada aamua nia mee huogodoo ala ne hai. Gei tangada aamua gu hagawelewele huoloo, ga helekai boloo, 'Hana gi hongo nia ala llauehe mo lligi o di waahale, laha mai digau hagaloale, digau mooho nadau huaidina, digau deegida, mo digau habehabe.' ²² Tangada hai hegau ga helekai gi dono dagi boloo, 'Dau hegau la guu hai, gei di maa e oo hua igolo.' ²³ Gei tangada aamua ga helekai gi tangada hai hegau boloo, 'Hana gi nia ala llauehe mo lligi o tenua. Laha mai digau huogodoo gii honu i lodo dogu hale. ²⁴ Gei au e hagi adu gi goodou bolo tangada e dahi i digau ala ne haga gahi le e momi dana mee i dagu hagamiami ai!'"

Daudali Jesus

(Matthew 10.37-38)

²⁵ Dahi madagoaa, digau dogologo nogo hula i muli o Jesus, gei Mee ga huli adu, ga helekai, ²⁶ "Tangada dela e hanimo i gi di Au, le e deemee di hai tama agoago ni aagu, maa ia hagalee e aloho i di Au laa hongo dono damana mo dono dinana, dono lodo mo ana dama, ono duaahina daane mo ahina, mo dono huaidina.* ²⁷ Tangada dela hagalee kae dono loobuu donu ga hanimo i ogu muli, le e deemee di hai tama agoago ni aagu.*

²⁸ "Maa tei goodou ga maanadu bolo e haga duu dana angulaa, geia gii noho gi lala i mua, gi hagabaulia di hui

* 14.26: Matthew 10.37 * 14.27: Matthew 10.38; 16.24; Mark 8.34; Luke 9.23

di maa, be ana bahihadu le e dohu e mee di hau di maa gii lawa. ²⁹ Maa mee hagalee hai beenei, geia e deemee di hau di angulaa gii lawa i muli di hau di baba, gei nia daangada gaa mmada gi dana moomee, ga gadagada, ga hagahuaidu a mee boloo, ³⁰ ‘Mee ne daamada ne hau dana angulaa, geia e deemee di haga lawa di maa.’

³¹ “Maa dahi king gaa hana mo ana gau dauwa e madangaholu mana (10,000) belee heebagi gi di king dela e hanimoi mo ana gau dauwa e madalua mana (20,000), mee gaa noho gi lala i mua, e hagamaanadu be ia e maaloo di heebagi gi di king deela. ³² Maa mee ga deemee, geia ga hagau ana gau kae hegau e heetugi gi di king dela i golo i dono madagoaa e mogowaa ai, e dangidangi anga bolo hagalee hai tauwa.”

³³ Jesus ga duudagi ana helekai, “E hai gadoo be goodou. Tangada i goodou ai e mee di hai dagu dama agoago, maa ia digi lawa gi daha mo nia mee huogodoo ala e hai mee ginai.

Nia toolo ono hadinga ai
(*Matthew 5.13; Mark 9.50*)

³⁴ “Nia toolo le e humalia, gei nia mmala o nia maa ma ga hagalee, di hai i golo ai e haga mmala nia maa labelaa. ³⁵ Gei nia maa hagalee dahidamee labelaa gi nia gelegele, gi di haga oho nia laagau, ala hua e kili gi daha. Tangada ono dalinga i golo, gi hagalongo!”

15

Di ala kai siibi ne ngala
(*Matthew 18.12-14*)

¹ Dahi laangi hua, gei digau hagabudu dagitedi dogologo mo digau huaidu ne lloomoi gi baahi o Jesus e hagalongo gi Mee.* ² Nia Pharisee mono gau haga donudonu

* 15.1: Luke 5.29-30

haganoho ga daamada, ga helehelekai huaidu boloo, “Taane deenei e hagaahi mai digau huaidu, gei e miami i baahi digaula!” ³ Gei Jesus ga helekai di ala kai deenei:

⁴ “Dolomaa tangada i goodou ana siibi e lau, gei siibi e dahi gaa ngala, gei mee gaa hai dana aha? Mee gaa dugu ana siibi e matiwa maa hiwa gi lodo di abaaba, gaa hana, ga halahala di siibi e dahi dela ne ngala gaa dae loo gi dono gidee ia a mee.



‘Sheep’ ne ngala

⁵ Dono madagoaa ga gidee ia a mee, geia gu tenetene huoloo, ga dahi aga a mee gi hongo ono bakau, ⁶ ga aamo gi dono hale, mee ga gahi mai ono ehoo hagaaloho, mo digau ala i dono baahi, ga helekai gi digaula boloo, ‘Au gu tenetene. Au gu gidee au dagu siibi dela ne ngala. Gidaadou gaa budu di maa!’

⁷ “Au e hagiadu gi goodou bolo di tenetene mada damana i di langi anggi tangada huaidu e dahi ma ga maliu dono manawa, laa hongo di tenetene anggi digau matiwa maa hiwa ala e noho humalia, hagalee loo

bolo e huli nadau manawa.

Bahihadu silber ne ngala

⁸ “Dolomaa di ahina ana teenedi silber e madangaholu, gaa ngala e dahi, gei mee gaa hai dana aha? Mee gaa dudu dana malama, ga duidui dono hale, ga madamada hagatau i nia madagowaa huogodoo i lodo dono hale gaa dae loo gi dono gidee ia di maa. ⁹Dono madagoaa ne gidee ia di maa, mee ga gahi mai ono ehoo hagaaloho mo digau ala i dono baahi gi di gowaa e dahi, ga helekai gi digaula boloo, ‘Au gu tenetene, idimaa, au gu gidee dagu teenedi silber dela ne ngala. Gidaadou gaa budu di maa.’

¹⁰ “Au e hagi adu gi goodou bolo digau di langi a God le e tenetene labelaa gi tangada huaidu e dahi ma gaa huli hoou dono manawa.”

Nia dama daane dogolua ne nngala

¹¹ Jesus ga helekai, “Taane ana dama daane dogolua. ¹²Tama dulii ga helekai gi tamana boloo, ‘Gaamai dogu duhongo i o maluagina dolomeenei.’ Gei tamana gaa duwwe ono maluagina i ana dama dogolua. ¹³Muli hua nia laangi dulii, tama daane dulii gaa hui gi daha di baahi dono maluagina, gaa hana mo ana bahihadu gi tenua mogowaa loo, ga haguwwou ana bahihadu gi di balu mouli. ¹⁴Mee gu haga haihegau ana mee huogodoo ala ne hai mee ginai gii odi. Gei tau magamaga damana guu hai i hongo tenua deela, gei mee gu daamada gu hiigai. ¹⁵Mee gaa hana ga ngalua i baahi tangada donu o tenua deela ne hagau a mee gi lodo dana gowaa dugu biigi belee madamada humalia ai. ¹⁶Mee gu hiihai huoloo bolo ia ga miami dalia nia biigi, gei tangada e wanga nia meegai gi mee ai. ¹⁷Muliagi loo, gei mee gaa donu ang gi deia, gaa huli dono manawa, ga helekai boloo, ‘Digau ngalua dogu damana e logo nadau meegai e deemee digai, gei au deenei

hua e hiigai, gaa made! ¹⁸ Au gaa duu i nua, gaa hana gi dogu damana, ga helekai gi mee boloo, Tamana, au gu ihala ang gi God mo adu gi di goe. ¹⁹ Au e dee tau loo di hagingoo bolo tama ni aau. Duguina hua au be tangada e dahi i au gau ngalua.' ²⁰ Gei mee ga du gi nua, gaa hana gi muli gi dono damana.

"Mee dela hua e mogowaa idi hale, gei tamana gugidee ia a mee, gu aloho huoloo, gaa lele, ga bulubulu mai a mee, ga hongihongi. ²¹ Tama ga helekai boloo, 'Tamana, au gu ihala ang gi God, gei gu ihala adu gi di goe. Au hagalee tau loo di hagingoo bolo tama ni aau.' ²² Gei tamana gagahi mai ana gau hai hegau, ga helekai gi digaula boloo, 'Hagalimalima, gaamai di gahu ulu laa tua dela koia e humalia, haga ulu ina a mee. Haga ulu ina di buulei, mono suudi. ²³ Gaa lawa, goodou daaligidia tamaa kau dela e kaedahi e humalia, e hai tadau hagamiami hagaamu. ²⁴ Idimaa, mee tama ni aagu guu made, gei dolomeenei gei mee gu mouli. Mee guu ngala, gei dolomeenei gu gila mai labelaa.' Gei tagamiami ga daamada.

²⁵ "Di madagoaa hua deela, tama daane madua nogo i lodo henua. Dono haneia, ga hoohoo gi di hale, gei mee ga longono nia lee daahili mono gaalege. ²⁶ Mee ga gahigahi tangada hai hegau, ga hee boloo, 'Ma di aha dela e hai?' ²⁷ Tangada hai hegau ga helekai, 'Do du-aahina daane la gu hanimoi, gei do damana gu daaligi tamaa kau dela e kaedahi e humalia huoloo, idimaa, mee gu gidee ia a mee labelaa.'

²⁸ "Tuaahina daane madua gu hagawelewele huoloo, gu hagalee hana gilodo di hale. Gei tamana o maa ga hanimoi gi malaetae, ga dangidangi gi mee bolo gi ulu gilodo. ²⁹ Gei mee ga helekai manawa gee gi dono damana boloo, 'Mmada, nia ngadau huogodoo aanei, gei

au nogo ngalua adu gi di goe gadoo be di hege, gei au digi de hagalongo loo gi au helekai, gei dau maa di aha ne gaamai gi di au? Di kuudi hogi ne gaamai kooe belee hai dagu hagamiami gi ugu ihoo hagaaloho ai! ³⁰ Gei dau dama daane deenei nogo hagauwwou o maluagina i dono mouli be di manu, gei dono hanimoi, goe gu daaligi tamaa kau dela e kaedahi e humalia gi mee.’ ³¹ Tamana ga helekai, ‘Dagu dama, nia madagoaa huogodoo gei goe i ginei i dogu baahi, gei agu mee huogodoo la nia mee ni aau. ³² Gei gidaadou belee budu ge tenetene, idimaa, do duaahina la guu made, dolomeenei gei mee gu mouli. Mee guu ngala, dolomeenei gei mee guu gida.’ ”

16

Tangada huaidu benebene mee

¹ Jesus ga helekai gi ana dama agoago, “Taane maluagina dana dangada hai hegau igolo e benebene ono goloo. Dono dagi gu hagailoo ginai bolo dana dangada hai hegau le e hagauwwou ono maluagina. ² Tagi ga gahi mai dana dangada haihegau ga helekai boloo, ‘Ma di aha dela ne longono eau? Gaamai di beebaa haga modongoohia agu mee nogo benebene kooe, idimaa, goe gu hagalee hai dagu dangada benebene mee.’ ³ Tangada benebene mee ga hagamaanadu boloo, ‘Dogu dagi la gaa daa au gi daha mo dagu moomee. Au gaa hai dagu aha? Au e bagege di geli agu aloalo, gei au e langaadia di madamadau agu mee. ⁴ Au e iloo dagu mee dela gaa hai, di madagoaa dagu moomee ga daa gi daha mo au, gei au ne belee hai ugu ihoo, gii mee di benebene au i nadau guongo.’

⁵ “Mee ga gahi mai digau huogodoo ala e boibana gi dono dagi. Mee ga heeu gi tangada matagidagi boloo, ‘Do boibana gi dogu dagi le e hia?’ ⁶ Gei mee ga helekai, ‘Nia ulu mee lolo olib e lau.’ Tangada benebene mee ga helekai

gi mee, ‘Noho gi lala, hihia gi madalima.’ ⁷ Gei mee ga helekai labelaa gi tangada i golo boloo, ‘Goe e boibana e hia?’ Gei mee ga helekai boloo, ‘Nia ulu mee ‘wheat’ e mana (1,000).’ Tangada benebene mee ga helekai gi mee, ‘Deenei do boibana, hihia gi walu lau (800).’

⁸ “Gei di mee ne gila mai, tagi o tangada benebene mee tilikai deenei ga hagaamu a mee dela ne hai ana mee kabemee, idimaa, digau henuailala la koia e kabemee di hai nia mee ang gi ginaadou laa hongo digau ala guu hai nia daangada ni di maalama.”

⁹ Jesus ga helekai, “Au e hagi adu gi goodou gi hai hegau i godou goloo o henuailala ang gi nia daangada, gei digaula gaa hai nia hoo hagaaloho ni goodou i di madagoaa nia goloo ma ga hagalee, gei God ga benebene goodou gi lodo tenua dono hagaodi ai. ¹⁰ Be koai e hai hegau donu i nia mee lligi, geia e hai hegau donu i nia mee llauehe. Be koai e hai hegau ihala i nia mee lligi, geia e hai hegau ihala i nia mee llauehe. ¹¹ Maa goodou hagalee hai hegau donu i nia maluagina henuailala, ma koai dela ga dugu adu nia maluagina ala e donu gi hai hegau ai goodou? ¹² Maa goodou ga hagalee hai hegau donu gi nia mee o tuai dangada, ma koai ga gowadu au mee donu?”

¹³ “Tangada hai hegau e deemee di hege gi nia dagi dogolua, i mee ga dee hiihai gi tagi e dahi, ga aloho i tagi dela i golo. Mee ga hagalaamua tangada e dahi, ga haga balumee tangada dela i golo.* Goodou e deemee di hai nia hege ni God mo nia bahihadu.”

Hunu helekai mai baahi o Jesus

(Matthew 11.12-13; 5.31-32; Mark 10.11-12)

¹⁴ Nia Pharisee ne longono nia mee aanei, ga helekai gadagada i Jesus, idimaa, digaula e hiihai huoloo gi nia bahihadu. ¹⁵ Jesus ga helekai, “Goodou e hai goodou

* 16.13: Matthew 6.24

bolo gii mmada hagahumalia ginai nia daangada, gei God e iloo Ia godou manawa. Idimaa, nia mee ala e haga dahidamee go nia daangada, la nia balumee i mua o God.

¹⁶ “Nnaganoho Moses mo nia Beebaa o nia Soukohp, nogo mogobuna hua dono hai hegau ai gaa dae loo gi di madagoaa o John Babdais. Nomuli, go di Longo Humalia o Teenua King o God guudele, gei digau huogodoo e hagamahi gii dau ginaadou.* ¹⁷ Ma e mada haingoochia go di langi mo henuailala ma ga hagalee, i di mee dela koia e dulii loo i nnaganoho ma ga hagalee.*

¹⁸ “Taane dela ma gaa hudu gi daha dono lodo, gaa hai dono lodo gi tuai ahina, geia gu ihala i di hala o di mouli hai be di manu. Gei taane dela ma gaa lodo gi di ahina dela ne diagi go dono lodo, le e hala labelaa i di hala mouli hai be di manu.*

Taane maluagina mo Lazarus

¹⁹ “Taane maluagina e ulu i nia gahu koia e hui ngadaa, ge e mouli baagawa i nia laangi huogodoo, ²⁰ gei tangada hagaloale i golo, dono ingoo go Lazarus, guu buni magibala dono gili, e nnoo mau e laha mai gi di ngudu di bontai o tangada maluagina deenei, ²¹ e noho belee gai nia meegai ligiligi monnono i teebele tangada maluagina, gei nia paana e loomoi e tobotobo nia magibala o maa.

²² “Taane hagaloale gaa made, gaa lahi go digau di langi gi baahi o Abraham gaa noho i tagamiami i di langi. Taane maluagina gaa made labelaa, gaa danu. ²³ I lodo di gowaa digau mmade mee guu mmae anggi deia huoloo, gei mee gaa mmada gi Abraham e gila mai hag-amogowaa, gei Lazarus i dono baahi. ²⁴ Mee ga wolo adu,

* 16.16: Matthew 11.12-13 * 16.17: Matthew 5.18 * 16.18: Matthew 5.32; 1 Corinthians 7.10-11

‘Tamana Abraham! Aloho mai gi di au! Hagau ina mai a Lazarus e haga tiu dono madaalima e haga tiu dogu holole gi magalillili, i di au guu mmae huoloo i lodo di ahi deenei!’

²⁵ “Abraham ga helekai, ‘Dagu dama daane, goe e langahia e goe do madagoaa nogo mouli, gei goe nogo hai mee gi nia mee humalia, gei Lazarus nogo hai mee gi nia mee huaidu. Dolomeenei gei mee etenetene, gei goe e mmaemmae i lodo di ahi. ²⁶ Gei di maa di lua llala i tadau mehanga, digau ala e hiihai e lloo adu be loomoi la gu deeme.’ ²⁷ Taane maluagina ga helekai, ‘Au e dangidangi adu, tamana Abraham, hagau ina a Lazarus gi di hale dogu damana, ²⁸ di gowaa dela iei ogu duaahina daane dogolima. Hagauina a mee gi haga iloo gi digaula gi de lloo aga hua digaula gi di gowaa haga mmaemmae deenei.’

²⁹ “Gei Abraham ga helekai, ‘O duaahina nadau gau haga iloo i golo: go Moses mo nia Soukohp, gei ginaadou gi hagalongo gi digaula.’ ³⁰ Taane maluagina ga helekai, ‘Tamana Abraham, deena la hagalee dohu! Maa tangada ne mouli aga i di made gaa hana gi digaula, gei digaula ga maalui mai gi daha mo nadau huaidu.’ ³¹ Gei Abraham ga helekai, ‘Digaula ma ga hagalee hagalongo gi Moses mo nia soukohp, ginaadou le e deeme hogi di maalui nadau manawa, ma e aha maa tangada dela ne made ga mouli aga, gaa hana gi digaula.’”

17

Di huaidu

(Matthew 18.6-7,21-22; Mark 9.42)

¹ Jesus ga helekai gi ana dama agoago, “Nia mee ala e hai nia daangada gii too gi lodo di huaidu e mee di kila aga, malaa e huaidu huoloo gi tangada dela e hai nia maa

gi kila aga! ² E humalia hua di nnoo ginai di hadu damana gi dono uwa, ga hagabubulu, e koia e humalia i dana hai digau lligi aanei gii hala! ³ Gii pula i godou mee ala e hai!*

“Do duaahina daane ma ga hai hala, gei goe heia a mee gii donu. Mee gu maliu ono lodo, goe dumaalia gi mee. ⁴ Gei mee ga hai hala adu gi di goe haga hidu i di laangi e dahi, ga hanaga haga hidu gi di goe, ga helekai bolo ia gu maliu ono lodo, gei goe gi dumaalia gi mee.”

Di hagadonu

⁵ Ana dama agoago ga helekai boloo, “Meenei Tagi, hagamaaloo ina aga madau hagadonu!”

⁶ Tagi ga helekai, “Maa godou hagadonu la gaa lligi be di lii o di laagau ‘mustard’, gei goodou e mee hua di helekai gi di laagau damana deenei boloo, ‘Daagia goe, hana, dogia goe gi lodo di moana!’ Gei di maa ga hagalongo adu gi goodou.

Tegau o tangada hai hegau

⁷ “Dolomaa tei goodou dana hege etaa ana geinga i lodo dau hadagee, be e haangai au siibi i lodo henua. E hai behee? Dono madagoaa ma ga hanadu gi di goe, goe ga helekai gi mee bolo aha: ‘Hagalimalima, noho gi lala, miami?’ ⁸ Deeai! Goe ga helekai gi mee boloo: ‘Hagatogomaalia ina dogu hagangudu hiahi, ulu gi lodo o goloo dunu meegai e hai hegau mai gi di au. I muli dogu miami mo di inu, gei goe ga miami laa.’ ⁹ Di hege dela ne haga gila aga nnelekai o dono dagi le e tau di danggee ginai, be deeai? ¹⁰ E hai gadoo be goodou. Di godou haga kila aga nia mee huogodoo ala belee hai, goodou la gi helekai hua boloo, ‘Gimaadou nia balu hege hua, ne hai hua madau duhongo hegau.’”

Jesus e hagahili digau magi dilongoholu

* 17.3: Matthew 18.15

¹¹ Nomuli, gei Jesus ga hanadu i mehanga Samaria mo Galilee gi Jerusalem. ¹² Dono ulu adu gi lodo di waa-hale dului, Mee ga heetugi gi nia daane magi genegene dilongoholu e tuu mai haga mogowaa. ¹³ Gei digaula gaa wwolo gi Mee, “Meenei Jesus! Tagi aamua! Aloho mai gi gimaadou!”

¹⁴ Gei Jesus ga gidee digaula, ga helekai, “Hula gi baahi digau hai mee dabu, e haga dina goodou.”

I di nadau hula, gei digaula gu madammaa nadau gili.* ¹⁵ Di madagoaa tangada e dahi i digaula ne gidee dono gili gu madammaa, geia ga hanimoi gi muli gi Jesus, gaa wolo gi nua ga hagaamu a God.

¹⁶ Mee gaa bala ia gi mua nia wae o Jesus ga hagaamu a Mee. Mee taane Samaria. ¹⁷ Jesus ga heeu, “Ma hagalee digau dilongoholu ala ne hili nadau gili? Aahee digau dogohiwa? ¹⁸ Ma e aha tangada tuadimee hua ne hagaamu a God?” ¹⁹ Gei Jesus ga helekai gi taane, “Duu i nua, hana, do hagadonu dela ne hagahili goe.”

Di dau mai Teenua King o God

(Matthew 24.23-28,37-41)

²⁰ Hunu Pharisee ga heeu gi Jesus be Teenua King o God le e dau mai ma gaa hee.

Mee ga helekai, “Teenua King o God hagalee dau mai i di hai e gidee. ²¹ E deai tangada e hai boloo, ‘Mmada, ma deenei!’ be e hai boloo, ‘Ma deela!’ idimaa, Teenua King o God la dela hua i godou baahi.”

²² Gei mee ga helekai gi ana dama agoago, “Di madagoaa ga dau mai, gei goodou ga hiihai e mmada gi di laangi e dahi i nia laangi o Tama Tangada, gei goodou e de gidee di maa. ²³ Digau i golo ga helekai adu gi goodou boloo, ‘Mmada, Mee deela!’ be ga helekai boloo, ‘Mee deenei!’ Gei goodou hudee hula gi malaetae e mmada.

* 17.14: Leviticus 14.1-32

²⁴ Di hai o di laangi o Tama Tangada e hai gadoo be di ila dela e daba i di baahi o di langi, ga ina loo gi di baahi dela igolo. ²⁵ Matagidagi gei Mee e hai loo gi hagaduadua ge e haga balumee go nia daangada o di madagoaa dolomeenei.

²⁶ “Nia mee ala ne hai i tolongo o Noah, aalaa nia mee gaa hai i nia laangi o Tama Tangada.* ²⁷ Nia daangada huogodoo nogo miamiami ge inuinu, nia daane mono ahina nogo haga haga hai lodo, gaa dae loo gi di laangi o Noah ne ulu gilodo dono waga, gei toloo gaa hai, ga daaligi digaula huogodoo gii mmade.*

²⁸ “Nogo hai labelaa be tolongo Lot. Digau huogodoo nogo miamiami hua mo di inuinu, nogo huihui nadau mee mo di hui gi daha, nogo dogi nadau gowaa ge haga duu aga nadau hale.* ²⁹ Gei di laangi dela ne hagatanga ai a Lot i Sodom, di ulaula mo dono uwa hadu ‘sulfur’ gaa too ia i di langi, ga daaligi digaula huogodoo. ³⁰ Deelaa di hai gaa hai i di laangi o Tama Tangada ma ga hagagila mai.

³¹ “Di laangi deelaa, maa tangada i tua tala di hale, gi hudee haneia gi lodo di hale bolo e kae ono goloo. E hai gadoo be tangada i lodo henua, hudee hai bolo e hana gi dono hale.* ³² Goodou gi langahia di lodo o Lot!* ³³ Digau ala e hagamaha e benebene nadau mouli, nadau mouli la ga hagalee. Gei digau ala e wanga dehuia nadau mouli, ga hai mee gi di mouli.* ³⁴ Au e hagi adu gi goodou bolo di boo deelaa, nia daangada dogolua e kii di hada e dahi, tangada e dahi gaa lahi, gei e dahi gaa dubu i golo. ³⁵ Nia ahina dogolua e mmili nau lii ‘wheat’ i di gowaa e dahi, di

* 17.26: Genesis 6.5-8 * 17.27: Genesis 7.6-24 * 17.28: Genesis 18.20–19.25 * 17.31: Matthew 24.17-18; Mark 13.15-16 * 17.32: Genesis 19.26 * 17.33: Matthew 10.39; 16.25; Mark 8.35; Luke 9.24; John 12.25

ahina e dahi gaa lahi, gei e dahi gaa dubu i golo. ³⁶ [Nia daangada dogolua i lodo henua, tangada e dahi gaa lahi, gei e dahi gaa dubu i golo.]

³⁷ Nia dama agoago a maa ga heeu gi Mee boloo, “Tagi, di gowaa ihee?”

Gei Jesus ga helekai, “Di gowaa dela iai tuaidina dangada made, nia manu mamaangi gai dangada ga dagabuli mai gi golo!” *

18

Di ala kai o di ahina guu made dono lodo mo tangada hai gabunga

¹ Jesus gaa kai dana ala kai gi ana dama agoago belee aago digaula gi di hai dalodalo i nia madagoaa huogodoo, gi de paagege digaula. ² Mee ga helekai, “I lodo dahi waahale nogo iai tangada hai gabunga, dela hagalee madagu i God, ge hagalee hagabau nia daangada. ³ Di ahina guu made dono lodo i lodo di waahale deela, ga hanimoi gi mee, e dangidangi i di tonu, bolo gi hagamaamaa ina eia, e hai gii donu tangada dela e hai baahi ang gi deia. ⁴ Gu waalooloo gei tangada hai gabunga deela digi haga gila ina tangidangi a maa. Muli mai hua, gei tangada hai gabunga gaa bida hagamaanadu i ono lodo boloo, ‘Au tangada hagalee madagu i God, ge hagalee hagabau nia daangada, ⁵ gei di maa nia haingadaa huogodoo di ahina deenei e haga deaadee au, au ga wanga gi mee di tonu, gi de hani hanimoi hua a mee, ga hagabuhi au!’ ”

⁶ Gei Tagi ga helekai, “Hagalongo gi nnelekai tangada hai gabunga huaidu deela. ⁷ E hai behee? God la ga hagalee gabunga hagamaamaa ana daangada donu ala e tangi ang gi de la i nia hagamaamaa i di boo mo di aa? Mee ga hagalee duai dana hagamaamaa digaula! ⁸ Au e hagi adu gi goodou bolo Mee ga gabunga gii hai be nia hiihai digaula, ge e hai hogi gi limalima. Malaa,

* 17:37: Matthew 24:28

Tama Tangada la ga gidee di hagadonu i henuailala i dono hanimoi?"

Di ala kai o di Pharisee mo tangada hagabudu dagitedi

⁹ Jesus ne kai labelaa dana ala kai i digau ala e hai bolo ginaadou e donu ge humalia, ge mmada hagahuaidu gi digau huogodoo ala i golo. ¹⁰ Mee ga helekai, "Nia daane dogolua ne hula gi di Hale Daumaha belee dalodalo. Tangada e dahi di Pharisee, gei di hoo o maa la tangada hagabudu dagitedi.

¹¹ "Di Pharisee le e duu madatanga i daha modogoia, ga dalodalo boloo, 'Au e danggee adu gi di Goe, meenei God, au hagalee hagagailaa, hagalee hai mee hala, be e hai be di manu be digau ala i golo. Au e danggee adu gi di Goe, au hagalee hai be tangada hagabudu dagitedi deela. ¹² Au e noho haga onge i nia laangi e lua i lodo tabu e dahi, gei au e gowadu gi di goe dahi baahi madangaholu o agu bahihadu ala e ulu mai.'

¹³ "Tangada hagabudu dagitedi le e duu madatanga i daha, ge hagalee hila gi di langi, geia ga paapaa dono hadahada, ga helekai boloo, 'God, aloho mai gi di au, tangada huaidu!'"

¹⁴ Jesus ga helekai, "Au e hagiadu gi goodou bolo tangada hagabudu dagitedi la ne donu i baahi o God i mua dono hana gi dono hale, hagalee go di Pharisee. Idimaa, digau ala bolo ginaadou digau aamua, le e hai gii hila gi lala, gei digau ala e hila gi lala, le e hai gi aamua."*

Jesus e hagahumalia nia dama lligi

(Matthew 19.13-15; Mark 10.13-16)

¹⁵ Nia daangada ne laha mai nadau dama gi Jesus belee dugu ono lima gi nadau nua. Nia dama agoago a Maa ga gidee, gaa wwou gi digaula. ¹⁶ Gei Jesus ga gahi mai

* 18.14: Matthew 23.12; Luke 14.11

nia dama, ga helekai, “Duguina mai nia dama gi lloomoi gi di Au. Hudee abaabalia digaula, idimaa, Teenua King o God la ni digau ala e lligi beenei. ¹⁷ Au e hagi adu di tonu bolo tangada dela hagalee kae Teenua King o God be di tama dulii, geia e deemee di ulu i Teenua King o God.”

Tangada maluagina

(*Matthew 19.16-30; Mark 10.17-31*)

¹⁸ Tangada aamua o Judea ga heeu gi Jesus, “Tangada Agoago humalia, au e hai dagu aha, gei au ga hai mee gi di mouli dee odi?”

¹⁹ Jesus ga helekai, “Goe e hai bolo Au tangada humalia eiaha? Ma tangada e humalia ai, go God hua modogoia e humalia. ²⁰ Goe e iloo nia haganoho boloo,

‘Goe hudee hai be di manu, hudee daaligidia tangada gii made,

hudee gaiaa,

ge hudee helekai kai tilikai,

gi hagalabagau ina do damana mo do dinana.’ ”*

²¹ Gei taane deela ga helekai, “Au gu daudali nnaganoho aanei huogodoo, aga i dogu damagiigi.”

²² Jesus ga longono ia nia mee aanei, ga helekai gi mee, “Di mee e dahi i golo e hai gii hai kooe: Huia gi daha au mee huogodoo ala e hai mee ginai. Wanga ina nia bahi-hadu gi digau hagaloale, gei goe ga hai mee gi nia maluagina ala i di langi, hanimoi, daudalia mai au.” ²³ Taane deenei ne longono, gei mee gu manawa gee huoloo, i mee tangada maluagina huoloo.

²⁴ Jesus gaa mmada gi mee dela gu lodo huaidu, ga helekai, “E haingadaa huoloo go digau maluagina i di nadau ulu i Teenua King o God. ²⁵ E mada haingadaa go tangada maluagina i dono ulu i Teenua King o God, i di ‘camel’ ma ga ulu i di bongoo di iwi dui mee.”

* 18.20: Exodus 20.12-16; Deuteronomy 5.16-20

²⁶ Digau ala ne longono telekai a maa, ga heeu gi Mee, “Malaa, koai dela e mee di mouli?”

²⁷ Jesus ga helekai, “Nia mee ala e haingadaa i baahi nia daangada, le e haingoohia hua i baahi o God.”

²⁸ Gei Peter ga helekai, “Mmada, gimaadou gu diiagi madau hale belee daudali Goe.”

²⁹ Jesus ga helekai, “Au e hagi adu gi goodou di tonu bolo tangada ma ga diiagi dono hale, dono lodo, ono duaahina daane, ono maadua, ana dama idimaa go Teenua King o God, ³⁰ geia e hai mee gi nia mee e logo i di mouli dolomeinei mo di mouli e dee odi dela ga hanimoi.”

Di tolu helekai a Jesus i dono made

(Matthew 20.17-19; Mark 10.32-34)

³¹ Jesus gaa lahi ana dama agoago dilongoholu maa lua gi mada ginaadou, ga helekai gi digaula, “Hagalongo, gidaadou e hula gi Jerusalem, di gowaa dela ga kila aga nia helekai huogodoo nia soukohp i di gili Tama Tangada.

³² Mee gaa wanga gi digau tuadimee ga haganneenee, ga hagahuaidu, ga buibui ginai nia haawale. ³³ Digaula ga haga mamaawa a Mee, ga daaligi a Mee gii made, gei muli nia laangi e dolu, Mee ga mouli aga.”

³⁴ Gei nia dama agoago a Maa e de iloo ana helekai, idimaa nia hadinga o ana helekai la gu hagammuni i digaula, gei digaula e de iloo be Jesus e helehelekai i di aha.

Jesus e hagahili tangada hagaloale deegida

(Matthew 20.29-34; Mark 10.46-52)

³⁵ Jesus ne hanimoi ga hooohoo gi Jericho, gei tangada deegida e noho i taalinga di ala, e madamadau ana mee.

³⁶ Taane deenei ga longono di longoaa digau dogologo ala e hula dalia a Mee, ga heeu, “Ma di aha deenei?”

³⁷ Digaula ga helekai, “Jesus o Nazareth deenei e hana.”

³⁸ Mee gaa wolo gi nua, “Jesus! Tama a David! Aloho mai gi di au!” ³⁹ Digau ala e hula i mua o Jesus gaa wwou

gi mee, ga helekai bolo gi hudee leelee, gei mee koia ne wolowolo gi nonua, “Tama a David, aloho mai gi di au!”

⁴⁰ Gei Jesus gaa duu, ga helekai bolo gi laha mai taane deegida gi de la. Jesus ga heeu gi mee, ⁴¹ “Ma di aha dela e hiihai ginai goe bolo Au gi heia adu?”

Mee ga helekai, “Meenei, au e hiihai gi gidee labelaa.”

⁴² Jesus ga helekai gi mee, “Mmada! Do hagadonu guu hai goe gi humalia.”

⁴³ Di madagoaa hua deela, taane gu gidee tangada, ga daudali a Jesus mo di danggee anggi God. Digau huogodoo ala ne mmada gi di mee deenei, la gu hagaamu a God.

19

Jesus mo Zacchaeus

¹ Jesus ga ulu adu gi Jericho, gaa hana laa lodo di waa-hale. ² Tagi hagabudu dagitedi i golo, dono ingoo go Zacchaeus, tangada maluagina. ³ Mee e hiihai gi gidee ia a Jesus, be Mee tangada e hai behe. Gei Zacchaeus tama dangada hua dulii e deaadee di mmada gi Jesus, idimaa digau dogologowaahae. ⁴ Gei mee gaa lele gi mua digau dogologo aalaa, gaa gaga gi tomo di laagau ‘sycamore’ bolo gi gidee ia Jesus dela ga hanimoi laa laa. ⁵ Di madagoaa Jesus ne dau i golo, ge la ga mmada aga gi nua, ga helekai, “Zacchaeus, hagalimalima, gaga ia gi lala, Au e hai loo gii noho i doo hale dangi nei.”

⁶ Zacchaeus ga gaga ia hagalimalima gi lala, ga haga ulu a Mee gi lodo dono hale i di tenetene huoloo. ⁷ Digau huogodoo ala ne mmada gi di mee deenei, ga daamada ga helehelekai tamu, “Taane deenei gu ulu gi lodo di hale tangada huaidu!”

⁸ Zacchaeus ga duu i nua ga helekai gi Tagi, “Hagalongo meenei, au gaa wanga di baahi ogu golo gi digau hagaloale, hila hua au gu halahalau dagu dangada, gei au gaa hui gi mee nnolongo e haa gi nonua.”

⁹ Gei Jesus ga helekai, “Dangi nei di haga mouli guu dau i di hale deenei, i taane deenei hogi la tangada ni di madawaawa o Abraham. ¹⁰ Tama Tangada ne hanimoi belee halahala ge e haga mouli digau ala guu nngala.”*

*Di ala kai o nia bahihadu goolo
(Matthew 25.14-30)*

¹¹ Di madagoaa hua digaula nogo hagalongo, gei Jesus gaa kai labelaa dana ala kai, idimaa, Mee gu hoo hoo adu gi Jerusalem, gei digaula e hagabau bolo Teenua King o God la gu hoo hoo ga gila aga. ¹² Gei Jesus ga helekai, “Tangada aamua ne hana gi tenua mogowaa belee hai di king. Nomuli, geia ga hanimoi labelaa gi dono hale. ¹³ I mua dono hagatanga, gei mee ga gahi mai ana gau hai hegau dilongoholu, gaa wanga ginai ana bahihadu goolo dagidahi, ga helekai boloo, ‘Goodou mmada be dehee di godou hai e haga hai hegau nia bahihadu aanei i dogu madagoaa ma ga de igolo i godou baahi.’ ¹⁴ Gei nia daangada donu o maa gu de hiihai gi mee, gu hagau nadau gau hai hegau i muli o mee, ga helekai, ‘Gimaadou e de hiihai gi taane deenei e hai di madau king.’

¹⁵ “Taane deela la gaa hai di king, nomuli mee ga hanimoi, ga haga iloo gi ana gau hai hegau, bolo gi lloomoi gi ono mua, e hagadina nia bahihadu e hia ne wiini. ¹⁶ Tangada matagidagi ga hanimoi ga helekai boloo, ‘Agu bahihadu goolo ne kila mai e madangaholu mai i di bahihadu e dahi dela ne gaamai kooe.’ ¹⁷ Tangada aamua deela ga helekai, ‘Gu humalia, goe tangada hai hegau humalia. Idimaa goe dela ne hai hegau

* 19.10: Matthew 18.11

huudonu inia mee lligi, au gaa dugu goe e dagi au waahale llauehe madangaholu.’¹⁸ Togolua dangada hai hegau ga hanimoi, ga helekai, ‘Meenei, au gu kila mai agu bahihadu goolo e lima mai i di bahihadu e dahi dela ne gaamai kooe.’¹⁹ Taane aamua ga helekai gi tangada hai hegau deenei, ‘Goe gaa dagi au waahale llauehe e lima.’

²⁰ “Tangada hai hegau labelaa igolo ga hanimoi, ga helekai, ‘Meenei, deenei dau bahihadu. Au nogo dugu hagammuni di maa i lodo di angkadi.’²¹ Au nogo madagu i di goe, idimaa, goe tangada de daawa i o waalanga. Goe e kae nia mee ala hagalee ni aau, gei e hadi nia mee ala hagalee ni aau ne dogi.’²² Taane aamua deelaa ga helekai gi mee, ‘Goe tangada hai hegau huaidu. Au ga hagi aga goe i au helekai, e hagahuaidu goe. Goe e iloo bolo au tangada de daawa i ogu waalanga, e kae nia mee ala hagalee nia mee ni aagu, gei e hagi nia mee hagalee ni aagu ne dogi.’²³ Malaa, e aha dela goe digi duguina agu bahihadu gi lodo di bank? Gei au gaa kumi nia maa mo dono wiini i dogu hanimoi.’

²⁴ “Gei taane aamua ga helekai gi digau ala e tuu i golo, ‘Daawa di bahihadu goolo dela i mee, wanga ina gi tangada dela ana bahihadu goolo e madangaholu.’²⁵ Gei digaula ga helekai gi mee, ‘Meenei, mee ana bahihadu goolo e madangaholu!’²⁶ Gei mee ga helekai, ‘Au e hagi adu gi goodou bolo digau ala nadau mee i golo, gei e wanga labelaa ginai gii logo gi nonua. Gei digau ala nadau mee ai, nia mee hua dulii ala i nadau baahi, le e daa gi daha mo digaula.’²⁷ Gei ogu hagadaumee ala e de hiihai bolo au e hai di nadau king, laha mai digaula, daaligidia i ogu mua gii mmade.’”

* 19.26: Matthew 13.12; Mark 4.25; Luke 8.18

*Jesus e ulu i Jerusalem i dono aali
(Matthew 21.1-11; Mark 11.1-11; John 12.12-19)*

²⁸ Muli Jesus ne helekai nia mee aanei, gei Mee gaa hana i mua digaula gi Jerusalem. ²⁹ Dono dau hua gi Bethphage mo Bethany i di Gonduu Olib, gei Mee ga hagau ana dama agoago dogolua gi mua mo ana helekai boloo, ³⁰ “Hula gi tama waahale dela i gulu mua. Goolua ga ulu gi lodo, ga gidee tama ‘donkey’ e daula, gei digi hana ai tangada nonua. Weedee, dagia mai gi kinei. ³¹ Maa tangada ga heeu adu be goolua e wwede di maa eimaha, gei goolua helekai boloo, ‘Di Tagi e hiihai e hai hegau ai di maa.’”

³² Meemaa gaa hula ga gidee nia mee huogodoo ala nogo helekai ai a Jesus. ³³ Di madagoaa hua meemaa e wwede tama ‘donkey’, gei digau di nadau manu, ga heeu gi meemaa, “Goolua e wwede di maa eimaha?”

³⁴ Meemaa ga helekai, “Tagi e hiihai e hai hegau i di maa.” ³⁵ Meemaa gaa dagi tama ‘donkey’ gi Jesus, gaa kili nau gahu gi hongo di manu, ga hagamaamaa a Jesus e gaga gi hongo di maa. ³⁶ Di gaga o Mee gaa hana, gei nia daangada gaa holo nadau gahu gi hongo di ala.

³⁷ Dono hoohoo gi Jerusalem, i di gowaa dela iei di ala e hana gi lala i di Gonduu Olib, ana dama agoago huogodoo ga daamada ga dadaahili mo di haga hagaamu a God i nadau lee moogo gi nua i nia mee haga goboina huogodoo ala ne mmada ginai ginaadou, ³⁸ ga wwolowwolo boloo,

“God gi haga maluagina ina di King
dela e hanimoi i di ingoo o Dimaadua!
Di aumaalia i di langi,
mo di madamada ang gi God!”*

* 19.38: Pisalem 118.26

³⁹ Gei hunu Pharisee nogo ilodo digau dogologo ga helekai gi Jesus, “Tangada Agoago, helekai gi au dama agoago bolo gii noho dee muu!”

⁴⁰ Jesus ga helekai, “Au e hagi adu gi goodou bolo maa digaula gaa noho dee muu, gei nia hadugalaa ga daamada ga wwolowwolo gi nua loo.”

Jesus e madatangi i Jerusalem

⁴¹ Jesus ne hoohoo adu ga gidee Ia di waahale Jerusalem, ga madatangi, ⁴² ga helekai, “Maa nei boloo goe ne iloo dangi nei be di maa di aha dela e humalia gi di noho i di aumaalia! Gei goe e de gidee di maa dolomeenei. ⁴³ Di madagoaa ga dau mai, gei o hagadaumee ga haganiga goe mo nadau mee abaaba, ga duuli goe gi lodo, ga mmaanenge mai i nia baahi huogodoo. ⁴⁴ Digaula ga oho goe hagatau mo digau ala i lodo do abaaba, ga deai di hadu e dahi e dubu ai, idimaa, goe digi modongoohia di madagoaa a God ne hanimoi belee haga dagaloaha goe gi daha mo di made!”

Jesus e hana gi di Hale Daumaha

(Matthew 21.12-17; Mark 11.15-19; John 2.13-22)

⁴⁵ Jesus ne hana gi lodo i di Hale Daumaha, ga hagabagi digau huihui mee, ⁴⁶ ga helekai, “Ma guu hihi i lodo di Beebaa Dabu boloo, ‘Dogu Hale Daumaha la di hale dalodalo’,

“gei goodou guu hai di maa be

‘di gowaa pala hagamuni ni digau gaiaa!’ ”*

⁴⁷ Nia laangi huogodoo Jesus e hai ana agoago i lodo di Hale Daumaha. Gei nia dagi aamua hai mee dabu, digau haga donudonu haganoho, mo nia dagi o nia daangada gu hiihai belee daaligi a Mee gii made.* ⁴⁸ Gei digaula digi gida di nadau hai belee daaligi a Mee, idimaa, digau

* 19.46: Isaiah 56.7; Jeremiah 7.11 * 19.47: Luke 21.37

huogodoo e hiihai e hagalongo, ge hagalee hiihai e diiagi telekai e dahi i ana helekai.

20

*Di heeu di mogobuna dagi o Jesus
(Matthew 21.23-27; Mark 11.27-33)*

¹ Dahi laangi hua, Jesus nogo agoago gi nia daangada i lodo di Hale Daumaha i di Longo Humalia, gei nia dagi hai mee dabu mo digau haga donudonu haganoho ngaadahi mo nia dagi mmaadua ga lloomoi, ² ga helekai gi Mee, “Hagia mai gi gimaadou be nia mogobuna dagi mai ihee ala e hai ai au mee aanei? Ma koai dela ne gowadu di mogobuna dagi e hai au mee aanei?”

³ Jesus ga helekai gi digaula, “Dolomeenei gei Au e heeu adu dagu mee: Hagia mai, ⁴ nia mogobuna a John nogo hai ana babdais, la ne lloomoi i baahi o God, be mai i baahi nia daangada?”

⁵ Gei digaula ga helehelekai i nadau mehanga, “Gidaadou la ga helekai bolo aha? Maa gidaadou ga helekai boloo: ‘Ne loomoi i baahi o God,’ gei Mee ga helekai boloo, ‘Malaa e aha goodou hagalee hagadonu John?’ ⁶ Gei gidaadou ma ga helekai boloo, ‘Ne loomoi i baahi nia daangada,’ gei digau dogologo aanei ga dilidili gidaadou, idimaa digaula e hai bolo John la di soukohp.” ⁷ Gei digaula ga helekai, “Gimaadou e de iloo be nia mogobuna a maa ne gaamai i hee.”

⁸ Gei Jesus ga helekai gi digaula, “Au hagalee hagi adu hogi be nia mogobuna dagi ni ooi ala e hai ai agu mee aanei.”

*Di ala kai o digau benebene hadagee waini
(Matthew 21.33-46; Mark 12.1-12)*

⁹ Jesus gaa kai dana alakai gi digaula, “Taane ne dogi dana hadagee waini, gaa wanga gi ana gau benebene hadagee, geia gaa hana haga mogowaa

gu duai nau.* ¹⁰ Gaa dae mai di madagoaa dela e hadi ai nia huwa o di hadagee, gei mee ga hagau dana hege belee kumi dono duhongo i nia huwa o di hadagee waini deela. Gei digau benebene hadagee ga daaligi di hege deela, ga hagau a mee gii hana ana mee ne kae ai. ¹¹ Gei mee ga hagau labelaa dana huai hege, gei digaula ga daaligi labelaa a mee, gaa hai a mee hagahuaidu, ga hagau a mee gii hana ana mee ne kae ai. ¹² Gei mee ga hagau togodolu hege, gei digaula ga daaligi a mee gi moholehole labelaa, gaa hudu a mee gi daha. ¹³ Gei tangada dana hadagee waini deela, ga helekai, ‘Au gaa hai dagu aha? Au ga hagau hua go dagu dama daane donu hagalabagau. Holongo digaula ga hagalaamua laa a mee!’ ¹⁴ Malaa, digau benebene di hadagee deela ne mmada gi mee, ga helekai i nadau mehanga, ‘Deenei la go tama daane donu tangada dana hadagee waini. Gidaadou ga daaligi a mee gii made, gei ono maluagina gaa hai nia mee ni gidaadou.’ ¹⁵ Gei digaula gaa hudu a mee gi daha mo di hadagee waini, ga daaligi a mee gii made.”

Gei Jesus ga heeu, “Malaa, dehee laa di hai o tangada dana hadagee waini gaa hai ang gi digau benebene hadagee aalaa? ¹⁶ Mee ga hanimo, ga daaligi digau benebene hadagee aalaa, gaa wanga di hadagee gi nnuai gau benebene hadagee.”

Gei digaula ala ne hagalongo gi di mee deenei ga helekai aga, “Hagalee loo e hai beena!”

¹⁷ Jesus gaa mmada gi digaula ga helekai, “Malaa, di Beebaa Dabu deenei le e hai bolo aha, ‘Di hadu dela ne haga balumee go digau hau hale, la guu hai di hadu e kaedahi e hagalabagau!’* ”

¹⁸ “Digau huogodoo ala ga hingahinga gi hongo di hadu deela, la ga mooho haga ligiligi, gei di hadu

* 20.9: Isaiah 5.1 * 20.17: Pisalem 118.22

deelaa ma gaa doo gi hongo tangada, gei tangada deelaa la ga mooho haga ligiligi, guu hai hua nia gelegele.”

Di heeu di hai o di hui dagitedi

(Matthew 22.15-22; Mark 12.13-17)

¹⁹ Digau haga donudonu haganoho mo nia dagi aamua hai mee dabu ne hagamada belee galabudi Jesus i di madagoaa hua deelaa, idimaa digaula gu iloo bolo di ala kai a Mee ne hai, le e hai baahi ang gi ginaadou, gei digaula e mmaadagu i nia daangada. ²⁰ Digaula ga halahala di madagoaa humalia, ga hagau nia daane ala e haga maanadu bolo ginaadou le e donu, e hagalongo hagammuni gi nnelekai a Jesus gii mee ginaadou di haga hala a Jesus e lahi a Mee gi nia mogobuna gabunga o di gobinaa o Rome. ²¹ Digau madamada gaiaa aanei ga helekai gi Jesus, “Tangada Agoago, gimaadou gu iloo bolo au mee ala nogo agoago ai le e donu. Gimaadou e iloo labelaa bolo Goe hagalee haga dahidamee nia haganoho nia daangada, ge e agoago hua di tonu a God mo dono hiihai gi nia daangada. ²² Hagia mai be di maa e hai baahi gi tatau haganoho maa gidaadou gaa hui dagitedi gi di king o Rome be deei?”

²³ Gei Jesus gu iloo Ia di hai haga magiaa digaula, ga helekai, ²⁴ “Gaamai tei bahihadu silber. Di ada mo di ingoo ni ooi aanei i hongo di maa?”

Digaula ga helekai, “Ni di king o Rome.”



²⁵ Gei Jesus ga helekai, “Malaa, huia gi di king o Rome nia mee a di king, ge huia gi God nia mee a God.”

²⁶ Digaula gu deemee di haga hala a Mee i mua nia daangada, gu noho dee muu, gu goboina i ana helekai.

Di heeu di mouli aga

(Matthew 22.23-33; Mark 12.18-27)

²⁷ Hunu Sadducee, ala e hai bolo nia daangada le hagalee mouli aga, ne lloomoi gi Jesus ga helekai,*
²⁸ “Meenei, Tangada Agoago, Moses ne hihhi taganoho deenei, bolo taane ma gaa made, ga diagi dono lodo nau dama ai, gei tuaahina daane o maa e hai gii lodo gi di ahina deela, gaa hai nau dama, ga hagaingoo bolo nia dama ni taane dela ne made.*
²⁹ Taga haanau daane dogohidu i golo. Tama daane madua gaa hai dono lodo gi di ahina deela, gaa made, gei digi hai dana dama.
³⁰ Nomuli, gei togolua duaahina daane o maa gaa lodo gi di ahina deela.
³¹ Nomuli go togodolu duaahina daane. Taga haanau dogohidu huogodoo guu mmade, nadau dama gi di ahina deela ai.
³² Haga muliagina, gei di ahina deela la gaa made.
³³ Malaa, i di laangi dela e mouli aga nia daangada, di ahina deela la gaa hai di lodo ni ooi?

* 20.27: Nnegau 23.8

* 20.28: Deuteronomy 25.5

Idimaa, tagahaanau dogohidu huogodoo guu lodo gi di ahina deelaa!”

³⁴ Gei Jesus ga helekai gi digaula, “Nia daane mono ahina dolomeenei e haga hai lodo, ³⁵ gei nia daane mono ahina ala e tau ang gi di mouli aga mai di made mo e mouli i di madagoaa dela e hanimoi, la hagalee haga hai lodo. ³⁶ Digaula gaa hai be digau di langi, ga deemee di mmade. Digaula nia dama ni God, idimaa, digaula ne mouli aga mai i di made. ³⁷ Gei Moses gu haga modongoohia haga madammaa bolo digau ala ne mmade le e mouli aga. Di kai o di laagau duduia dela ne ulaula, Moses ne helekai i Dimaadua bolo Mee go di God o Abraham, di God Isaac, mo di God Jacob.* ³⁸ Mee di God ni digau mouli, hagalee ni digau mmade, idimaa digau huogodoo le e mouli ang gi Mee.”

³⁹ Hunu gau haga donudonu haganoho ga helekai aga, “Meenei Tangada Agoago, e donu go dau helekai deena!” ⁴⁰ Idimaa, digaula gu mmaadagu di heeu labelaa nadau mee gi Mee.

Di heeu di Mesaia

(Matthew 22.41-46; Mark 12.35-37)

⁴¹ Jesus ga heeu gi digaula, “Ma e hai behee dela digaula e helekai bolo di Mesaia la di hagadili ni David? ⁴² Idimaa, David gu helekai i lodo di Beebaa Pisalem, boloo, ‘Dimaadua gu helekai gi dogu Dagi:

Noho i ginei i dogu baahi gau donu,*

⁴³ gaa dae loo gi dagu dugu o hagadaumee gi lala o babaawae be di mee dugu wae.’

⁴⁴ “David ne gahi a Mee bolo dono Dagi, malaa, e hai behee di Mesaia gaa hai di hagadili ni David?”

Jesus e haga iloo hagalliga i digau haga donudonu haganoho

(Matthew 23.1-36; Mark 12.38-40)

* 20.37: Exodus 3.6 * 20.42: Pisalem 110.1

⁴⁵ I di madagoaa digau huogodoo nogo hagalongo gi Mee, gei Jesus ga helekai gi ana dama agoago, ⁴⁶ “Gii pula i goodou gi dee hai be digau haga donudonu haganoho ala e hiihai e heehee i lodo nadau gahu lloo, e hiihai bolo nia daangada gi hai nadau hagaaloho ge hagalaamua ginaadou i lodo nia gowaa huihui mee. Digaula e hilihili nia lohongo aamua i lodo nia synagoojee mo nia gowaa ala koia e humalia i lodo nia hagamiami. ⁴⁷ Digaula e kae nia haga humalia o nia ahina guu mmade nadau lodo ge gaiaa digaula i nadau hale, gei e dalodalo lloo! Di hagaduadua digaula la koia e huaidu huoloo!”

21

Tigidaumaha o di ahina guu made dono lodo

(Mark 12.41-44)

¹ Jesus ga gidee Ia digau maluagina e dugu nadau tigi-daumaha gi lodo di gowaa dugu hadu o di Hale Daumaha. ² Ge Ia gu gidee labelaa di ahina hagaloale ne made dono lodo e dugu ana teenedi mmee e lua. ³ Mee ga helekai, “Au e hagi adu gi goodou di tonu bolo di ahina hagaloale ne made dono lodo, la ne dugu ana mee koia e logo i nia mee digau huogodoo ala i golo. ⁴ Idimaa, digau ala i golo la ne tigidaumaha hunu maluagina o nadau maluagina, gei di ahina hagaloale la ne wanga go ana mee huogodoo ala belee mouli ai.”

Jesus e helekai di mooho di Hale Daumaha

(Matthew 24.1-2; Mark 13.1-2)

⁵ Hunu dama agoago a Maa e helehelekai i di Hale Daumaha, bolo ma e madamada ge humalia ono hadu, mo ono tigidaumaha ala ne wanga gi God. Gei Jesus ga helekai, ⁶ “Godou mee huogodoo ala e mmada ginai, di madagoaa ga dau mai di hadu e dahi e dubu i dono lohongo ai. Nia mee huogodoo ga meheu gi lala.”

Haingadaa mo nia hagahuaidu dangada

(Matthew 24.3-14; Mark 13.3-13)

⁷ Digaula ga heeu gi Mee, “Tangada Agoago, di mee deenei le e hai magaa hee? Ma di aha gaa hai e haga modongoohia bolo deela di madagoaa ga gila aga di maa?”

⁸ Jesus ga helekai, “Gii pula i goodou gi de halahalau go nia daangada. E logo digau e helekai i dogu ingoo boloo, ‘Au go Mee,’ gei e helekai labelaa boloo, ‘Di madagoaa gu dau mai!’ Goodou hudee kawee i digaula. ⁹ Goodou hudee mmaadagu i di godou longono bolo nia dauwa mono hai baahi i golo. Nia mee aanei le e hai loo gii kila i mua, gei hagalee haga modongoohia bolo di hagaodi la gu hoo hoo mai.”

¹⁰ Gei Mee ga helekai labelaa boloo, “Nia henua llauehe ga heheebagi. Nia henua ala e dagi go nia king ga hagadau dadaaligi ginaadou. ¹¹ Henuailala ga ngalungalua.

Nia dau magamaga mono dau magi gaa logo inia madagoaa huogodoo. Nia mee haga maehagi ge hagamadagudagu dangada ga kila mai i di gili di langi.

¹² I mua nia mee aanei gaa hai, gei goodou e lawalawa e dadaaligi, e wanga gi nia gabunga e gabunga i lodo nia synagoo, ge e kili gi lodo nia hale galabudi, ge e lahi laa mua nia king mo nia dagi, idimaa goodou e hagalaamua dogu ingoo. ¹³ Deenei hua di godou madagoaa humalia e hagadele di Longo Humalia.

¹⁴ Hagabaubau gi humalia i mua di madagoaa, ge hudee hagabaubau e logo be goodou ga helekai bolo aha gi digaula,* ¹⁵ idimaa, Au ga gowadu gi goodou nia helekai mo di iloo, gei tei i godou hagadaumee e mee di hai baahi be e hagahuaidu goodou ai. ¹⁶ Goodou gaa wanga go godou maadua, godou duaahina daane, godou gau

* 21.14: Luke 12.11-12

mo godou ihoo, gei hunu goodou e daaligi go digaula gii mmade. ¹⁷ Digau huogodoo ga hudiou adu gi goodou idimaa go dogu ingoo. ¹⁸ Gei deai di ngaahulu e dahi i godou libogo e ngala ai. ¹⁹ Tuu gii mau, gei goodou gaa kae di mouli.

Jesus e helekai di mooho o Jerusalem

(Matthew 24.15-21; Mark 13.14-19)

²⁰ “Di madagoaa goodou gaa mmada gi Jerusalem e hii go nia buini dauwa, gei goodou gu iloo hua bolo ma gu hoo hoo hua ga mooho. ²¹ Gei digau ala i Judea e hai gii llele gi daha gi nia gonduu, gei digau ala i lodo di waahale damana Jerusalem e hai gi hagatanga gi daha, gei digau ala i lodo henua, hagalee hula gi lodo di waahale damana deela. ²² Idimaa, nia laangi aalaa la go nia laangi o di hagaduadua, e hai gii kila nia helekai huogodoo ala guu hihi gi lodo di Beebaa Dabu.* ²³ E huaidu huoloo anggi nia ahina ala e hai dama, mono ahina ala nadau dama lligi i nia laangi aalaa, idimaa, di haingadaa damana ga dau mai gi hongo tenuta nei, gei di hagaduadua a God ga haneia gi hongo digau tenuta deenei. ²⁴ Hunu gau ga daaligi gi nia hulumanu dauwa, gei hunu gau gaa lahi be digau galabudi gi nia henua llauehe huogodoo, gei digau o di bouli ga dagadagahi Jerusalem gaa dae loo gi nadau madagoaa ma gaa lawa.

Di hanimoi o Tama Tangada

(Matthew 24.29-31; Mark 13.24-27)

²⁵ “Nia haga modongoohia gaa hai gi di laa mo di malama mo nia heduu i di langi. Nia henua huogodoo henuailala ga nadau hagadagadagee ai, ga mmaadagu i di ngoloolo mo di bagibagia o di moana.* ²⁶ Nia daangada ga hagalibelibeina i nadau mmaadagu di tali

* 21.22: Hosea 9.7 * 21.25: Isaiah 13.10; Ezekiel 32.7; Joel 2.31; Hagagida 6.12-13

di mee dela gaa hai gi hongo henuailala, idimaa, nia mogobuna o lodo di ahiaalangi la ga hagalee i nadau lohongo. ²⁷ Di madagoaa hua deela, gei Tama Tangada ga gila mai, e hanimoi i lodo di gololangi mono mogobuna maaloo dangihi ge madamada.* ²⁸ Di madagoaa nia mee aanei ga daamada ga kila aga, tuu i nua, mmada gi nua, i di godou haga mouli la gu hoohoo mai.”

Di agoago o di laagau 'fig'

(Matthew 24.32-35; Mark 13.28-31)

²⁹ Jesus gaa kai di ala kai deenei, “Haga maanadu ina di laagau ‘fig’ mono laagau huogodoo ala i golo. ³⁰ Goodou mmada gi nia lau ga daamada ga matilitili i di gili nia manga, gei goodou gu iloo bolo di madagoaa mahana-hana la gu hoohoo mai. ³¹ E hai gadoo beenei, goodou gaa mmada gi nia mee aanei ga kila aga, gei goodou gu iloo bolo Teenua King o God la gu hoohoo ga hanimoi.

³² “Goodou gi langahia bolo nia mee aanei huogodoo la gaa hai i mua di mmade o digau huogodoo ala e mouli dolomeenei. ³³ Di langi mo henuailala la ga hagalee, gei agu helekai le e noho hua beelaa.

Noho kanakana

³⁴ “Gii pula i goodou. Hudee hagadaadaamee ina goodou gi nia haihai hagamiamee, mo di inuinu nia dagaa, mo di mamaanadu di mouli dolomeenei, idimaa, di laangi deela le e limalima hua di tale adu gi goodou. ³⁵ Di laangi deela, le e hai be di hele dela e hanimoi gi hongo digau huogodoo ala e noho inia gowaa huogodoo i henuailala. ³⁶ Gii noho kanakana, hai dalodalo i nia madagoaa huogodoo gii mee goodou di llele gi daha mo nia mee huogodoo ala gaa hai, gii mee goodou di tuu i mua Tama Tangada.”

* 21.27: Daniel 7.13; Hagagida 1.7

³⁷ Jesus e hai ana agoago i nia laangi aalaa i lodo di Hale Daumaha. Hiahi ia di mee, gei Mee gaa hana gaa noho i di boo i hongoo di Gonduu Olib.* ³⁸ Hagaluada loo i nia laangi aalaa, digau huogodoo e hula gi di Hale Daumaha belee hagalongo gi Mee.

22

Di haganohonoho taaligi o Jesus

(Matthew 26.1-5; Mark 14.1-2; John 11.45-53)

¹ Tagamiami di Palaawaa Digi Hagatanga, dela e haga ingoo bolo di Pasoobaa, gu hoo hoo mai,* ² gei nia dagi hai mee dabu, mo digau haga donudonu haganoho e mmaadagu i nia daangada, gei digaula ga halahala di nadau ala hagammuni belee daaligi Jesus gii made.

Judas guu baba bolo e hagi anga a Jesus

(Matthew 26.14-16; Mark 14.10-11)

³ Setan ga ulu gi lodo Judas, dela e haga ingoo bolo Iscariot, tangada e dahi i nia dama agoago dilongoholu maa lua a Jesus. ⁴ Judas gaa hana gi daha mo digaula, ga helekai ginaadou mo nia dagi hai mee dabu, mo digau aamua ala e hagaloohi di Hale Daumaha i dana hai dela ga hagi anga a Jesus gi digaula. ⁵ Digaula gu tenetene bolo ginaadou e hui a mee gi nia bahihadu. ⁶ Gei Judas guu baba, ga daamada ga halahala dana madagoaa humalia dela e hagi anga a Jesus gi digaula gei nia daangada e de iloo.

Jesus e hagatogomaalia e miami Tagamiami Pasoobaa

(Matthew 26.17-25; Mark 14.12-21; John 13.21-30)

⁷ Di laangi Tagamiami o di Palaawaa Digi Hagatanga ne dae mai, dela di madagoaa e daaligi ai nia dama siibi o di Pasoobaa. ⁸ Jesus ga hagau a Peter mo John ga helekai, “Hula hagatogomaalia ina Tagamiami Pasoobaa e miami gidaadou.”

* 21.37: Luke 19.47 * 22.1: Exodus 12.1-27

⁹ Meemaa ga heeu, “Di gowaa dehee e hiihai ginai Goe belee hagatogomaalia?”

¹⁰ Gei Mee ga helekai, “Hula gilodo di waahale Jerusalem, taane e kae dana loaabi wai ga heetugi adu gi goolua. Daudalia adu a mee gi lodo di hale dela e ulu ginai mee, ¹¹ helekai gi tangada dono hale boloo, ‘Tangada Agoago ne helekai boloo, Dehee di ruum e miami iei gimaadou mo agu dama agoago i Tagamiami Pasoobaa?’

¹² Gei mee ga hagi adu gi goolua di ruum damana i nua gu togomaalia, deela di gulu gowaa e hagatogomaalia gulu mee huogodoo.”

¹³ Meemaa gaa hula, gaa mmada gi nia mee huogodoo guu hai be nia helekai a Jesus, gei meemaa ga hagatogomaalia Tagamiami Pasoobaa.

Tagamiami haga muliagina o Tagi

(Matthew 26.26-30; Mark 14.22-26; 1 Corinthians 11.23-25)

¹⁴ Di aawaa ne dae mai, gei Jesus gaa noho i dono lohongo i teebele mo ana dama agoago. ¹⁵ Mee ga helekai, “Au nogo hiihai huoloo bolo e miami Tagamiami Pasoobaa madalia goodou i mua dogu hagaduadua. ¹⁶ Idimaa, Au e hagi adu gi goodou, bolo Au e hagalee miami labelaa tagamiami deenei, gaa dae loo gi di haga honu tadinga di maa i Teenua King o God.”

¹⁷ Jesus ga dahi aga dana ibu, ga danggee ang gi God, ga helekai, “Dahia adu di ibu deenei, hagaduu ina i goodou. ¹⁸ Au e hagi adu gi goodou bolo dolomeenei gaa huli gi muli, gei Au hagalee e inu nia waini aanei, gaa dae loo gi Teenua King o God ga dau mai.”

¹⁹ Gei Mee ga dahi aga dana palaawaa, ga danggee ang gi God, ga ginigini gaa wanga gi digaula, ga helekai, “Deenei la go dogu huaidina dela e gowadu gi goodou. Heia di mee deenei e haga langalangahia iei Au i godou baahi.” ²⁰ Muli tagamiami hiahi, gei mee gaa wanga di ibu gi digaula,

ga helekai, “Di ibu waini deenei la go di hagababa houu a God, ne haga mogobuna gi ogu dodo, ala ga llingi adu gi goodou.*

²¹ “Mmada, tangada dela e wanga au, la iginei i tee-bele dalia Au!” ²² Tama Tangada la gaa made gii hai be di manawa o God, gei e huaidu huoloo ang gi tangada dela ma gaa wanga a Mee!”

²³ Digaula ga daamada ga heheeu i nadau mehanga, ma koai i ginaadou dela gaa hai di mee deenei.

Di lagamaaloo be koai dela e aamua
(Matthew 18.1; Mark 9.34; Luke 9.46)

²⁴ Di lagamaaloo guu hai i mehanga ana dama agoago be koai e kaedahi e aamua.* ²⁵ Jesus ga helekai, “Nia king o digau ala e bouli le e mogobuna i hongo nadau daangada, gei digau ala e dagi, le e hai bolo ginaadou la go nia hoo hagaaloho o nia daangada.* ²⁶ Hagalee deenei go di hai e donu e hai go goodou. Tangada dela koia e aamua i goodou e hai gii hai be tangada dela e dulii loo i goodou. Gei di tagi le e hai gii hai be di hege ni goodou.*

²⁷ Koai tangada dela e aamua: go tangada dela e noho i lala e miami, be go tangada dela e hai ana hegau? Ma go tangada dela e noho i lala! Malaa, Au dela i godou baahi, le e hai be tangada dela e hai ana hegau.*

²⁸ “Goodou nogo noho i dogu baahi i ogu madagoaa nogo haingadaa. ²⁹ Gei Au ga gowadu gi goodou di mogobuna e dagi, gadoo be dogu Damana dela ne gaamai di mogobuna deela gi di Au. ³⁰ Goodou ga miami ge inu i dagu deebele i dogu Henua, goodou gaa noho i hongo nia

* 22.20: Jeremiah 31.31-34 * 22.21: Pisalem 41.9 * 22.24: Matthew 18.1; Mark 9.34; Luke 9.46
* 22.25: Matthew 20.25-27; Mark 10.42-44
* 22.26: Matthew 23.11; Mark 9.35 * 22.27: John 13.12-15

lohongo king, e dagi nia madawaawa Israel madangaholu maa lua.*

Jesus e haga modongoohia aga di haga de iloo a Peter

(Matthew 26.31-35; Mark 14.27-31; John 13.36-38)

³¹ “Simon! Simon! Hagalongo! Setan la guu kae dana hagadootonu bolo ia e hagamada goodou, e hili digau humalia mo digau huaidu, gadoo be tangada hai hadagee dela e hili nia lii ‘wheat’ gi daha mo ono gili. ³² Gei Au gu dalodalo i di goe, Simon, bolo do hagadonu gi hagalee bagege. Do madagoaa ma ga huli mai labelaa gi di Au, gei goe gi hagamaaloo ina aga o duaahina ala i golo.”

³³ Gei Peter ga helekai, “Meenei Tagi, au gu togomaalia e hana madalia Goe gi di hale galabudi, ge e made madalia Goel!”

³⁴ Jesus ga helekai, “Peter, Au e hagi adu gi di goe bolo i mua teduu ma gaa wolo boo nei, gei goe ga helekai haga dolu, bolo goe e de iloo Au.”

Di mee dugu hadu, peege, mo tulumanu dauwa

³⁵ Gei Jesus ga heeu gi ana dama agoago, “Dogu madagoaa ne hagau goodou gei digi kae godou mee dugu hadu, nia peege be nia suudi, goodou la gu huaidu adu gi goodou?”*

Digaula ga helekai, “Deeai, Meenei.”

³⁶ Jesus ga helekai, “Gei dolomeenei, tangada dela dana mee dugu hadu, be di peege, la gi kae ina. Tangada dela dana hulumanu dauwa ai, geia gi huia dono gahu mahaa gi daha, e hui dana hulumanu. ³⁷ Di Beebaa Dabu e helekai boloo, ‘Mee e dau dalia digau huaidu.’

“Au e hagi adu gi goodou bolo nia helekai aanei le e hai loo gii kila, idimaa, nia mee ala ne hihii i di Au, le e hai loo gii dohu dono hagahonu.”*

* 22.30: Matthew 19.28 * 22.35: Matthew 10.9-10; Mark 6.8-9; Luke 9.3; 10.4 * 22.37: Isaiah 53.12

³⁸ Nia dama agoago ga helekai, “Mmada, meenei Tagi, nia hulumanu e lua aanei.”

Gei Jesus ga helekai, “Guu dohul!”

Jesus e dalodalo i di Gonduu Olib

(Matthew 26.36-46; Mark 14.32-42)

³⁹ Jesus ga hagatanga i di waahale Jerusalem, gaa hana gi di Gonduu Olib be dana hai nogo hai, gei ana dama agoago guu hula madalia a Mee. ⁴⁰ Mee ne dau i di gowaa deela, ga helekai gi digaula, “Dalodalo, gi dee too hua goodou gi lodo nia hagamada.”

⁴¹ Gei Mee gaa hana gii tanga gi daha mo digaula, gi mada mogowaa be di mogowaa di hudu di hadu, ga dogoduli ga dalodalo. ⁴² Mee ga helekai, “Tamana, be di maa e baba ginai Goe, daawa ina di ibu o di hagaduadua deenei la gi daha mo Au. Gei hagalee go dogu hiihai, go do hiihai le e hai gii hai.” ⁴³ Tangada di langi ga haga gida gi Mee, ga haga maaloo aga a Mee. ⁴⁴ Mee guu lodo daamaha ge gu dalodalo hagamahi huoloo. Nia hee o maa guu hai be nia madaua dodo e monnono gi hongo di gelele.

⁴⁵ Mee ga duu aga i dana hai dalodalo, gaa hana gi baahi ana dama agoago, gaa mmada, gei digaula e kii, gu paagege i nadau lodo huaidu. ⁴⁶ Mee ga helekai gi digaula, “Goodou e kii beleiaha? Noho gi nua, dalodalo, gi dee too hua goodou gi lodo di hagamada!”

Di kumi o Jesus

(Matthew 26.47-56; Mark 14.43-50; John 18.3-11)

⁴⁷ Jesus nogo helehelekai hua igolo gei digau dogologo gu dau mai, e dagi mai go Judas, tangada i dilongoholu maa lua a Jesus. Mee ne hanadu gi Jesus gaa hongu a Mee. ⁴⁸ Gei Jesus ga helekai, “Judas, ma di hongu dela e wanga ai Tama Tangada?”

⁴⁹ Nia dama agoago ala nogo i baahi o Jesus gaa mmada gi di mee dela e hai, ga hee, “Meenei Tagi, gimaadou

ga hai hegau gi madau hulumanu dauwa?”⁵⁰ Gei tangada e dahi digaula gaa tuu gi daha talinga di baahi gau donu o di hege tagi aamua hai mee dabu.

⁵¹ Jesus ga helekai, “Deelaa hua, guu lawa go di mee deenei!” Mee gaa bili gi talinga o taane deelaa, guu hai gii hili gi dono lohongo.

⁵² Gei Jesus ga helekai gi nia dagi hai mee dabu, nia dagi aamua hagaloohi di Hale Daumaha, mo nia dagi mmaadua ala ne lloomoi belee kumi a Mee, “Goodou ne lloomoi mo godou hulumanu dauwa mono goloo daaligi dangada be di mee bolo Au tangada hai hala!”⁵³ Au nogo i godou baahi i lodo di Hale Daumaha i nia laangi huogodoo, gei goodou digi hai bolo e kumi Au e galabudi. Deenei di godou aawaa belee hai hegau ai, i di madagoaa dela e dagi go di mogobuna o di bouli.”

Peter e haga de iloo Jesus

(Matthew 26.57-58,69-75; Mark 14.53-54,66-72; John 18.12-18,25-27)

⁵⁴ Digaula gaa kumi a Jesus, gaa lahi gi di hale tagi aamua hai mee dabu, gei Peter ga daudali digaula, e madatanga i daha. ⁵⁵ Di ahi gu akaa i tungaalodo di gowaa daahaa hai gabunga, gei Peter gu madalia digau ala e noho i golo e haganiga di ahi. ⁵⁶ Tama ahina hai hegau ga gidee ia a mee e noho i golo, geia gaa mmada haga huudonu gi mee, ga helekai, “Taane deenei nogo madalia a Jesus labelaa!”

⁵⁷ Peter ga haga de iloo ia, ga helekai, “Di ahina nei, au e de iloo a Mee!”

⁵⁸ Nomuli hua, tuai dangada ga modongoohia eia a Peter, ga helekai, “Goe tangada e dahi i digaula labelaa.”

Gei Peter ga helekai, “Tangada nei, ma hagalee ko au!”

⁵⁹ Holongo di aawaa e dahi nomuli, gei tuai daane ga helekai hagamahi boloo, “E donu bolo taane deenei la nogo madalia a Jesus, idimaa, mee tangada o Galilee labelaa!”

⁶⁰ Gei Peter ga helekai, “Taane nei, au e de iloo be goe e helehelekai bolo aha!”

Di madagoaa hua dela e helehelekai iei mee, gei teduu daane gaa wolo.

⁶¹ Tagi ga huli mai gi muli, gaa mmada haga huudonu gi Peter, gei Peter ga langahia nia mee a Tagi nogo helekai ang gi deia boloo, “I mua hua teduu ma gaa wolo boo nei, gei goe ga helekai haga dolu bolo goe e de iloo Au.” ⁶² Peter gaa hana gi malaetae, mo di dangidangi wawwawe.

Jesus guu hai hagahuaidu ge dadaaligi

(Matthew 26.67-68; Mark 14.65)

⁶³ Nia daane nogo hagaloohi a Jesus gu haganneenee Jesus mo di dadaaligi a Mee. ⁶⁴ Digaula guu nnoo nia golomada o Maa, ga heeu gi Mee, “Ma koai dela ne hagamaawa Goe!” ⁶⁵ Digaula guu hai nadau helekai e logo ala i golo e hagahuaidu a Mee.

Jesus i mua digau hai gabunga aamua

(Matthew 26.59-66; Mark 14.55-64; John 18.19-24)

⁶⁶ Ga hooaga luada, gei nia dagi mmaadua mo nia dagi hai mee dabu, mo digau haga donudonu haganoho la ne heetugi i di gowaa e dahi, ga laha mai a Jesus gi mua digau hai gabunga aamua. ⁶⁷ Digaula ga helekai, “Hagia mai, Goe go di Mesaia?”

Jesus ga helekai, “Maa au ga helekai adu bolo Au go di Mesaia, gei goodou hagalee hagadonu. ⁶⁸ Gei Au ga heeu adu dagu heeu, gei goodou hagalee helekai gi dagu heeu. ⁶⁹ Dolomeenei gaa huli gi muli, Tama Tangada gaa noho i baahi gau donu o God Aamua Huuloo.”

⁷⁰ Gei digaula huogodoo ga helekai, “Goe go Tama a God?”

Gei Mee ga helekai, “Goodou ala gu helekai bolo ma ko Au.”

⁷¹ Gei digaula ga helekai, “Gidaadou hagalee bolo gii hai tadau gau haga modongoohia. Gidaadou gu longono ana helekai!”

23

*Jesus i mua o Pilate**(Matthew 27.1-2,11-14; Mark 15.1-5; John 18.28-38)*

¹ Tagabuulinga dangada ga tuu gi nua, gaa lahi a Jesus gi mua o Pilate. ² Digaula ga daamada ga hagahuaidu a Mee, ga helekai, “Gimaadou ne kumi Taane deenei dela ne dagi gee madau daangada. E helekai gi digaula bolo gi hudee hui dagitedi gi di king o Rome, gei e hai bolo Ia go di Mesaia, di king.”

³ Pilate ga heeu, “Goe go di king digau o Jew?”

Jesus ga helekai, “Kooe dela e helekai.”

⁴ Pilate ga helekai gi nia dagi hai mee dabu, mo digau dogologo, “Au digi gida dagu ihala belee hagahuaidu Taane deenei.”

⁵ Gei digaula ga helekai aga mada maaloo, “Mee ne hai digau i nia gowaa huogodoo i Judea gi leelee logo i ana agoago. Mee ne daamada i Galilee, ga dau mai loo gi kinei.”

Jesus i mua Herod

⁶ Pilate ne longono ia nia mee aanei, ga heeu, “Taane Galilee deenei?” ⁷ Di madagoaa Pilate ne iloo ia bolo Jesus la tangada tenea dela e dagi go Herod, geia ga hagau a Mee gi Herod dela nogo i Jerusalem i di madagoaa hua deela. ⁸ Herod gu tenetene huoloo dono mmada gi Jesus, i mee gu longono ia nia longo o Maa, gu waalooloo dono tali bolo ia e mmada gi Mee. Mee nogo talitali bolo ia e mmada gi Jesus e hai ana mogobuna. ⁹ Herod gaa hai ana heeu e logo gi Jesus, gei Jesus digi helekai gi nia heeu a maa. ¹⁰ Nia dagi hai mee dabu mo digau haga donudonu haganoho gaa tuu gi mua ga helekai maaloo hagahuaidu a Jesus. ¹¹ Herod mo ana gau dauwa ga haganneennee haga balumee a Jesus, ga haga ulu a mee gi di gahu madamada, ga hagau gi muli gi Pilate. ¹² Di

laangi hua deela, gei Pilate mo Herod guu hai di hagadau ihoo, mai i mua gei meema nogo hagadaume.

Jesus gu hagi aga e daaligi gii made

(Matthew 27.15-26; Mark 15.6-15; John 18.39—19.16)

¹³ Pilate ga haga dagabuli mai digau aamua hai mee dabu, nia dagi, mo nia daangada, ¹⁴ ga helekai, “Goodou gu laha mai Taane deenei bolo Mee ne haga hala nia daangada. Gei dolomeenei, au gu haga dina a Mee i godou mua, gei au digi gida dagu mee hala inia hagahuaidu ala nogo helekai iei goodou. ¹⁵ Gei Herod digi gida bolo Mee e hala labelaa, dela ga hagau mai labelaa Taane deenei gi gidaadou. Goodou gi iloo bolo Taane deenei digi hai dana hala bolo gaa hidi iei Mee e daaligi gii made. ¹⁶ Malaa, au gaa wanga a Mee e haga mamaawa go agu gau dauwa, nomuli gei au ga hagamehede a Mee gii hana.” ¹⁷ [Nia madagoaa nia Hagamiami Pasoobaa huogodoo, gei Pilate e hai gi hagamehede ang gi digau o Jew dahi dangada galabudi.]

¹⁸ Digau huogodoo gaa wwolo gi nua boloo, “Tangada deena la daaligidia gii made, gei Barabbas la gi hagamehede ina mai gi gimaadou!” ¹⁹ (Gei Barabbas la tangada huaidu ne hudu gi lodo di hale galabudi i di ngongooaa nogo hai i lodo di waahale damana, gei mee ne daaligi dana dangada gii made.) *

²⁰ Pilate le e hiihai hua e hagamehede a Jesus, deela laa gei mee ga helekai labelaa gi di hagabuulinga dangada deela. ²¹ Gei digaula gaa wwolo gi mee, “Daudaulia a Mee! Daudaulia a Mee!”

²² Pilate ga helekai tolu holongo, “Di hala aha ne hai go Mee? Au digi gida dagu mee bolo e daaligi a Mee gii made! Au gaa hai a Mee gi haga mamaawa, gaa lawa, ga hagamehede a Mee.”

* 23.19: Di waahale damana la go Jerusalem

²³ Gei digaula ga wwolo aga hua maaloo gi nadau lee mugu nua bolo Jesus le e daudau. Muli hua nia wwolowolo digaula, gei di maa guu hai be di hai digaula. ²⁴ Gei Pilate ga hagamodu di hagi aga o Jesus gii hai be di hiihai digaula. ²⁵ Gei mee ga hagamehede tangada dela nogo hiihai ginai digaula, dela nogo i lodo di hale galabudi i di ngongooaa mo dana daaligi tangada gii made, gei mee gaa wanga a Jesus gi digaula, gii hai ginai nadau hiihai.

Di daudau o Jesus

(Matthew 27.32-44; Mark 15.21-32; John 19.17-27)

²⁶ Di madagoaa digau dauwa ne lahi a Jesus gi daha, digaula ga heetugi gi taane mai Cyrene go Simon, e hanimoi gi di waahale. Digaula gaa kumi a mee, ga hagenda di loobuu gi hongo o mee, gi aamo ina i muli o Jesus.

²⁷ Di hagabuulinga gau dogologo e daudali a Mee. Nia ahina i lodo digaula, e tangitangi i Mee. ²⁸ Jesus gaa huli gi digaula, ga helekai, “Nia ahina o Jerusalem! Hudee tangitangi mai gi di Au. Tangitangi adu gi goodou mo godou dama. ²⁹ Idimaa, nia laangi e loomoi i golo, gei nia daangada ga helekai boloo, ‘Gu haadanga lamalia go nia ahina ala digi hai nadau dama, gei digi haanau be hagalee haga uu nadau dama.’ ³⁰ Deelaa di madagoaa

‘nia daangada ga helekai gi nia gonduu boloo:

Hinga mai gi madau nua!

Gei e helekai gi nia gonduu lligi:

Gahu ina gimaadou gii nngala!”*

³¹ “Maa nia mee aanei la gaa hai i di madagoaa di laagau le e mouli, ma di aha gaa hai i di madagoaa di laagau ga maangoo?”

³² Nia daane dogolua gu haga ulu mai labelaa gi daha belee daaligi gii mmade dalia a Jesus. Meemaa nia daangada dagahi haganoho. ³³ Di nadau dau mai gi di gowaa

* 23.30: Hosea 10.8; Hagagida 6.16

e haga ingoo bolo “Di Gowaa Hangaibu Libogo”, digaula ga daudau a Jesus i golo, mo nia daangada huaidu dogolua, tangada e dahi i dono baahi gau donu, ge dahi i dono baahi gau ihala. ³⁴ Jesus ga helekai, “Tamana, Goe dumaalia ang gi digaula, idimaa digaula e de iloo nadau mee ala e hai.”

Gei digaula gaa duwwe nia gahu o Maa i ginaadou i di nadau bilei ‘dice’ ne hai.*

³⁵ Nia daangada e tuu i golo e daumada nia mee aanei, gei nia dagi digau o Jew e haganneenee a Mee, ga helekai, “Mee e mee hua di haga mouli nia daangada ala i golo. Dugu anga gi Mee gii bida haga mouli Ia, maa Ia go di Mesaia dela ne hilihili go God.”*

³⁶ Digau dauwa gu haganneenee a Mee labelaa, ga lloomoi mo nadau waini hui ngoohia, gaa wanga gi Mee,* ³⁷ ga helekai, “Goe gii bida haga mouli ina hua Goe, maa Goe go di king o digau o Jew!”

³⁸ I hongo di libogo Jesus i hongo di loobuu, e hihi nia helekai aanei: “Deenei di king digau o Jew.”

³⁹ Tangada e dahi i nia daangada huaidu ala ne daudau dalia a Mee, ga helekai hagabuhi gi Mee, “Goe hagalee go di Mesaia? Daawaa ina Goe, mo gimaua!”

⁴⁰ Di hoo o maa ga helekai haga buhi gi dono ehoo, “Goe hagalee madagu i God? Goe guu kae di hagaduadua be Mee. ⁴¹ Gidaua e tau hua di kae di hagaduadua deenei, idimaa, gidaua e kae di hui o tau mee hala ala ne hai, gei Mee digi hai dana hala.”

⁴² Gei mee ga helekai, “Meenei Jesus, gi langahia e Goe au i do madagoaa ma gaa king iei Goe!”

⁴³ Jesus ga helekai, “Au e hagi adu gi di goe di tonu bolo dangi nei hua, gei goe ga madalia Au i Paradais.”

* 23.34: Pisalem 22.18 * 23.35: Pisalem 22.7 * 23.36: Pisalem 69.21

Di made o Jesus

(Matthew 27.45-56; Mark 15.33-41; John 19.28-30)

⁴⁴ Holongo di laa e madangaholu maa lua, gei di bouli la guu gahu tenua hagatau gaa dae loo gi di laa e dolu,
⁴⁵ idimaa, di laa gu hagalee maahina. Gei di gahu dela e dau i lodo di Hale Daumaha la gu mahaa lua.*



Di gahu i lodo di Hale Daumaha

⁴⁶ Gei Jesus gaa wolo gi nua, ga helekai, “Tamana! Au e dugu adu dogu hagataalunga gi lodo oo lima.” Mee ne helekai hua beenei, nomuli gaa made.*

⁴⁷ Gei tangada dauwa aamua dela ne gidee ia nia mee aanei, ga hagaamu a God, ga helekai, “E donu hua bolo Tangada deenei la Taane humalia!”

* 23.45: Exodus 26.31-33 * 23.46: Pisalem 31.5

⁴⁸ Digau dogologo ala ne dagabuli belee mmada gi nia mee aanei, ga gidee nia mee ala ne hai, gei digaula gaa hula gi nadau hale mo di dugidugi nadau hadahada i nadau lodo huaidu. ⁴⁹ Digau huogodoo ala gu iloo Jesus, mo nia ahina ala nogo daudali a Mee mai i Galilee, e tuu mai haga mogowaa e daumada nia mee ala e hai.*

Di danu o Jesus

(Matthew 27.57-61; Mark 15.42-47; John 19.38-42)

⁵⁰⁻⁵¹ Taane dono ingoo go Joseph, mai Arimathea di waahale i Judea, mee tangada humalia ge hagalaamua go nia daangada, gei mee nogo talitali Teenua King o God. Ma e aha maa mee tangada i digau aamua hai gabunga, gei mee hagalee hiihai gi nadau hangaahai maanadu mo nadau hangahaihai. ⁵² Mee gaa hana gi mua o Pilate, ga madau tuaidina o Jesus. ⁵³ Mee ga dugu ia tuaidina o Maa gi lala, gaa hii gi di gahu lenge, gaa dugu gi lodo taalunga dela ne hodo gi lodo tadugalaa, digi hai hegau ai. ⁵⁴ Ma di lima laangi, gei di Laangi Sabad gu hoo hoo ga daamada.

⁵⁵ Nia ahina ala nogo daudali a Jesus mai loo i Galilee, ne hula i muli o Joseph belee mmada gi taalunga, mo di hai dela ne dugu a Jesus gi lodo taalunga. ⁵⁶ Nomuli, gei digaula gaa hula gi nadau hale, e hagatogomaalia nadau mee haga kala mee mono lolo kala ang gi tuaidina o Maa.

Di Laangi Sabad, digaula ga hagamolooloo gii hai be taganoho.*

24

Di mouli aga

(Matthew 28.1-10; Mark 16.1-8; John 20.1-10)

¹ Hagaluada loo di laangi tabu, nia ahina ne hula gi taalunga, e kae nadau lolo hagakala ala ne hagatogomaalia. ² Digaula gu gidee bolo di hadu

* 23.49: Luke 8.2-3 * 23.56: Exodus 20.10; Deuteronomy 5.14

la gu haga daga gi daha mo di bongoo taalunga, ³ gei digaula gaulu adu gilodo, digi gidee tuaidina Tagi Jesus. ⁴ Digaula gaatuu hua igolo gu gologolo idi mee dela ne hai, i di madagoaa hua deela, nia daane dogolua e gahu i nia gahu maahina ge dabadaba, e tuu i nadau baahi. ⁵ Nia ahina gummaadagu huoloo, gaa pala gi lala loo gi hongo di gelegele, gei nia daane ga helekai, “Goodou e aha ala e halahala tangada e mouli gi lodo digau gu mmade? ⁶ Mee hagalee i ginei, Mee gu haga mouli aga. Goodou gi langahia ana helekai ne hai i Galilee boloo,* ⁷ ‘Tama Tangada le e hai gii wanga loo gi digau huaidu, e hai gi daudau gi di loobuu, i muli nia laangi e dolu, ga mouli aga.’ ”

⁸ Gei nia ahina ga langahia nia helekai a Maa, ⁹ gaa hula ga hagi anga nia mee aanei huogodoo gi nia dama agoago dilongoholu maa dahi a Jesus, mo digau ala igolo. ¹⁰ Nia ahina aanei la go Mary mai Magdala, Joanna, mo Mary tinana James. Digau aanei mo nia hoo digaula gu hagi anga gi digau agoago hagau. ¹¹ Gei digau agoago hagau digi hagadonu nia helekai nia ahina aalaa, idimaa digaula e hagamaanadu bolo nnelekai digaula la ono hadinga ai. ¹² Gei Peter ga duu i nua, gaa lele gi taalunga, ga bala gi lala, gaa mmada gi lodo taalunga, ga gidee ia di gahu daalunga, deai di mee labelaa i dono baahi ai. Gei mee gaa hana gi dono hale, gu gologolo be ma di aha dela ne hai.

Di hula gi Emmaus

(Mark 16.12-13)

¹³ Di laangi hua deela, gei nia daangada dogolua i digau ala nogo daudali a Jesus e hula gi di waahale Emmaus, holongo nia maele e hidu mai Jerusalem. ¹⁴ Gei meemaa

* 24.6: Matthew 16.21; 17.22-23; 20.18-19; Mark 8.31; 9.31; 10.33-34; Luke 9.22; 18.31-33

e ngudungudu kai i nia mee ala ne hai. ¹⁵ I di nau hula mo di ngudungudu kai, gei Jesus ga menege adu ga haele i baahi meemaa. ¹⁶ Meemaa gaa mmada gi Mee, gei digi modongoohia ginaua a Mee. ¹⁷ Jesus ga helekai adu gi meemaa, “Goolua e helehelekai i di aha, dela e helehelekai mo di hula?”

Gei meemaa gaa tuu de ngalungalua loo mo nau golomada guu mmada lodo huaidu. ¹⁸ Tangada e dahi i meemaa dono ingoo go Cleopas, ga heeu gi Mee, “Goe tangada dogo hanimoi hua madamada gi Jerusalem dela e de iloo nia mee ala ne hai i nia laangi dului ala guu too gi daha?”

¹⁹ Jesus ga heeu, “Nia mee aha?”

Meemaa ga helekai, “Go nia mee ala ne hai gi Jesus o Nazareth. Tangada deenei la soukohp dela guu dugu go God mo digau dogologowaahee, bolo Mee e mogobuna i ana mee nogo helehelekai ai mo ana mee ala nogo hai. ²⁰ Tadau dagi hai mee dabu mo tadau dagi aamua guu wanga a Mee gi di gabunga e hagamodu e daaligi gii made, gei Mee gu daudau i di loobuu. ²¹ Gei gimaadou nogo noho hagadagadagagee bolo ma go Mee dela ga haga dagaloaha Israel! Gei dangi nei lago di tolu laangi i muli di laangi ne hai di mee deenei. ²² Hunu ahina o tadau hagabuulinga gu haga homouli gimaadou. Digaula ne hula heniheni gi taalunga, ²³ gei digaula digi gidee ginaadou tuaidina o Maa, ga lloomoi hua, ga helekai bolo ginaadou guu mmada gi nia daangada di langi, ne helekai ang gi ginaadou, bolo Mee gu mouli aga. ²⁴ Hunu gau i di madau hagabuulinga guu hula gi taalunga, gu gidee ginaadou nia mee huogodoo e hai be nia helekai nia ahina, malaa digaula digi gidee ginaadou a Mee.”

²⁵ Gei Jesus ga helekai gi meemaa, “Goolua e de kabemee! E buna huoloo di gulu hagadonu nia mee huogodoo ala gu helekai ai nia soukohp! ²⁶ Ma hagalee e donu bolo di Mesaia le e hai loo gi hagaduadua i nia mee aanei, ga ulu gi lodo ono madamada?” ²⁷ Gei Jesus

ga haga donu gi meemaa nia mee ala ne helekai i de Ia i lodo nia helekai beebaa dabu huogodoo, e daamada i Nnaganoho Moses mo nia Beebaa o nia Soukohp.

²⁸ Digaula ga hoo hoo gi di waahale dela e hula ginai meemaa, gei Jesus gaa hai be di mee bolo Ia e hana hua igolo. ²⁹ Gei meemaa ga helekai maaloo gi Mee bolo gii noho hua i nau baahi ma gu hoo hoo ga bouli. Gei Mee guu noho i baahi meemaa. ³⁰ Mee gaa noho gi lala i baahi meemaa belee miami, ga dahi aga di palaawaa, ga danggee ang gi God, ga ginigini di palaawaa, gaa wanga gi meemaa. ³¹ Gei nau golomada gu gidee, gu modongoohia a Mee, gei Mee gu haga ngala e Ia i meemaa. ³² Meemaa ga helekai i nau mehanga, “Ma hagalee guu hai be di ahi nogo ulaula i tau lodo i di madagoaa nogo helekai iei Mee i hongo di ala, mo di haga donu mai nia helekai di Beebaa Dabu?”

³³ Meemaa ga tuu i nua, gaa hula gi muli gi Jerusalem, ga gidee nia dama agoago dilongoholu maa dahi a Jesus la gu dagabuli mo nadau ihoo ala igolo. ³⁴ Digaula ga helekai gi meemaa, “Tagi le e donu hua bolo gu haga mouli aga! Mee gu haga gida gi Simon!”

³⁵ Gei nia daangada dogolua aanei ga haga modongoohia gi digaula nia mee ala ne hai i hongo di ala, mo di nau modongoohia ginaua di Tagi i di madagoaa Mee nogo ginigini dana palaawaa.

Jesus e haga gida gi ana dama agoago

(Matthew 28.16-20; Mark 16.14-18; John 20.19-23; Nnegau 1.6-8)

³⁶ Di madagoaa hua meemaa nogo helekai nia mee aanei, gei Tagi ga gila aga i nadau lodo, ga helekai, “Di aumaalia gi madalia goodou.”

³⁷ Gei digaula gu homouli nadau lodo, bolo ginaadou ne mmada hua gi di ieidu. ³⁸ Gei Mee ga helekai, “Goodou e homouli beleiaha? Ma e aha nia manawa logo e kila aga i lodo godou hagamaanadu? ³⁹ Mmada gi ogu lima mo

ogu babaawae gi modongoohia bolo ma ko Au. Bili mai gei goodou ga iloo bolo ma ko Au, idimaa, di ieidu la ono goneiga mo ono iwi ai, gei Au ogu goneiga mo ogu iwi i golo.”

⁴⁰ Mee ne lawa di helekai beenei, ga haga gida ono lima mo ono babaawae gi digaula. ⁴¹ Gei digaula digi hagadonu hua igolo, ginaadou gu tenetene huoloo mo di goboina, gei Mee ga heeu, “Godou meegai i ginei?” ⁴² Digaula gaa wanga di iga mmoo gi Mee, ⁴³ ga dahi mai, gaa gai i mua digaula.

⁴⁴ Mee ga helekai, “Aanei nia mee dahidamee ala ne hagi adu ko Au gi goodou i dogu madagoaa dela nogo i godou baahi: Nia mee huogodoo ala ne hihi i di Au i lodo Nnaganoho Moses mo nia Beebaa o nia Soukohp mono Pisalem ne belee hai gii kila.”

⁴⁵ Gei Mee gaa huge nadau libogo gi iloo ginaadou nia helekai di Beebaa Dabu, ⁴⁶ ga helekai, “Deenei di hai ne hihi nia mee aanei: di Mesaia le e hai loo gi hagaduadua, ga mouli aga mai di made i muli nia laangi e dolu. ⁴⁷ Di Longo Humalia o di maliu o di manawa mo tumaalaa gi nia huaidu, le e hai gi agoago i dono ingoo ang gi nia henua huogodoo, e daamada i Jerusalem. ⁴⁸ Goodou lago digau haga modongoohia nia mee ala ne mmada ginai goodou. ⁴⁹ Ma ko Au dela ga hagau adu gi goodou di mee dela ne hagababa go dogu Damana. Goodou gi taalia i lodo di waahale deenei, gaa dae loo gi nia mogobuna mai i di langi ga dugu ia gi godou nua.”*

Jesus guu lahi gi di langi

(Mark 16.19-20; Nnegau 1.9-11)

⁵⁰ Gei Mee gaa daga digaula gidaha mo Jerusalem gaa dau adu gi Bethany, gei Mee ga dahi aga ono lima

* 24.49: Nnegau 1.4

ga haga maluagina digaula.* ⁵¹ Di madagoaa o Mee ne haga maluagina digaula, Mee ga hagatanga i baahi digaula gaa lahi gi di langi. ⁵² Digaula ga daumaha ang gi Mee, gaa hula gi muli gi Jerusalem mo di tenetene huoloo, ⁵³ gaa noho hua i lodo di Hale Daumaha mo di hagaha-gaamu a God.

* 24.50: Nnegau 1.9-11

Beebaa Dabu

The Holy Bible in the Kapingamarangi language of the Federated States of Micronesia, spoken on the Kapingamarangi and Ponape islands, Caroline Islands

Copyright © 1996, 2014 The Kapingamarangi Bible translation committee

Language: Kapingamarangi

Translation by: The Kapingamarangi Bible translation committee

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-04-24

PDF generated using Haiola and XeLaTeX on 13 Mar 2019 from source files dated 12 Mar 2019

28201f3a-53b9-559a-9b49-00a6f40bcb2a